

**NATIONAL ASSEMBLY OF  
SEYCHELLES**

*Wednesday 5th April, 2023*

*The Assembly met at 0912 am*

*National Anthem*

*Moment of Reflection*

*Mr Speaker in the Chair*

**MR SPEAKER**

Bonzour tou Manm Onorab. Bonzour nou zofisyen Lasanble e nou piblik ki'n zwenn nou ozordi. Byenveni dan Lasanble zot tou.

Nou ava apel Minis e son delegasyon silvouple lo *Utilities Commission Bill*.

Bonzour Minis Flavien Joubert e delegasyon ki'n la avek nou depi yer;- Mr Imaduwa *Principal Secretary*. Mr George James, *Assistant Principal Legal Draftsperson*. Ms Irene Sirame, *Legal Draftsperson*. Mrs Bernice Charles, *Acting CEO Energy Commission* e Mrs Sharon Gerry, *Senior Legal Officer* dan Minister.

Mon'n ganny enformen ki Minis i le fer en deklarasyon lo sa *Bill*. Minis?

**MINISTER  
JOUBERT**

Bonzour Mr Speaker. Bonzour bann Manm Lasanble. E bonzour bann dimoun ki pe ekoute. Mr Speaker, yer nou'n ekout bann deba ki'n ganny fer lo komansman diskisyon sa *Utilities Regulatory Commission Bill*.

Nou'n pran kont bann pwen ki'n ganny leve. E apre sa nou'n diskite avek bann teknisyen e i osi bann dimoun lo nou kote, nou Minister.

E nou realize ki i annan en nesesite pou nou fer plis refleksyon lo enn ou de pwen dan sa *Bill*, pou nou evite ki nou kre en kantite deba dan Lasanble kan nou kapab ale korize e retourne avek en versyon pli prop sa *Bill*.

Mon a pran en legzanp;- par egzanp sa pwen ki ti leve kot i konsern *political parties* anba Seksyon 10, ki mon rapel *Leader Lopozisyon* ti leve.

I en keksoz ki nou'n - (*membership of political parties*, pardon) ki nou'n reflesir lo la e nou vwar ki nou bezwen fer plis refleksyon ansam avek *Attorney Zeneral* e petet apre re

met sa devan *Bills Committee* pou diskisyon sa bann pwen.

E alor nou konsyan ki Lasanble i annan en azanda ase sarze. Nou pa le perdi letan pou nou fer plis diskisyon lo bann pwen ki nou konnen nou kapab diskite an deor Lasanble, apre re anmennen.

Alor avek ou permision mon ti ava demande ki nou *pause* oubyen *postpone* prezantasyon sa *Bill*. E nou retournen apre ki nou'n fer plis diskisyon lo sa bann pwen ki kapab anmenn kontansyon dan Lasanble. Mersi Mr Speaker.

### **MR SPEAKER**

Mersi Minis. An akord avek - Eskiz mwan Onorab Andre i le adrese?

### **HON CLIFFORD ANDRE**

Mersi Mr Speaker. Mr Speaker koman Chair *Bill Committee*, mon ti a kontan remersye Minis pou pran konsiderasyon bann deba ki'n pase dan Lasanble e ki i montre ki i annan sa laspe ekoute, sa laspe pran konsiderasyon letan i annan serten konsern ki leve ki *genuine*, ki pou anmenn en bon Lalwa.

Alors mon konnen i annan en prosedir ki nou pou swiv la. Me selman mon le remersye li pou pran konesans sa bann

eleman e letan zot ava retourne ankor kot *Bills Committee*, mon sir ki nou pou ganny en Lalwa ki'n rafinen si oule. E ki parey in dir pou annan mwens deba.

Mon ti a kontan osi demande ki lezot Minister i swiv sa lapros dan le fitir, kot letan Lasanble i ganny maksimize pou fer bann travay ki neseser.

Sa i enn ki neseser, me selman i ava annan en Lalwa devan nou ki prop e ki mazorite Manm e piblik Seselwa i ava kapab swiv de pros. Mersi.

### **MR SPEAKER**

Mersi. Oule adres a se moman Onorab Pillay?

### **HON SEBASTIEN PILLAY**

Mersi Mr Speaker e bonzour tou koleg Onorab. Byensir bonzour Minis avek ou *panel*.

Mr Speaker, mon'n ekout sa ki Minis in dir nou bomaten *regarding* sa propozisyon pou zot *withdraw* sa *Bill* e al re travay lo la.

Nou apresye e nou krwar sa i byen. Akoz nou'n kapab met devan bann pwen ase serye. Sirtou nou lo kote Lopozisyon i annan bann keksoz ki nou'n diskite ki nou'n met devan, ki mon krwar i enportan.

Nou konnen poudir kote Gouvernman son rol se siport

son *Bill*. E i kler poudir baze lo bann konsern ki'n annan sorti predominaman lo nou kote latab, in fer Gouvernman re alinyen e pou zot rekonsider bann pozisyon. E pou anmenn en *Bill* ki en pe pli prop.

Mon bezwen dir Mr Speaker si nou ti annan sa lapros - si nou ti kapab ganny sa lapros e ki sa ki Lopozisyon i ganny dir pa ganny trete komanzis banal oubyen ganny tap kalot ladan, en kantite keksoz nou ti pou kapab akonpli.

E se sa lespri mon krwar ki sa rapor *TRNUC* ki mon gete ti pe koz lo la, e enn Bann pwen ki mon'n *raise* dan sa rapor, enn son bann rekomandasyon se ki *dorénavant* fodre fer sir ki konsiderasyon politik pa anpes en dimoun pou li ganny en louvraz oubyen en travay. E mon krwar nou bezwen viv sa demokrasi ki nou pe koz ladan.

E Mr Speaker, zis pou fer referans avek en sityasyon ki nou'n annan resaman, kot nou'n finalman par egzanp ganny larepons *Electoral Commission* lo nou let, ki en larepons e i apel sa en *response*. Finalman in admet prezan ki prezan in donn en *response*.

E dan sa larepons i pa pe aksepte lamazorite bann pwen ki nou'n met devan li. A leksepsyon detrwa ki pou

konsider dan en *meeting* parti politik. Ki dan en let in dir nou pou ariv en tel ler, e dan en lot let i dir nou pou ariv en lot ler.

Sa i montre ou Mr Speaker, ki i annan lazans ki pa pare pou anbras sa lespri e sa rol ki Lasanble Nasyonal i annan e ki lopozisyon i annan pou zwe dan Lasanble Nasyonal.

Alors mon remersye Minis pou pran sa desizyon. E mon swete ki nou ava kapab ganny bann diskisyon serye lo sa bann *Bill*.

Be mon bezwen dir Mr Speaker, mon bezwen dir - i pou fer dezyenm *Bill* la. *Foreign Exchange Bill* nou'n ganny lenformasyon menm avan menm nou komans deba in ganny *withdrawn*.

E Minis yer in eksplik nou ki i annan travay ki bezwen ganny fer. Mon pa kapab blanm Minis Flavien Joubert akoz in vin devan Lasanble, in sey travay lo son *Bill*, in montre en lanvi pou li travay lo son *Bill*. Mon pa pou blanm li lo la. Me mon espekte ki Gouvernman i fer en pe plis zefor lo sa kote. Mersi Mr Speaker.

## **MR SPEAKER**

Mersi. Annakor avek *Standing Orders* mon pou met sa sityasyon dan lanmen *mover of*

*the Bill* ki ti Onorab Sandy Arissol.

**HON SANDY ARRISOL**

Mersi Mr Speaker. Bonzour Mr Speaker, bonzour Minis avek ou delegasyon.

Mon ti a kontan avan mon move Mr Speaker, mon ti ava kontan remersye Minis pou sa move parey in ganny eksplike dan Lasanble Nasyonal e profite pou dir tou bann Manm sirtou bann Manm Bills Committee ki'n fer en travay kolektiv an relasyon avek sa Bill, e tou bann teknisyen ki'n ede, pou ki i annan en travay ki'n ganny fer. E la nou aprann poudir i annan serten desizyon ki'n ganny pran. E nou, nou full dakor avek sa.

Si i pou anmenn en keksoz pli bon pou Lasanble, pou pei, nou, nou full par deryer full sipor an relasyon avek sa.

E mon ti ava kontan Mr Speaker parey Order 77 i dir withdrawal of Bills, mon a zis lir pou bann dimoun ki pe ekoute Mr Speaker avek ou permision, pou zot konpran ki nou pe fer.

*“The Leader of Government Business or Member in charge of a Bill may, at any time, move that the Bill be withdrawn and the Bill shall stand withdrawn without the necessity for a vote”.*

An vi ki mwan ki ti anmenn Bill dan plas *Leader of Government Business*, so mon pe move Mr Speaker anba Order 77 ki *Bill Utilities Regulatory Commission Bill, 2022* i ganny withdrawn from the House. Mersi bokou Mr Speaker.

**MR SPEAKER**

Mersi. Standing Order 77 i kler. *The Bill is withdrawn.*

Pardon Onorab Hoareau ou ti pe adres en keksoz lo la?

**HON JOHN HOAREAU**

Non, mon ti pe demande si nou pou bezwen segonn sa Mosyon menm si napa vot?

**MR SPEAKER**

Standing Orders pa fer okenn referans avek Mosyon. I zis dir mover of the Bill withdraws the Bill. So, mon krwar sa i final i kler. Mersi.

Mersi the Bill is withdrawn e mon a permet Minis e son delegasyon pou fer zot depar dan lasal silvouple. Mersi.

(MINISTER JOUBERT AND HIS DELEGATION WERE EXCUSED FROM THE HOUSE)

**MR SPEAKER**

Bon, me *Leader Lopozisyon* in lev size en lot *Bill Foreign Exchange Bill*. Sa ti'n fer *First Reading* dan Lasanble i pa ankor ganny *withdrawn*.

Ki pozisyon- ? *Chief Whip* eski zot ti met pare pou *withdraw* sa *Bill* la oubyen nou pou fer li en sesyon fitir?

### **HON SANDY ARISSOL**

Mr Speaker mon mazinen an konsiltasyon avek *Bills Committee*, zot ki en pe pli azour avek sa *Bill*, mon mazinen nou pa pou fer li neseserman ozordi be kekfwa dan en lot sesyon Lasanble Nasyonal. Mersi.

### **MR SPEAKER**

Onorab Pillay oule adres lo prosedir?

### **HON SEBASTIEN PILLAY**

Wi Mr Speaker, *as long* ki i pa ankor fer *Second Reading*. Zis en let i vin kot Clerk i enform li ki *the Bill is being withdrawn*.

### **MR SPEAKER**

*Thank you.* Nou ava atann ki sa prosedir i ganny swiv. Onorab Andre?

### **HON SEBASTIEN PILLAY**

Non, i pe koz sa lot *Bill* li. *Foreign Exchange* pa ankor lir li.

### **HON CLIFFORD ANDRE**

M Speaker 77 i dir ou *before the Third Reading*. So, in fer *First Reading*, i pa ankor fer *Second Reading*, so, it needs to be *withdrawn formally before the Assembly*.

E sa mon mazinen letan *LGB* i retournen i ava fer sa formalite. Mersi.

### **MR SPEAKER**

Absoliman se sa kot nou ti'n arrive. Mersi sa i rezourd kestyon lo size *Foreign Exchange Bill*.

Bon si nou retourn lo nou *Order Paper*, nou annan en Mosyon e nou a kapab pran sa Mosyon ki dan non Onorab Regina Esparon.

Onorab Esparon ou pare pou komans lo ou Mosyon? Byen. Be nou a konmanse. Onorab ou annan laparol.

### **HON REGINA ESPARON**

Mersi Mr Speaker. Mosyon ki mon pe prezant ek sa Lasanble pou aprouve i lir koumsa;

Sa Lasanble i demann Gouvernman pou revwar striktir Brigad Irzans dan bann distrik avek bi fer li vin pli efektiv. Mersi Mr Speaker.

### **MR SPEAKER**

Mersi. Nou a pran en segonnman. Onorab Philip Arissol.

### **HON PHILLIP ARISSOL**

Mersi Mr Speaker. Bonzour Mr Speaker. Mr Speaker, Mosyon Onorab Espanon i ganny segonde. Mersi.

### **MR SPEAKER**

Mersi. Onorab Espanon ou kapab adres Lasanble lo ou Mosyon.

### **HON REGINA ESPARON**

Mersi Mr Speaker. Akoz en tel Mosyon? Les mwan komans par retourn en pti pe an aryer pou dir ki Brigad Dirzans oubyen *Emergency Brigade of first respondent* - parey bokou dimoun pou refer avek, i en groupman ki ti ganny met an plas anba Minister Gouvernman Lokal enformelman, apre ki pei ti'n ganny tape ek sounami an Desanm 2004.

E loptik ou *scope* zot loperasyon, sete pou *attend* okenn *emergency* ou ka irzan lo nivo lokal dan bann distrik.

Brigad ti en groupman ki ti konpri plizoumwen bann travayer distrik ki ti pe travay en lanbelisman e detrwa lezot aktivis fidel parti *SPPF* sa lepok, akoz zot ki ti la o pouvwar, kot

zot ti ganny apele bann travayer Biro Brans.

Plizoumwen zot ti form sa group, kot ti annan 2 ou 3 dimoun pli aze avek plis leksperyans e konesans dan distrik e detrwa pilye sorti dan milisya sa lepok. E ti annan environ 400 zot, ki ti dekoul dan tou distrik lo Mahe, Praslin e osi La Digue.

Mr Speaker, pou komanse zot ti ganny ser ten lantrennman debaz lo *emergency preparedness* avek *DRDM* sa lepok. E osi ser ten *training* avek Seksyon *Fire Brigade*. E bi sa *training* sete pou pli byen prepar zot pou nenport ki evantyalite ki kapab arive dan distrik. Ki swa delo monte lo teren, ki swa dife ou lateras grennen e osi *overflow* dan bann lakaz kot bann *housing estate*.

Tousala ti form parti zot *scope* loperasyon. E byensir pou zot fonksyonnen. Brigad ti osi annan bann lekipman byen prepare an ka en dezas, oubyen en ka dirzans ki kapab arive nenport ki ler ki bezwen mendev.

E Mr Speaker, fodre note ki tou distrik ti ganny demande pou stok bann lekipman. E ti osi annan en *backup* lo nivo santral. Bann lekipman parey pyos, lapel, gran kouto, bouret,

masin koup dibwa, prela, ti bann ki ti esansyel e tousala ti ganny prevwar pou ki ler problemm i arive zot in pare. E an avangard.

Ti annan lenstans Mr Speaker kot zot ti menm ranpli bann goni later an avans e stoke, an ka zot bezwen fer baraz dan ka delo kot i annan delo monte oubyen lateras grennen.

Mr Speaker, lentansyon ti bon. Me selman o kour bann lannen ki'n ekuole, ki nou'n vwar arive? Dan bokou distrik brigad in dezentegre. E dezormen letan bann kalamite i frap distrik oubyen ler bann ka dezas i arive, rod lekipman. Rod lekipman ou, lekipman in disparate. E personn pa konnen kote i ete. Ti la, pa ti la - pa mwan, entel. Pa konnen kot i ete. Son met in pran.

I annan distrik zot in menm pran ki ni menm en lanmans pyos pa reste. E la Mr Speaker, i fer mwan mazin parol Onorab Lemiel dan enn nou bann deba. Nou'n osi temwannyen o kour bann lannen ki'n swiv, ki dan bokou distrik sa groupman in nepli egziste, oubyen zot nepli aktiv.

Parski bokou bann dimoun ki ti lo lalis brigad swa zot in mor, swa zot nepli enterese. I annan ki'n al lo laz e

nepli annan sa kouraz. E sa bann dimoun ki ti devoue pou fer brigad marse, pa'n ganny ranplase.

I annan distrik ki zis non ki lo en lalis. E dan bokou fwa ler problemm i arive zot telefonn *it cannot be reached* oubyen *"try again later."* Sey ankor pli tar, ou telefonnen i anven. Oubyen sa limero in nepli egziste. Ki fer ki Lotorite Distrik dan sa bann letan irzan i vwar li pe vir an ron e in pri lo en telefonn pe sey rod led partou.

Mr Speaker, se pour sa ki Mosyon ki mon'n anmenn pe demande pou revwar sa striktir pou fer li vin pli efikas. Akoz si ou annan en lalis ki *outdated* ou pa an kontak regilye ek ou tim, fouti! Alor i tre enportan ki distrik pe toulstan gete ki mannyer i kot son lalis brigad a zour e toulstan pe *update*. Annan en *team leader* i osi enportan pou kit group ansanm.

Ozordi pli gran defi se *recruitment*. E avek bann nouvo kriter ki pou vini, i pou nepli sa zafer zis en lalis aktivis. Me nou bezwen en group ki efektiv. E pou sa arive nou bezwen bann dimoun ki fit fizikman. Dimoun ki pa travay ek bann *critical services* oubyen servis esansyel tel parey lapolis, *fire brigade*, ners, travayer lanbilans, *Red*

Cross, *DRDM* eksetera. Akoz? Koumsa sa i ava permet dimoun ki napa lezot responsabilite irzan pou pare a nenport ki ler e ki i ganny apele.

Mr Speaker parski ou deza pe travay ek en servis dirzans, i annan sa gran posibilite ki si i annan en ka dirzans ouswa en *emergency*, ou kapab ganny apele pou ou rapport *on duty* dan ou travay. E sa dan li menm pou kre en andikap si ou lo sa groupman lo *frontliners* pou *district brigade*.

I kapab pa zis enn, me detrwa Manm ki vvar zot dan sa sityasyon ki i bezwen raport dan son louvraz ki deza la i pou redwir lakantite manm ki distrik pou annan pou li travay avek.

Sa i en mezir prekosyon ki distrik i bezwen met antet ler i pe *recruit* bann Manm ki pou al lo *district brigade*. Sa dimoun i bezwen annan en lasante ki bon, *medically fit*. E la sa form ki ou ranpli pe deza endike.

Mr Speaker, mon totalman dakor ki en dimoun i bezwen *fit*. Pran par egzant en dimoun ki ganny bebelouka, e si ou bezwen anvoy li grenp lo en lakaz pou re klout 2 fey tol ki'n sorti, ki risk ou pe pran si i pe ganny en latak bebelouka anler lo twatir e i tonbe.

En dimoun ki ganny tansyon, si ou pe anvoy li donn lanmen tenny en dife oubyen en ensandi dan distrik, sa i kapab ogmant son tansyon e i kapab ganny problem.

Ou osi bezwen dimoun ki kapab travay dan group, ki en *team player* e pare pou ekout lenstriksyon. E deza la, bann kriter ki pe ganny propoze lo sa nouvo form ki pe ganny, ki pou bezwen ganny ranpli.

Mr Speaker, ler nou pe rod dimoun pou zwenn brigad, i enportan ki nou osi idantifye dan distrik bann dimoun ki annan resours e ankouraz zot pou zwenn pou ki dan nenport evantyalite zot kapab la pou ede. Parske *district brigade* i sipoze an lafors pou distrik dan letan bezwen. E si ou ganny detrwa dimoun dan distrik ki ou kapab kont lo la koman en *backup*, menm avek ser ten lekipman an plis, sa i ava ede pou fer sa tim pli for.

Se pou sa ki dan sa nouvo striktir ou pou bezwen en groupman ki konpri omwen 10 dimoun, apard met *DA* ek son tim ki enkli *OM* e *general attendants* i ava fer ou environ 15 dimoun.

Parmi sa 10 dimoun zot bezwen annan bann *skill debaz* parey servi masin koup dibwa, kot zot pou ganny apwente pou

2an. E zot ganny *endorse* par Lotorite Distrik. Ou bezwen *of good character*, pare pou antreprann bann louvraz fizik.

Mr Speaker, sa dimoun ki deside zwenn brigad pou bezwen siny en lagreman ek Gouvernman Lokal pou osi pey en lasirans pou li koman en garanti, ki si i arriv li okenn problemm letan i *on duty*, omwen ki i ava ganny kouver.

E kriter laz pou antre lo *district brigade* i ant 18 a 63an. E la ankor mon vvar ki sa laz 63an i pou depan lo si sa dimoun i fit e fizikman kapab.

La osi i bezwen annan en *assessment* ki ganny fer e pou get kapabilite sa dimoun. E pou sa, i ava ganny plase dan bann pozisyon ki aplikab e pli ale avek son abilite e kapabilite.

Mr Speaker, ler dezas i arive Lotorite Distrik i bezwen osi kapab evalye sityasyon e gete lekel zonm ki i pou deploye e kote. Mon a donn ou en legzanp. Annou dir i annan en lakaz ki'n dekouver e dan ou group ou annan ou 2 dimoun par lao 60an. La ou pou bezwen servi ou diskresyon? Eski ou avoy 2 dimoun par lao 60an lo en *scene* oubyen ou balanse? E la ou a pran enn pli zenn pou azout dan group e lot ki annan konesans dan sarpantye.

Me par kont si en pye dibwa in tonbe, la ou ava avoy 2 ki pli aze ansanm baze lo leksperyans pou kapab servi masin. E la Lotorite Distrik i bezwen servi son diskresyon ki mannyer pou balans dimoun dan tim.

Mr Speaker, i osi bon fer resorti ki madanm osi i ganny ankouraze pou vin en manm brigad. E al osi ler ou pe balans ou tim pou avoy lo *scene*, Lotorite Distrik a balans son tim an sa ki konsern kote pou enkli plis madanm dan tim depandan lo kalite kalamite ki distrik in fer fas avek.

E sa groupman brigad pa devret reste aktiv zis letan i annan dezas. Distrik i devret kapab osi pran kont sa laspe prevansyon e organiz bann programm travay lo nivo distrik oubyen lo nivo rezyon an kolaborasyon ek *DRDM*, pou vvar bann risk dan distrik e viz en pe zot zefor lo la.

Brigad atraver distrik i osi kapab organiz bann aktivite pou ed bann dimoun pli vilnerab ki bezwen led, parey kot 2 dimoun aze ki pe reste tousel, pou ed zot penn zot lakaz oubyen netway otour zot lakour. Kot zot ava pe rann servis lakominote.

Sa osi i ava kapab ed distrik konn abilite sa bann

dimoun. Zot ava familyariz zot lekor lo bann travay ki espekte de zot, konn teren e konnen kote bann risk lo nivo distrik i kapab ete. E sa i ava ed distrik ek Lotorite konsernen dan preparasyon e rediksyon risk ek dezas dan distrik.

Mr Speaker, sa i ava osi ede kit sa group pli vivan e aktiv. E i a fer zot reste pli angaze dan distrik parey mon'n dir e annan sa bon *bonding* ansanm koman en lekip. Zot ava organiz zot byen. Kot i ava annan sa *team leader* ki solid, ki kapab pran bann bon linisyativ. Non pa en dimoun ki pa *reliable* ki ler ou pe rod li i pa la oubyen zis ki kontinyen donn ou leskiz.

Mr Speaker, fodre note ki ler brigad ti komanse i ti lo en baz volonter. Apre zot in ganny R500 par lannen. La zot pe ganny R1500 par lannen. Nou ti ava swete ki sa reminerasyon i kapab ganny ogmante pou ankouraz plis partisipasyon. Me pou sa kapab arive, i pou neseser pou sa i ganny aranze kekfwa pou vin lo en baz pli regilye.

E annan en programm kot zot fonksyonn lo en lot lanpler. Zot devret vin pli *proactive*, pli vizilan e pli angaze dan distrik pou aport zot soutyen ver kominate. Mon a sit en legzanp.

Nou ti a swete vwar en group brigad les dir lo nivo rezyon, pe ede en zour Sanmdi pe netway kot Lakour bann Dimoun Aze North East Point.

Nou devret pe kit sa laspe voluntarya e annan en programm pli entansif. E la mon pou dir mon kontan e fyer pou dir group brigad Bel Ombre i annan en *team leader* e zot aktiv e zot pe fer bann travay volonter. E mon felisit zot.

Mr Speaker, letan mon pe al ver mon konklizyon, les mwan dir, sa laspe prevansyon dan travay brigad i devret enn ki ganny pran antet, pou gete ki mannyer nou minimiz dezas ki an retour i ava osi redwir lo depans resours pou repar domaz apre ki in arive.

E en legzersis prevansyon kontinyel a osi kit brigad azour ek lanvironnman distrik. E sa i ava fasil pou zot idantifye landrwa koz danze i kapab arive.

Akoz par leksperyans Mr Speaker, ler danze i arive, si ou byen oriyante ek distrik ler ou ganny en *call*, ou pou konn egzakteman kote dezas in arive e ou pa pou perdi bokou letan pou idantifye kote ou pe ale.

Ou pou'n deza konnen ki mannyer teren i ete. Si transpor i arive. Dan ka en dife, ou pou osi konnen si *fire brigade* i

kapab arive pre ek sa landrwa. Si i annan en *motorable way* ou pou kapab *advise fire brigade* pou pa perdi bokou letan.

Mr Speaker, en lot laspe ki enportan pou bann *brigade* se konnen kote bann *fire hydrant* i ete dan bann distrik pou zot kapab ed *fire brigade* konnen kote pou ponp delo dan ka en dife.

E lo kote lekipman *DA* i bezwen fer *procurement* e bezwen annan *checks and balances* e levanter regilye e lekipman i bezwen byen ganny mentenir. Annou envestir dan lekipman ki dirab e non pa bann ki bon marse e pa dirab ki ou servi enn fwa apre i kase.

*Networking* i osi enportan pou bann brigad. E *why not* etabli en rezo lo nivo rezyon kot en distrik ki ganny afekte i kapab osi ganny *backup* kot en rezyon si kalamite ki ganny okazyonnen i nesesit plis mendev ki brigad distrik i annan. E i enportan ki brigad i ganny byen ankadre e konn byen zot responsabilite.

Mr Speaker, i annan en vye Polisi ki ti ganny drafte an 2012. E la an 2021 i annan en lot. Me Polisi lo papye tousel pa ase pou fer bouze keksoz. Si napa sa volonte pou fer keksoz bouze. E son lenplimantasyon i vreman enportan. Sa ki neseser

se pou refer en lalis lo nivo distrik an konsiltasyon avek dimoun ki enterese. I annan distrik ki'n komans bouze dan sa direksyon e lezot ki ankor an aryer.

Me Mr Speaker, si nou anvi ki en lasenn i for fodre ki tou son maron i zwenn. Swiv bann nouvo kriter pou *recruit*. Etablir ban paramet lo nivo Gouvernman Lokal anba ki brigad pou fonksyonnen. E pli enportan revwar sa reminerasyon ki ganny donnek koman en *incentive* pou ankouraz plis dimoun dan distrik pou partisipe.

Annou donn zot sa lenportans koman en *partner* kle dan nou kominote e annou kontinyen ankadre zot ki an retour zot a sofgard nou kominote.

Mr Speaker, avek sa 2 mo mon soumet sa Mosyon ek Lasanble pou deba e mon demann bann Manm pou donn zot sipor. Mersi Mr Speaker, *I beg to move*.

**(APPLAUSE)**

### **MR SPEAKER**

Mersi Onorab Esparon. Mon a donn laparol prezan segonder Mosyon, Onorab Arissol Phillip.

### **HON PHILLIP ARISSOL**

Mersi Mr Speaker. Bonzour Mr Speaker. bonzour tou koleg Onorab, tou dimoun espesyalman bann zabitan Anse Boileau.

Mr Speaker, mon pou aport mon sipor pou sa Mosyon anmennen par Onorab Esparon, ki pe demann Gouvernman pou revwar striktir Brigad Dirzans dan distrik avek bi fer zot vin pli efektiv.

Dan lepase bokou zabitan in volonterman donn zot kouraz e letan pou zot bann distrik respektif. E lo sa not mon ti a kontan remersi tou bann brigad dan pei, sirtou bann brigad Anse Boileau ki'n donn zot letan pou ed en frer ou en ser dan zot moman difikilte.

Mr Speaker, bokou distrik in pas atraver en kantite dezas naturel tel ki lateras grennen, linondasyon, pye dibwa ki tonm lo lakaz ouswa atraver semen. La sipor e aksyon brigad i tre enportan. Petet menm pou sov lavi bann ki dan danze.

Mon pe demande ki Mosyon Onorab i ganny pran o serye, kot Brigad Dirzans i ganny formasyon dan premye swen. Mon pe menm propoze ki i annan similasyon lo teren pou vwar defayans, kot sa bann brigad a santi zot apre kapab

fer fas avek nenport ki sityasyon ki zot fer fas avek.

Tou brigad i merit ganny kouver anba en lasirans. Sa ti egziste o paravan, mon pa konnen si i ankor le ka la an se moman.

Lo kote lekipman, tou distrik i merit ganny byen ekipe avek zouti neseser ki en Brigad Dirzans i bezwen; tel ki *chainsaw, metal cutter, tors, raincoat, boots, protective gloves, osi first aids kit* e zenerater. Mr Speaker, sa bann zouti i merit dan sa distrik non pa non pa ganny servi dan rezyon.

Pou ki nou kapab kre lentere pou plis zabitan zwenn Brigad Dirzans Mr Speaker, sa allowance R1500 par lannen mon krwar i merit ganny revwar. Sa petet i ava ankouraz plis zabitan pou zwenn brigad. An se moman tou dimoun ki lo *Management Ladministrasyon Distrik*, i otomatikman en manm Brigad Dirzans. E Anse Boileau osi i le ka.

Anse Boileau nou bann brigad i pa zis travay dan bann moman dezas. Zot osi partisip dan travay volonter nou distrik. E Mr Speaker nou tou letan bezwen plis lanmen pou nou kapab ed nou bann frer ek ser ki dan bezwen lasistans.

Alors mon pe fe lapel avek Gouvernman pou konsider Mosyon Onorab Esparon, sa avek bi pou ankouraz plis zabitant pou zwenn brigad. Lo sa not mon pe osi demann zabitant Anse Boileau ki annan lentere pou zwenn brigad, pou pas kot ladministrasyon distrik pou fer bann formalite.

Mr Speaker, mon ti a kontan dir avek tou dimoun, menm ki i annan Brigad Dirzans dan distrik. I devwar nou tou pou gard nou lanvironnman *safe*. Si nou vwar en pye dibwa ki nou konnen ler i pou gran i pou poz danze, annou koup li kan i ankor ptipti.

Annou rod gidans letan pou kas lateras. Nou pa zet salte dan larivyer, ki an retour i kapab blok sirkilasyon delo e koz linondasyon. Tou sa ban aksyon i a evit bann lensidan kot nou vwar nou dan sityasyon difisil e nou bezwen lasistans brigad.

Mr Speaker avek sa 2 mon a dir ou mersi.

### **MR SPEAKER**

Mon ava dir ou mersi Onorab. Mon a donn laparol Onorab Doyace Porice.

### **HON DOYACE PORICE**

Mersi Mr Speaker. Bonzour Mr Speaker, *staff* Lasanble, tou mon bann koleg MNAs e tou dimoun a lekout, bonzour.

Mr Speaker, sa Mosyon anmennen par Onorab Regina, in vin dan en bon moman kot plizyer distrik pe re organiz zot tim brigad. Me, nou pou remersi tou bann tim brigad dan tou distrik, pou zot sipor ki zot in donnen dan distrik. Espesyalman tim brigad Baie Ste Anne Praslin.

Parey nou konnen tim brigad i devret en tim ki vreman solid. Akoz ler i annan nenport ki dezas dan distrik, nou bezwen annan bann fanm ek zonm ki kapab e solid pou fer sa travay.

E nou konn tre byen ki dan lepase in annan bokou ki nou'n vwar dan sa tim ki pa'n serye. Swa zot pa vini, swa zot bann bwarer, swa zot enkapab. E nou vwar lezot travayer dan distrik ki bezwen donn en koudmen. Ouswa DA i bezwen rod larzan pou pey lezot dimoun kot pa ti neseser.

Mr Speaker, apard ki lanmen sa bann zonm ek fanm nou ti a osi revwar zot stati anver lekipman dan *store* distrik, kot i annan napa naryen pou sa bann dimoun servi sirtou ler i annan en dezas.

Mon pou pran en legzanp lo Distrik Baie Ste Anne, kot DA in plizyer fwa demann lekipman pou met dan *store*. Me i pa gannyen. Ki mannyer sa bann travayer pou travay? Ki lankourazman nou pe donnен?

En lot keksoz ankor se sa bann fanm ek zonm i bezwen ganny bann *training* apropriye. E lezot aktivite ki pou kit zot anform ler distrik i apel zot. Fer bann lesanz souvan avek bann lezot lazans konsernen. E osi annan bann manifestasyon tou tim brigad dan tou distrik ki nivo Nasyonal ouswa rezyonal pou kit zot ansanm e konpran ki vedir sa travay brigad. E petet revwar zot pti *allowance* osi Mr Speaker.

Akoz mon dir sa? Se pou angaz sa bann fanm ek zonm dan bann lezot programm distrik anver travay voluntarya. Kot bann pti proze dan distrik sirtou kot napa larzan pou fer - swa pou ganny zot dan *weekend* ouswa dan lasemenn. Kot bann ki pa travay ouswa bann ki fer *shift*. Me bann ki annan letan pou donnен.

Me en keksoz ki mon ti a kontan vvar, se ki nou bezwen get byen ler nou pe revwar sa tim brigad dan distrik. E rod en fason ki pa pou dezapwent personn e en group apepre 10 a 15 zonm ek fanm. Sirtou bann

ki annan konesans dan serten pti metye ki pou fasilit byen travay anver dezas, ouswa nenport pti travay dan distrik.

Dan plas ki Ladministrate Distrik i bezwen kas latet pou rod en pti kontrakter bon marse pou ed li atraver bann pti travay byen fasil. Alor i zis kriy enn ou de sa bann fanm ek zonm pou ede. Ki pa pou kout li en gran keksoz.

Mr Speaker, sa Minister konsernen, fodre i pran sa byen serye e donn sipor ladministrasyon distrik anver lekipman, *training* e osi bann lesanz parey mon'n mansyonnen boner. Pour ki sa travay brigad dan distrik i deroul byen. E tou zabitan distrik i a kapab konn byen e satisfe louvraz ki sa tim brigad i fer.

E osi anmenn en nouveau lanpler dan distrik. E pou mwan koman en Manm Lasanble mon ti a kontan vvar sa tim brigad vin pli efektiv. En tim pli for e pli avan gard dan distrik.

Avek sa 2 mo Mr Speaker, mon pou anmenn tou mon sipor pou sa Mosyon mersi.

### **MR SPEAKER**

(Off-Mic)

### **HON MICHEL ROUCOU**

Mersi Mr Speaker. Bonzour *a tout*. En bonzour spesyal pou zabitan Mont Fleuri.

Mr Speaker, sa Mosyon ki anmennen par Onorab Esparon i vreman enportan, akoz pli ale dan bann distrik nou vwar poudir dimoun in perdi lentere dan tousala. Dimoun nepli vin devan. Ou kapab ofer tou sa ki ou anvi, dimoun pa vini pou vin pran par dan okenn keksoz ki ou fer.

Selman Mr Speaker, zour en keksoz i arive, ou tann zot pe konplent, ou tann zot pe mantoun. E nou, nou pe demande ki *Local Gouvernement* i rod en fason pou nou atir Seselwa. Ki mannyer nou pou ganny Seselwa pou zot partisipe, pou zot zwenn bann lekip parey brigad dan distrik, Mr Speaker?

Mon mazinen poudir dan lepase parey nou'n ganny dir se ki i ti donn zis R500, ki ti donn tou le Desanm. Be ek letan keksoz in evolye, tou keksoz in monte. E dimoun li menm li laplipar dimoun konmela i annan dimoun ki pe fer de louvraz, zot napa letan pou zot kapab vini pou vin partisip dan bann keksoz koumsa.

Be selman Mr Speaker, konman Manm Elekte pou distrik Mont Fleuri, ki dernyen fwa nou menm nou, nou ti

ganny tape avek sa dezas kot nou ti vwar lateras ti grennen dan plizyer sou distrik. Dan Corgate Estate ti annan sa delo monte, kot nou ti vwar poudir se ki bann vwazen zot menm zot ti groupe, pou zot kapab sey sekirite zot bann keksoz ki zot annan.

Mwan, mon krwar poudir se ki an menm tan ki nou, nou pe debat lo sa Mosyon i enportan pou nou dir avek Lepep Seselwa, se ki nou tou nou bezwen vin devan akoz keksoz ki pa ankor ariv kot ou demen i pou arive. Avek sanzman klima ki pe arive deor e nenport ler demen ou vwar pye dibwa nek i tonbe i fer kek dezas i kraz lakaz.

E mwan mon krwar poudir se ki *Local Government* nou bezwen vin en pti pe aktiv, eksplik dimoun ki vreman responsabilite en brigad. Akoz ki nou bezwen en brigad dan distrik li menm li. Akoz nenport ler sa ki nou vwar i ariv kot lezot i kapab ariv kot nou, Mr Speaker.

E an menm tan mon oule dir mersi osi bann ki pare, ki ennler zot donn zot letan pou zot vin devan. Dan mon distrik mon'n vwar enn de zot, parey mon kapab nonmen. Anler tanzantan Kan Tobrouk nou annan bann pye dibwa ki tonm

lo semen ki blok semen. Nou annan Mr Antoine Henry ki en pti kontrakter. I pa demann okenn larzan, zis li menm li i monte i ale i *clear* semen, Mr Speaker.

Bann keksoz koumsa ki nou bezwen dan distrik. E i annan osi bann dimoun ki'n la pou sitan bokou letan ki zot in donn zot letan nenport ler, aswar, lizour ki ler ou *call* zot - parey mon pou mazinen Ms Marianna dan distrik ki in la pou bokou letan lo brigad. E i ankor *still* la, be li pe donn son letan nenport ki ler i bann dimoun ki ou kapab kontakte.

Mon mazin Nella ki i en nouveau manm lo brigad, ki i montre sa lentere ki li i annan. E problemankor ki ou rankontre se ki i annan bann manm ki nou vini ozordi, nou ranpli en form, nou dakor pou nou vin donn sa servis. Me selman zour i arriv en dezas ou pran kontak avek zot, zot telefonni i tennyen ou pa ganny zot.

E i en responsabilite serye ki ou'n pran akoz Lotorite Distrik i bezwen ou pou ou vini. Ouswa Mr Speaker, ki *Local Government* i kapab fer? Nou kapab get li par rezyon si nou vwar poudir lo kote distrik menm petet i pa marse. Akoz ek letan la parey mon pe dir,

dimoun nepli enterese pou zot vin devan e vwar ou parler ou menm ou, ou bezwen monte pou sey demann bann dimoun dan distrik ou ti ava voudre vin lo serten Komite pou vini pou partisipe pou zot donn koudmen?

E mwan mon krwar poudir sa Mosyon Mr Speaker, i vreman enportan. E lo kote sa R1500 ki donn tou le lafen lannen, petet dan bann diskisyon ki vini gete si nou pa kapab revwar petet fer li vin tou le lafen dimwan.

Akoz brigad i annan bann serten travay ki zot fer dan distrik. Zot fer dan distrik tou le mwan. I annan en kalandriye aktivite ki zot, zot fer la ki zot partisip ladan. Petet sa i a kapab ankouraz bann dimoun la deor, pou zot kapab vin devan e pou zot kapab donn en koudmen.

Mr Speaker, mwan mon pou donn mon sipor sa Mosyon ki Onorab Espanon in anmennen. Akoz mon vwar son lenportans la deor. Akoz nenport ki ler nou pa konnen avek sanzman klima osi tou. E levidans i la, Corgate Estate ki ti pase, kot bann lakour lateras grennen, kot nou bezwen nou bann dimoun dan kominote pou nou groupe pou nou donn en koudmen. Mersi.

**MR SPEAKER**

Mersi Onorab. Mon a pas laparol avek Onorab Rosie Bistoquet.

**HON ROSIE BISTOQUET.**

Mersi Mr Speaker. Bonzour Mr Speaker. Bonzour tou bann Onorab e tou bann ki pe ekoute.

Mr Speaker, mwan mon pou siport sa Mosyon ki Onorab Esparon in anmennen. Akoz mon santi poudir nou kontribisyon ki nou pou anmennen ozordi, i ava pe ede pou kapab anmenn en pe plis standar dan sa sityasyon kot nou trouve i annan brigad dan distrik, dan tou distrik.

Prezan letan nou pe dir zot par egzant zot bann *first respondent*, zot sipoze pe dil avek bann kriz ou dezas dan distrik, sa ki le bi mazer. E ler mon dir dezas savedir tou kalite dezas. Dife. Par egzant nou konnen poudir isi Sesel nou pa'n ganny eparnye, toultan i annan dife swa dan lakaz, swa dan boursay. So, sa osi i en problem.

*Flooding*, e mon pou pran legzant, par egzant Point Larue, ler lapli i tonbe, lanmer i mont nou ganny sa *flooding* e lekol osi i annan sa problem kot delo i monte; dan lakaz i monte, dan laboutik i monte.

Apre osi i annan problem kot nou semen osi, nou annan en kantite aksidan ki i arive kot nou ganny bann viktim ki swa zot ganny en aksidan zot dan sityasyon grav osi. E an plis ki sa i annan serten bagar dan bann distrik ki nou trouve i egziste, kot nou konnen petet lapolis i pa pe kapab arive, sa osi i en fason ki nou pe dir i en dezas.

E an plis ki sa i annan servis evakyasyon, sirtou dan ka aksidan kot nou kapab petet sa tim osi i kapab ede, pou fer sir ki sa dimoun i pa perdi son lavi e an menm tan pou kapab kontrol sityasyon.

Mr Speaker, mon krwar brigad dan distrik i bezwen byen striktire. Mon dakor pou annan sa tim, me selman i bezwen byen striktire, kot i a annan bon kordinasyon. Vedir en sistem kot i annan en standar, en *standard operating procedures*.

Ler nou dir en *standard operating procedures*, savedir bann prosedir ki pou ganny met an plas, ki sak tim ouswa sak endivid i pou konnen ki i pou fer. E par egzant dan ka *flooding*, nou pou fer en lot fason. Dan dife i pou fer en lot fason, dan swen medikal i pou fer en lot fason, dan bagar lo semen i pou fer en lot fason. E

sak sa bann sityasyon i bezwen annan en *standard operating procedure*, ki sak dimoun i bezwen konnen ki i annan pou li fer. Kot tou volonter i konn ki sak volonter pou fer dan sak sa bann sityasyon konman en *first respondent*.

Par egzanp ler i annan aksidan lo semen ki *involve* viktim dan transpor, sak volonter i bezwen konnen ki i pou fer, pou fer sir ki sa viktim pa ganny plis dimal avan ler tim medikal i arive.

E osi sa ki mon pe dir ki an se moman, mon pe propoz osi ki sak tim brigad i ganny enformen baze lo zot pratik. Par egzanp taler mon'n ekout byen ki Mosyon ki'n anmennen. Se ki i annan en kantite dimoun dan nou distrik ki annan diferan *background*. Ler mon dir *background* i annan ki ners, i annan ki sarpantye, i annan ki konn byen konstriksyon.

So, okenn. Sak sa bann dimoun zot bezwen konnen ki zot annan pou fer ler okenn keksoz i arive. Tou tim brigad i devret annan en *training* - mon pou dir pa zis en *training* en fwa me selman en *training* kontinyel ouswa devlopman kot i konsern *first aid*.

Akoz sa mon krwar i keksoz pli esansyel dan lavi kot tou dimoun *at least*. En letan

mon tande poudir *Red Cross* ti pe fer *training*, ki sak lakour pou annan en *first aider*. Me selman osi sak, sa i en moman osi ki *at least* en tim ouswa dimoun ki lo brigad i devret annan en *first aid training* ki ganny renouvre omwen *at least* tou le 3 mwan.

Kot zot bezwen ganny ankadre tre byen pou kapab fer sir ki zot pandan sa bann sityasyon kot i annan dezas zot pou konnen ki pou fer.

Zot devret osi ganny lantrennman konman pou kontrol lafoul sirtou dan bann dezas. Par egzanp ler i annan *flooding*, ki mannyer, kote pou marse, kote pou sorti. Ler i annan aksidan si pou kontrol lafoul. Sa i tre neseser akoz nou konn tre byen Mr Speaker, ki nou kiltir Seselwa ler nou'n tande poudir i annan spekilasyon bonm dan en landrwa tou dimoun i anvi al gete kote sa bonm i ete, si i vre, si pa vre. E mon krwar i tre enportan osi ki brigad osi i ganny sa formasyon ki mannyer pou kontrol lafoul.

Alor i neseser ki i kapab ganny byen sa formasyon, pou li kapab fer sir ki i met kontrol anba tou sityasyon ki i annan. Pou annan bon kordinasyon, fodre annan en sistem komunikasyon kot lekipman i

marse dan sa landrwa. Par egzanp la nou pe dir kot ladministrasyon distrik. Kot lekipman i marse e tou lekipman i annord, ki ler i annan en dezas sak dimoun dan sa tim i konnen ki i pou fer, kan i pou fer, keler i pou fer e kote i pou fer.

Mr Speaker, malgre mon pa pou koz tro bokou, mon pou osi demande avek loter Mosyon letan i *wrap-up*, ki transportasyon osi i devret en konsern pandan dezas pou fer deplwayman sa bann dimoun ki lo sa tim, pou annan plis efikasite. Par egzanp dan laspe kot si par egzanp i annan en landrwa kot sa sityasyon pye dibwa in tonbe, ouswa i annan en aksidan kot i en pe lwen, kot nou konnen lekel ki pe al anmenn lekel, keler i pou al anmenn li, kote pou anmenn li e ki mannyer i pou anmennen li.

Akoz i annan de fwa letan i annan aksidan, nou servi transpor ki nou fer li en pti pe tro vit i pa devret. Me selman sa bann brigad i devret ganny *training*.

En lot lapse Mr Speaker pou fer sir ki tim brigad i reste azour avek laktyalite, se sak fwa i annan en dezas sa tim osi ki'n ganny de plwaye zot devret pe ganny sipor. Fodre i annan

en *debriefing* kot sak manm i kapab donn zot reaksyon dan sa sityasyon ki'n pase avek bann rekomandasyon tanzib, pou ede ki zot kapab fer pli byen avek en pli o standar e osi nou kapab fer sa par rezyon.

Par egzanp si i annan en aksidan ki'n arive ouswa en keksoz ki'n arive, ki nou santi poudir premye fwa i arive ouswa i en pti pe pa tou distrik ki pas atraver. Ouswa menm distrik ki pas atraver, ouswa lapli par distrik ki pas atraver, nou kapab fer en *debriefing* kot lezot tim dan rezyon osi, i kapab vini pou gete ki bann *best practices* zot kapab tire ladan. Ki demen letan i annan en aksidan nou kapab fer sir ki nou pe met sa bann rekomandasyon an aplikasyon.

Avek sa 2 mo Mr Speaker, mon pou siport sa Mosyon. Mersi.

### **MR SPEAKER**

Mersi Onorab. Laparol i prezan pou Onorab Desheila Bastienne.

### **HON DESHEILA BASTIENNE**

Mersi Mr Speaker. Bonzour Mr Speaker. Bonzour tou Manm Onorab e bonzour tou dimoun a lekout.

Mr Speaker, sa Mosyon anmennen par Onorab Espanon

i tre enportan akoz pou mwan i ti'n plis ki ler pou fer sorti lenportans anrezistre pou vin en manm Brigad Dirzans.

Mr Speaker, apre plizyer lannen, nou'n tann koz lo bann group apele Brigad Dirzans dan tou distrik. Dapre konpran sa bann tel group ti ganny formen apre en dezas sounami, kot apre zot in vwar le neseser pou gard sa group pou ede asiste bann distrik respektif, ki vwar li dan detres pandan bann letan kot dezas naturel i tap nenport distrik, tel ki;- deboulir later, ki kre okenn lenkonvenyans, ros deboule, pye dibwa ki tonbe e ankor kre en lenkonvenyans dan semen, dife, i kapab dan en lakaz ou dan en landrwa ki pe koz danze pou zabitan enkli enn de lezot sityasyon ki bezwen zot lasistans.

Mr Speaker, bann manm brigad i sipoze osi pe ede dan lezot distrik vwazen, akoz dapre konpran zot pe ganny en *allowance* pou sa bann tel travay. Isi dan Lasanble mon ankor rapel lannen pase annan Onorab ki ti tous lo peyman *allowance* e ti osi demande pou ogmant sa *allowance* e regarde si i posib pou pey *allowance* tou le 3 mwan dan plas tou-le-z-an.

Mr Speaker, mon konsern i, eski Brigad Dirzans i la zis pou espere letan i annan en

dezas pou sorti e al lo teren? Ouswa i annan lezot aktivite ki zot kapab angaz zot ladan tel ki serten travay volonter kot zot ganny demande pou partisipe?

Ler nou koz travay volonter, i kapab lo kote koup pye dibwa ki an danze dan en fason ou en lot. Netwayaz dan bann touf lapay ki soutir aktivite ilegal, kot i kapab osi vin en danze pou enn nou zanfan sa distrik, ki kapab ganny abize. Ouswa menm en manman, en manm fanmir, en papa, ki kapab pe ganny atake apre ki zot pe al kot lakour apre travay.

Ankor, manm brigad i kapab organize pou fer travay zeneral, tel ki ede penn kot lekol, netway otour lanvironnman lekol pou zot, pou nou prop zanfan. Penn bann staircase e gard bann landrwa atiran e zoli.

Mr Speaker, eski pandan sa letan kot nou pa pe fer fas avek okenn dezas, ki manm brigad pa bouze. M ler in arive ler peye, tou manm i vin devan e *claim* zot peyman. Mon pe rekomande ki dan sa novo striktir, i enportan ki tousala i ganny get ladan.

Mr Speaker, mon santi ki anba sa novo striktir ki pe ganny propoze, i enportan ki i osi annan en liv prezans e ki

fodre osi annan en *team leader* tre aktiv, serye e responsab. Ki li i sipoze fer rapor lo nenport ki aktivite tel ki;- pran prezans, ler ki ti konmanse e osi keler ki ti fini.

Ozordi Mr Speaker fason travay i dezord. Sa ki le vini i vini letan zot ganny apele. Sa ki pa oule vini i pa vini. E zot annan toultan menm leskiz. Wi i osi enportan ki annan de fwa kot en aktivite detann i organize. Nou pa la pou servi brigad zis pou travay, zis pou vin deboul ros, zis pou vin fer lezot travay.

I osi enportan ki annan zour zot groupe e zot kapab fer en pti aktivite detann. Me nou bezwen pran kont ki sa travay ki zot in vin anrezistre, zot in vin zot menm volonteer zot bezwen osi pran li o serye.

Mr Speaker, mwan mon pou remersye tou bann manm brigad dan distrik Perseverance ki pran zot responsabilite tre serye, zot onor zot langazman e zot fer zot prezans konte letan zot ganny apele.

Mon pou osi remersye Onorab Esparon pou anmenn en tel Mosyon si enportan kot nou ava arive vvar en tim brigad aktiv e responsab. Nou pa zis met nou non la, nou zis esper sa pti *allowance* zis pou nou kapab ganny en pti keksoz

par kote. Nou bezwen onor nou langazman.

Avek sa 2 mo Mr Speaker mon pou siport sa Mosyon. Mersi.

### **(APPLAUSE)**

#### **MR SPEAKER**

Mersi Onorab. Laparol pou Onorab Sandy Arissol.

#### **HON SANDY ARISSOL**

Mersi Mr Speaker. Bonzour ankor enn fwa tou dimoun ki pe ekoute.

Mr Speaker, mon krwar letan nou pe koz lo sa Mosyon nou bezwen osi pran kont poudir nou pe viv avek dimoun e dimoun souvandfwa nou difisil e dimoun souvandfwa i kalkil son lekor. E ozordi nou annan en sityasyon dan nou pei kot - e nou konman bann *MNA* nou vvar sa toulezour - kot ozordi letan ou annan en frer Seselwa lo lili malad lopital, souvandfwa ou pa vvar son ser oubyen son frer vini pou vin vizit li, donn li en ver delo, vin gete si i ok.

Me sa ki nou konmans adopte Sesel se ki letan ou'n mor, ou ser ki *L'Angleterre, Australie, Canada* i dir avek fanmir pa fer lanterman konmela, esper mwan mon pe desann, apre nou ava anter nou

frer, nou papa, oubyen nou manman.

Me selman i pa dir avek dokter ek ners, mon pe desann mon a vin okip mon frer ek mon ser. Mon a vin donn li en ver delo, mon a vin donn li en ben. Non. Seselwa ozordi i sorti lwen pou li vin anter en manm son fanmir.

Mon konmans koumsa parske sa kiltir ede dan distrik i annan en pe letan in fini. E souvandfwa parey nou dir ozordi Sesel i annan en pti group dimoun, bann Seselwa ki nou viv -bef dan disab, sakenn i vey son lizye. E nou bezwen aksepte sa, nou bezwen rekonnet i annan dan nou distrik, i annan dan pei. E nou viv avek toulezour.

Me par kont mon konmans koumsa, parske mon osi anvi montre lapresyasyon pou bann dimoun ki vin devan souvandfwa letan pou ede dan nou distrik.

So, mon ti ava kontan alor montre lapresyasyon pou mon group brigad dan distrik Bel Ombre. Nou annan en group talante, nou annan en group ki aktiv. Nou annan en group ki souvandfwa zot zwenn, pou plizer travay lo nivo distrik. E sa lekip i ganny dirize par Didier Hernandez ki responsab nou lekip brigad.

Letan mon'n tann koz lo brigad par lezot Manm, zot in dir poudir i annan en bann i vini en bann pa vini. Ler ou *call* zot, zot telefonn i tennyen. Bel Ombre nou ti gannyen nou osi lo konmansman. Pandan sa dernyen 2an ler nou *call* ou pa anmas ou telefonn, ler nou dir ou vini ou pa vini.

I senp nou pran en desizyon e nou tir ou lo nou group. Nou met en lot ki enterese. Parske napa letan pou tay deryer bann gran dimoun. Brigad ou pa pou en manrmay lakres ziska primer sa, ou pran bann zom ek bann fanm ki responsab ki anvi vin devan, ki anvi vin donn en koudmen. Savedir napa letan pou rode kot ou ete, akoz ou pa pe reponn, ki ou problem ozordi, non.

Mr Speaker, brigad ti ganny etabli avek bi pou fer serten travay lo nivo distrik, ki nou tou nou ti *happy* avek. E sa letan zot ti fer li volonter, se pou sa rezon ladministrasyon sa letan ti agree pou donn zot en pti *allowance* avek en bi lankourazman pou sa bann dimoun.

E nou pa blyie poudir pa tou dimoun ki ti kontan pou vin devan pou fer okenn louvraz volonter. Napa dimoun ki fer

louvraz volonter ozordi. Napa pa egziste sa, napa.

Souvandfwa letan i vini i dir ek ou volonteer, apre ler i pe ale i dir ek ou be gete si ou vwar en pti keksoz met dan mon lanmen. I pa volonteer, in vin ede avek bi pou li ganny en keksoz. E nou tim brigad zot pa bann dimoun spesyal zot, zot osi zot bann imen zot osi zot bann papa, zot bann manman ki'n kit zot lakour zisteman pou vin donn en koudmen lo nivo nasyonal, rezyonal e osi lo nivo distrik.

Letan nou pe, parey nou servi sa term '*pisse autour du pot*' in regards zot *allowance* la. Mon krwar in ler pou nou Lasamble vin fran lo la. Ti 500 in mont 1500, ti pey tou-le-z-an la pe dir pey tou le 3 mwan. Napa *allowance* dan pei ki pey tou-le-z-an. Napa pa egziste sa. Si sa group dimoun pou ganny en *allowance* ozordi, i pou bezwen en *allowance* ki ganny peye tou le mwan, parey nenport ki *allowance* dan pei i ganny peye tou le mwan.

Napa sa zafer nou a negosye pou vin 3 mwan, nou a negosye pou vin 6 mwan, nou a negosye i ava vin 1an. *Allowance* dan pei i tou le mwan. E mon konnen anba *Local Government* i annan osi *Animateurs Scheme* ki pe

ankouraz bann *teachers*, bann dimoun ki annan bann lentere pou vin devan avek nou zanfan dan vakans, pou fer sertern aktivite. Zot apel sa *Animateur Scheme* e sa R3000.

Alors si R3000 pou *Animateurs Scheme*, be alor annou anmenn li an konformite avek tou bann *scheme* ki annan anba *Local Government*, fer pou brigad osi mont R3000. E fer li tou le mwan. Parske mwan mon konnen poudir Bel Ombre Didier avek son lekip zot annan en program travay preski tou le de semenn, tou le 3 semenn e parfwa dan en mwan zot fer plizyer travay.

Mon krwar sa i bann striktir, i bann fason fer ki Onorab Regina pe rode atraver son Mosyon, pou ki nou angaz nou bann brigad, nou donn zot plis kalifikasyon, nou donn zot en pe plis *training*. Nou *beef up*, nou montre sa lenportans ki zot annan pou sa travay ki zot pe fer lo nivo distrik.

Fodre pa nou bann brigad i vin parey mon ti pe dir yer pou travayer *PUC*. Ler delo i koule dan distrik, dimoun i *call* ou i dir ek ou, *MNA* mon'n *call* detrwa fwa i pa pou vini la, fodre 4er i sonnen. Apre 4er ki zot vin aranz delo zot. Sa i en move konotasyon ki i annan lo *PUC*.

Fodre sa osi i sorti sa. Ler ou *call PUC* parey CEO ti pe dir ek nou yer, pou ki nou bann resours pa zis ganny ale dan vid be sa travay i ganny fer.

Alor brigad, fodre pa brigad i kontinyen vin sa group dimoun ki lontan nou ti apel zot non bann bwarer sa, bann detrwa dimoun sou taler zot vin ede, non! Fodre pa nou kontinyen avek sa. Brigad i bezwen ganny en novo souf, brigad i bezwen ganny en novo non, brigad i bezwen ganny son respe parmi sa pti group anba *Local Government*.

Brigad i bezwen ganny son respe anba sa pti group ki tonm anba ladministrasyon distrik e ki pe fer en travay lo nivo distrik.

Parey mon'n dir pa tou dimoun ki kontan vin devan. Me ler ou annan sa pti group fanm ek zomn dan distrik Bel Ombre ki'n vin devan, nou bezwen fer sir nou donn zot tou sipor neseser, finansman an term bann lekipman ki zot servi e osi sa ki enportan se *training*.

Ki kalite *training* nou donn sa annan dimoun? Sa bann dimoun zot sipoze la pou zot *dil* avek en dezas si i annan dan distrik, en *major* deza parey Michel, Onorab Roucou in koz lo la an relasyon avek Mont

Fleuri. Ou annan bann dezas ki ou pa pou espekte i arive.

E letan nou pe koz lo dezas tou kou nou bezwen pran kont poudir letan gro lapli i tonbe Desanm tou dimoun i kontan lapli i tonbe. I dir ek ou tanto mon pou dormi byen ozordi, lapli pe tonm for.

Me ler tou dimoun pe ris son tapi ziska anba son likou kot son manton, *MNA, DA* avek brigad pe get deor si son *boots* in pare, kote son tors i ete pou li. Parske i pe espekte poudir nenport ki moman atraver ladministrasyon distrik, i pou ganny en *phone call* taler poudir i annan tel danze, lateras in tonbe, pye dibwa in blok semen pou nou kapab mobilize. Vin ansanm konman en lekip pou rode ki mannyer nou *dil* avek sa bann sityasyon, pou ki nou dimoun zot santi zot an sekirite pou ki sa travay i ganny fer.

Alor nou bann zomn ek fanm, zot bezwen osi sa moman *training* kot zot kapab, par egzanp Bel Ombre mon konnen Didier in konmans sa avek *firemen*, avek *SFRSA* pou ki bann dimoun dan brigad, bann zomn ek fanm zot konnen ki mannyer pou servi en *fire extinguisher* par egzanp; ki mannyer ou de *lock* li, ki mannyer ou ouver li. Ki mannyer ou servi li, ki zistans

ou debout avek dife e an menm tan pe mazin osi ou proteksyon konman sa dimoun ki pe ede.

*Training* an relasyon avek ki mannyer ou servi bann lekipman danzere. Par egzanp en *chainsaw*. Zis akoz mon en manm brigad alor mon kapab zis vini *start* en *chainsaw* e konmans fer en travay avek. Non, sa osi i bann *training* ki nou bann dimoun i bezwen parske sa i osi bann lekipman ki zot servi lo nivo distrik, an ka i ariv en evantyalite kot zot pou bezwen deblok semen par egzanp, pou ki larout i vin pli kler.

Me zot bezwen osi *training* lo *first aid*. An relasyon avek si zanmen enn zot koleg dan pe ede dan sa dezas ki i annan dan distrik, i ariv en evantyalite avek li, kot en lot son koleg i kapab donn en pti koudmen ziska lasistans i arive, pou ki son frer i dan bon lanmen ziskan lasistans i arive pou li kapab ganny le swen neseser.

Bann brigad zot bezwen konnen par egzanp kot bann *fire hydrant* i ete dan distrik. Si zanmen zot in ariv atan e nou pe *clear* semen pou *fire brigade* monte, *SFRSA* pase pou ki konnen deza kote i konekte.

Lo bann blok flat ki nou annan dan distrik. Dan bann semen segonder, lo bann semen

primer. Mon krwar tousala i bann *training* dan sa striktir ki Onorab Regina pe rode, pou ki nou tim brigad zot ganny sa formasyon neseser e avek sa reminerasyon neseser pou zot kontinyen fer sa travay ki zot pe fer lo nivo distrik Mr Speaker.

E mwan mon krwar poudir ozordi parey Onorab Michel Roucou in dir lo son konmansman, letan i ti pe fer son lentervansyon, i annan en pe retisan pou dimoun vin devan. Parske dimoun toulstan zot in ganny sa lenpresyon poudir sant kominoter i pou en pti group dimoun, "ladministrasyon distrik i pou en pti group dimoun sa, ki mon pou al rode laba ?"

Mon rapel Saint Louis ler ou fer *meeting* dan sant personn pa vini. Si ou fer anba pye mang bouse semen, gard mele. Parske dimoun toulstan in kit sa dan son lespri poudir sant kominoter i pou en pti group dimoun e i napa nanryen pou fer avek ladministrasyon distrik li.

Be non, be la nou pe fer en lapel ozordi. Ladministrasyon distrik i pou tou dimoun dan distrik. Vin devan, vin rode ki mannyer ou kapab kontribye, i nepli sa zafer pou Sandy ek son dalon. Non!

Sant kominoter ozordi dan distrik i bezwen retourn pou kominote. Pa pou en pti groupman relizyon, pa pou en pti groupman politik, pa pou en pti groupman endividé, me i retourn pou kominote.

Alor letan mon pe koz lo Mosyon Onorab Regina Esparon, mon pe lans en lapel avek bann dimoun ki pe ekout nou dan tou distrik, vin devan, donn en sipor, rode ki mannyer ou kapab angaz ou dan ede pou asiste pou ede dan ou distrik, pou fer ki nou distrik i bouze.

Par egzanp letan mon'n koz lo *Animateurs Scheme* ki tonm anba *Local Government*, zis parey striktir brigad i tonm anba *Local Government*, i annan diferan sa bann *scheme* ozordi dan distrik pou ou ki ti a kontan vin devan pou ede pou asiste, pou bouz distrik pli devan. E tousala i annan en pti *allowance* ki vin avek sa.

Alor mwan mon pe demande la Mr Speaker, atraver sa Mosyon anmennen par Onorab Esparon ki *Local Government* avek tou bann remaniman zot Bidze, pou nou donn lenportans nou bann brigad, revwar zot *allowance* e fer sir ki bann *allowance* i aret peye tou-le-z-an.

Parske travay i ganny fer toulezour lo nivo distrik. Ki sa

bann *allowance, training* e striktir pou nou bann brigad i ganny gete en pe pli o serye lo en pe pli onivo e ki tou zot reminerasyon i ganny dan menm kad parey tou dimoun i ganny pou li tou le mwan. E pou ki zot osi zot kapab ganny pou zot tou le mwan. E osi zot ava kapab pran tou sa ki pou zot parey mon kontan dir Mr Speaker.

Alor mon ti ava kontan dir avek Onorab Esparon, *full* sipor lo kote Bel Ombre. E mon ti ava kontan fini par felisit DA avek Didier, avek lekip brigad ki pe fer en bon travay lo novo distrik. E nou pou toultan pare pou asiste nou rezyon parey nou'n fer avek lo nivo Glacis.

E la zisteman nou pou annan en netwayaz zeneral ki nou le fer obor Lekol Beau Vallon. Parske par deryer lakres Beau Vallon Mr Speaker, lakres avek *daycare* an montan Lekol Beau Vallon Segonder nou annan en zoli touf la ki bwaze. I en propriete Gouvernman, ki reste sal, ki reste sa. E nou annan bann endividé ki vin la. E nou zanfan i servi sa larout zisteman pou antre dan lekol segonder e dan lekol primer.

*So, nou anvi fer en zoli netwayaz ansanm avek led prizonnyen, militer si posib. E alor nou pe demann tou bann*

dimoun ki reste dan sa rezyon, zabitan Bel Ombre pou nou kapab pran kontak avek ladministrasyon distrik pou nou gete ki mannyer nou osi nou donn en pti koudmen pou debwaz nou distrik.

Pou fer ki distrik Bel Ombre i reste sa distrik ki fleri. E nou tenir nou moto ki annan pou fer avek lor, *gold*, ki tou dimoun pe rode e pou nou i la Bel Ombre. Mersi bokou Mr Speaker.

### **MR SPEAKER**

Mersi Onorab Arissol. Laparol i pou Onorab Kelly Samynadin.

### **HON KELLY SAMYNADIN**

Mersi Mr Speaker. Bonzour tou dimoun a lekout ensi ki mon bann koleg Onorab. Mr Speaker avan mon komanse mon ti ava kontan remersye Onorab Esparon pou anmenn sa Mosyon ki mon santi i vreman enportan e i *long overdue*.

Mr Speaker, bann Brigad Dirzans in ganny mandate pou garanti letablisman e kontrol prevansyon dan bann ka dirzans dan nou bann, dan nou lanvironnman imedya, ki distrik li menm. Ensi ki son bann diferan risk. An plis ki sa bann brigad i merit pe fonksyonn dapre serten eleman

kle ki pou kapab permet zot delivre zot rol dan en fason pli efikas.

Premyerman i annan pou fer avek prevansyon, kot letan en dezas potansyel i alarman, nou bann Brigad Dirzans i devret annan kapasite pou deploy zot servi ansanm avek bann lezot lazans konsernen avek bi pou evit gravite bann lensidan ki kapab koze.

Dezyenmman, i annan sa lape proteksyon; proteksyon sitwayen ensi ki bann assets kont bann menas ek danze potansyel dan en fason ki permet nou bann lentere, aspirasyon ek fason viv pou prospere.

Trwazyenmman Mr Speaker, nou osi bezwen pran kont sa laspe rediksyon lenpak bann fitir dezas pou ki a lafen bann konsekans, tel ki pert lavi avek propriete i ganny redwir oubyen evite.

Katriyenmman, en lot laspe entegral ki nou bezwen pran kont, se *response* oubyen reaksyon. Parfwa lafason ki tim brigad i reazir pa neseserman avek lirzans. E par konsekan lavi, propriete e lanvironnman li menm pa ganny sa latansyon ki i merite.

Ki fer ki bann bezwen imen debaz dan bann lensidan

katastrofik i sibir bann reperkisyon vreman grav.

Finalman Mr Speaker, dernyen laspe esansyel ki bezwen ganny pran kont se *recovery* oubyen rekiperasyon. Sa i merit ganny fer dan en fason koeran. Dan en dele letan ki'n ganny byen planifye pou permet ranforsman e renovasyon bann lenfrastriktir tel ki lakaz, semen eksatera.

Osi byen ki permet reetablisman lasante, sosyal, kiltirel, istorik, laspe lanvironmantal nou bann kominate ki'n ganny afekte dan bann dezas, sityasyon katastrofik, ensi ki dan bann lezot lensidan dirzans ki ganny rapporte.

Mr Speaker, mon santi ki sa bann diferan pwen ki mon'n mansyonnen i merit ganny seryezman pran kont. Akoz dan bokou lenstans nou bann tim brigad pa ekipe avek sa bann bezwen ki neseser ler zot al lo teren.

Bokou manm brigad pa abil avek servis *first aid* parey Onorab Arissol i fek mansyonnen pli boner. E parfwa zot pa vreman pran bann sityasyon dirzans avek lenportans ki merite.

E se pour sa rezon ki nou pa kapab evite bann gravite, bann ka ki ganny rapporte akoz

zot mank seren lenformasyon neseser.

Me par kont Mr Speaker, mon ti ava kontan felisit tou bann tim brigad atraver Sesel, ki dedye zot letan pou travay dan zot bann distrik respektif akoz lanmour ki zot annan pou zot distrik.

En remersiman spesyal i al pou tim brigad Au Cap, ki travay sanses a sak fwa ki i annan en sityasyon dirzans dan distrik espesyalman Mr Prudence, Jenny ek Lucy. Kot zot pa vin devan zis ler i annan sityasyon dirzans. Me osi a sak fwa ki annan seren travay kominoter pou fer dan distrik.

Mersi bokou pou zot korperasyon ek sipor kontinyel. E mon priye ki Bondye i kontinyen beni zot avek plis lasante ek lafors, pou zot kontinyen delivre. Akoz san zot nou distrik i tonbe.

Mr Speaker, parey mon bann lezot koleg in mansyonnen, lekipman e materyo i touzour en gro problemm. Akoz i anpes bann manm brigad pou delivre.

Parey in ganny rekomande, bann manm brigad i annan en resanz spesyal ki zot devret pe mete, a sak fwa ki zot bezwen entervenir dan bann ka dirzans. Me malerezman an se moman tim brigad Au Cap pa

ekipe avek sa, ensi ki lezot materyo neseser pou zot kapab travay.

Mon pe demann avek Minister Gouvernman Lokal pou rewwar sa sirtou an-term Bidze ki ganny atribye anver sa group dimoun tre esansyel. Mon santi osi ki bann lazans konsernen i merit travay pli konzwentman e pli o serye avek nou bann tim brigad. Tel ki *DRMD*, servis lasante, kot parfwa zot osi zot bann mezir entervansyon pa an akordans avek lirzans bann ka ki ganny rapporte.

Pou konklir Mr Speaker, mon ti a kontan remersye nou bann Ladministrater Distrik espesyalman *DA Au Cap Ms Sabrina Assary* pou son bann *management skills* tre o nivo, kot lamenezman lirzans dan distrik i konsernen, pou asire ki sa tim brigad serye ki deryer li i kapab delivre dan en fason efikas e alaoter.

Akoz parey nou tou nou konnen *Au Cap* i en distrik ki pa ganny ditou eparnye kot dezas i konsernen sirtou pandan movetan kot nou vwar delo i monte, lakaz ek semen i ganny inonde ensidswit.

Mon pe osi lans en lapel pou bann dimoun dan distrik pou vin devan e vin anmenn zot sipor ver zot distrik, menm si

zot pa zwenn nou tim brigad me sirtou letan i annan bann sityasyon dirzans pou vin devan e vin ed nou bann frer ek ser dan nou distrik. Akoz nou pa zanmen konnen kan ki maler pou tap nou laport. E nou osi nou pou bezwen led dirzans.

Annou fer retournen sa lespri volontarya e annou demonstre sa lespri fraternite ki vreman enportan dan lepanouisman e rekiperasyon nou bann kominote.

Avek sa Mr Speaker, mon pe anmenn mon sipor pou sa Mosyon. Mersi.

**(APPLAUSE)**

### **MR SPEAKER**

Mersi Onorab. Mon annan ankor 4 Manm ki'n demann laparol alor nou ava pran poz la e nou ava reoran 11er. Mersi.

**(BREAK)**

### **MR SPEAKER**

Nou reoran deba lo Mosyon. E laparol i pou Onorab Andy Labonte.

### **HON ANDY LABONTE**

Mersi Mr Speaker. Bonzour Mr Speaker. Bonzour tou Manm koleg Onorab. Bonzour tou dimoun ki a lekout. En bonzour spesyal tou bann zabitan La

Rivière Anglaise, ensi byen ki tou bann manm Brigadye English River.

Mr Speaker, i enportan ki nou rekonnet e dir mersi Bondye Papa ki'n kree lesyel, later. Tou sa ki Bondye in kree i bon. E nou bezwen rekonnet osi ki dan lavi i annan botan e i osi annan movetan. Me malgre sa, nou bezwen apresye. Nou bezwen apresye ki i annan zour soley i tape, e i annan zour ki lapli osi pou tonbe, e i pou annan serten dezas. E tousala nou bezwen pare pou nou fer fas avek sa bann tel evantyalite.

Alor sa Mosyon ki'n anmennen par Onorab Regina Esparon, i en Mosyon ki mon pou siporte prensipalman, akoz koman en endividé ki angaze avek mon kominote e mon distrik an zeneral. Mon rekonnet ki i annan bokou zabitan ki donn zot letan, malgre ki parey nou'n dir i annan en pti *allowance* ki zot resevwar.

E la ankor enn fwa mon pou rekonnet. Nou pou rekonnet e remersi Gouvernman aktyel, ki oparavan sa bann zabitan ki form parti sa lekip brigad, zot ti pe resevwar selman R500. E apre serten konsiderasyon ki nou bann Manm lo kote *LDS* nou ti anmennen dan Lasanble,

pou demann Gouvernman pou revwar. E nou Gouvernman in revwar e ozordi zot pe resevwar zot R1500 par lannen.

Parey Onorab Sandy Arissol in dir, ki i ti a osi petet bon ki Gouvernman i pran konsiderasyon; re get ladan, revwar. Me petet dan plas toule-z-an, donn zot tou le mwan. Me byensir avek serten rekomandasyon ki striktir li menm li, i ganny revwar e byen striktire.

Me mon pou osi rekonnet ki ankor enn fwa, nou Gouvernman in fer bokou. In fer bokou pandan sa pti peryod letan ki'n la. Loter Mosyon in fer sorti ki in annan en revizyon, wi. Mon annan sa dokiman dan mon lanmen la *actually*. I annan en *District Emergency Brigade Guideline* ki ti ganny pibliye an Oktob 2021, ki ladan annefe - annefe i *sort of*, dan diferan seksyon, i dir responsabilite ki sa bann endividé i annan.

I donn en pe bann striktir, bann gidans lo kwa ki nou ekspekte avek bann endividé, bann brigadye parey nou dir, ki desid. Bann dimoun brigad ki deside pou zot antre dan kominote pou ede dan bann peryod letan ki annan evantyalite.

E mon bezwen osi rekonnet ki lo kote distrik, nou menm nou La Rivière Anglaise, mon pa ti pou fer zistis si mon pa ti koz lo sa Mosyon. Pou la senp rezon, Mr Speaker, akoz la parey bann dimoun ki vin dan mon lespri se, Ms Mary Morel ki'n lo sa Komite Brigad pou kantite lannen. I annan Ms Kathleen Juliette, i annan Mr Eric Rath, i annan Mrs Marie-Paule Marie, i annan menm Mr Michael Muara, ki i osi lo sa Komite.

Pou plizyer lannen zot in ete, zot in donn zot letan, e devosyon pou ede dan bann letan difikilte, dezas dan distrik.

E parey nou *Chief Whip*, Onorab Arissol in fer sorti, ki ler serten endividé pe dormi, pe repoze - parey ozordi nou vwar poudir i annan en pe lapli deor - me zot, zot toulstan mazinen poudir, zot la lapli pe komans tonbe, nou pa konnen kwa ki nou pe ekspekte. Si divan i for, petet dibwa i tonbe. Ou konnen, zot toulstan la.

E la mon osi rekonnet ki i annan bann nouvo manm, bann nouvo dimoun ki zwenn, ki ankor pe kontinyen zwenn. E nou bezwen rekonnet. Parey i annan Marvin Len Sophola, i annan Ms Flory Rosette, i bann nouvo dimoun ki'n zwenn sa

Komite Brigad pou distrik. E la mon ti a voudre, mon ti a voudre si oule, lans en lapel - lans en lapel osi avek bann biznes - bann biznes dan lo kote distrik. Ou konnen, zot benefisyé bokou avek - atraver distrik si oule, bann facilite e i en fason kot zot kapab ede.

Akoz souvandfwa ler nou vwar poudir sa bann dimoun ki lo brigad i pe ede. Zot bezwen serten pti keksoz, petet parey en *juice*, delo, ki toulstan nou vwar i selman sorti dan kof Gouvernman. Petet la nou kapab ankouraz serten biznes pou zot osi fer serten kontribisyón.

I zis parey Sanmdi le 25, mon ti zwenn ansanm avek Caritas, avek SACOS, ki nou ti fer en lazournen kot nou ti, pou letan Karenm. Kot nou ti al penn kot *Home Elderly*, malgré ki SBC ti swazir pou li pa donn lenportans, vreman, Komite Brigad ki ti ede, ki ti la osi *involved*. Me nou ti la.

Alor i montre ou poudir sa bann brigad li menm li i fer bokou. I fer bokou, pa selman dan letan kot i annan en dezas, me dan plizyer lezot aktivite.

Akoz lo kote La Rivière Anglaise nou menm nou, mon pou dir nou annan en programm ki vreman sarze pandan lannen, si oule. Nou fer

programm kot letan ki napa bann dezas, nou ale nou ede lo kominote. Me byensir i annan bokou mankman. I annan bokou mankman.

E sa Mosyon i pe donn serten valer, si oule, rekonesan pou nou dir avek Gouvernman *look*, annou rode ki mannyer nou kapab rekonnet zefor ki sa bann endividé i mete dan bann tel aktivite.

E nou kapab zwenn zot pou ed zot delivre en pli bon servis, si oule. Akoz i en servis zot pe donn kominote malgre i annan en pti *allowance* ki zot pe gannyen. E la parey bokou in ganny dir, lo kote lekipman. Petet lo kote *uniform*, lo kote zouti li menm li, pou kapab fer fas avek bann tel evantyalite.

E la pou retourne *back* ankor lo sa *District Emergency Brigade Guideline* ki'n ganny sorti. Si ou pou get li, li menm li. I en *guideline* ki'n ganny byen striktire par nou Gouvernman aktyel ki i donn bann detay. I donn bann detay an zeneral lo ki zot responsabilite, ki zot rol. E an kolaborasyon menm avek *DRND*, ki nou kapab fer travay ki dan lentere distrik li menm.

E la i fer mon mazin ler, ankor enn fwa bann brigad ti ed nou pou nou kapab netway en *sit*, en *dark spot* si oule, kot *Thompson Lane* anler English

River, kot bann aktivite antisosyal pe deroule. E la osi ankor nou rann en lapel avek kominote, pou ler nou vwar sa bann endividé i vini pe donn en koudmen. E nou ki la dan zalantour - ou connaissent par ler nou zis debout. Nou debout nou gete *as if* ki nou pa *form* parti sa kominote.

E avek bann tel lespri, nou ankouraz bann lezot endividé pou *form* parti e pou vwar vre valer e rezondet pou *form* parti Brigad Irzans distrik.

So, retourne *back* lo sa Mosyon li menm li, Mr Speaker, rezon ki mwan mon pou donn mon sipor, mon pou donn mon sipor, akoz parey mon'n dir se ki sa Mosyon pe met en pe plis lanfaz lo son striktir li menm li, ki mannyer nou pou striktir brigad distrik. E donn zot plis valer.

E nou bezwen rekonnet osi ki, ler ki en endividé i deside pou li antre dan en brigad, i annan menm en let ki ankor enn fwa i ganny met an plas, kot zot sinyen. Ki vedir i en langazman. I en langazman, e ankor enn fwa mon pou felisit mon lekip brigad La Rivière Anglaise ki pe fer en travay vreman ekselan, e eksepsyonnal. E mon pou dir zot kontinyen lo sa bon laliny

ki, nou kapab ansam ede pou fer nou distrik avans pli devan.

Mr Speaker, avek sa 2 mo, mon pou donn mon sipor sa Mosyon ki'n anmennen par Onorab Regina Espanon. Ki nou a kapab pli byen striktir nou brigad lo nivo distrik. Mersi Mr Speaker.

### **MR SPEAKER**

Mersi Onorab. Laparol i prezan pou Onorab Phillip Monthy.

### **HON PHILLIP MONTHY**

Mersi Mr Speaker. Mosyon anmennen par Onorab Espanon i enn ki tre enportan Mr Speaker. Me mon vwar li en pe drol mon pa'n vwar okenn Manm lo lot kote latab lev zot lanmen, akoz mwan personnelman depi ki mon'n swazir sa semen politisyen ...

### **HON EGBERT AGLAE**

(Off-Mic)

### **MR SPEAKER**

Onorab Aglae, wi?

### **HON PHILLIP MONTHY**

(Off-Mic)

Sansib en?

### **MR SPEAKER**

47? Wi re kontinyen.

### **HON EGBERT AGLAE**

49.

### **MR SPEAKER**

Yes. Ale, kontinyen mon a ekoute.

### **HON EGBERT AGLAE**

E mon pou met anba ou latansyon osi 61(d), *misapprehension* ki Onorab Phillip Monthy in dir. Met li okouran poudir mon lanmen in leve lo kote US. Mersi.

### **MR SPEAKER**

Wi, Onorab. Anfen, mon krwar i en kestyon banal. Onorab Monthy in ...

### **HON PHILLIP MONTHY**

*Ok* Mr Speaker, Mersi. Mon vwar li i drol ki mon'n vwar zis en lanmen lo lot kote latab ki'n leve.

*(laughter)*

### **MR SPEAKER**

Zis kontinyen avek ou *speech* Onorab.

### **HON PHILLIP MONTHY**

Akoz depi ki mon'n vin dan politik Mr Speaker, sak fwa ki meteo i anonse ki i annan en alert movetan e a sak fwa ki i annan gro lapli, ni mwan ni mon *DA* nou pa frankil, *ok?* E nou pas lo letan espere, gete, si

personn pa pe *call* nou pou raport en dezas. Sa i montre ki kantite konsernen nou konsernen avek byennet nou distrik.

Mosyon pe demande pou revwar striktir Brigad Dirzans dan bann distrik, avek bi fer zot vin pli efektiv. Mr Speaker, ler ou pou annan ou en brigad ki efektiv, sa i ava ede pou ki *DA* e *MNA* i santi zot pli reasire. Akoz nou pou konnen ki i annan sa tim solid e devoue ki apel Brigad Dirzans, pou ede fer fas avek sa bann sityasyon dezas.

Mr Speaker, ler mon get *District Emergency Brigade Guideline* 2021, mon vwar en striktir pou Brigad Dirzans. E rol avek responsabilite sakenn i tre byen detaye ladan dan sa *guidelines*. Dan sa dokiman, manda e lobzektif Brigad Dirzans dan distrik i kler e osi byen defini. Rol ek responsabilite *team leader* ek zot lezot manm i kler.

Konpozisyon brigad, rol bann *DA* dan bann lenstans kot i annan dezas. E osi zot rol pou ede redwir bann risk dezas dan distrik. Prosedir ki en dimoun i swiv pou vin en manm brigad. *Training* e developman personnel, lasirans e kod kondwit, tou i la dan sa dokiman.

Me Mr Speaker, an dot mo, mon vwar en tre bon striktir an plas.

Defi ki egziste, se ki mannyer nou met an pratik tou sa ki dan sa dokiman, pou fer ki sa lentansyon i vin en fe akonpli.

Premyerman mon santi ki plis zefor par Gouvernman Lokal, atraver ladministrasyon distrik e petet menm osi nou bann *MNA*, i devret ganny fer pou kas sa eleman politik ki'n antour sa striktir pandan tou sa lannen. Ki a fer ki plis zabitan ki annan potansyel, e sa volonte pou vin fer travay pou benefis lezot zabitan e distrik dan bann ka dirzans, a kapab vin devan e ofer zot servis.

Akoz, menm o moman aktyel ki nou pe koze, i *still* annan dimoun ki kapab ede, me zot pe ezite akoz zot *still* pe vwar ki i annan sa eleman politik ki ankor atase avek sa group. So, zefor i devret ganny fer pou sey kas sa, pou ki lezot dimoun ki kapab anmenn serten kontribisyon valab pandan sityasyon dezas, i santi zot kapab vin devan e vin ede.

Mon pe dir sa, Mr Speaker akoz, dan en group 18 dimoun, ler i annan dezas, ou vwar plizoumwen en pti group 5,6,7 ki la. Tou kou menm figir. Cascade i parey. Mon annan

mon pti group ki tre devote. Mon annan Ton Pat avek son tim, zot la. Me ler ou pou get larestan, ou pou get ou lalis, i annan ki rarman ou vwar zot la, ok. Donk, si nou ankouraz lezot dimoun pou vini, mon mazinen ki ler i annan en dezas, olye 5,6 dimoun, nou ava vwar omwen en kenzenn.

*Ok, so i neseser pou seye ankouraz lezot pou vin devan. I annan en nesesite pou ki i annan plis *training* e developman personnel nou bann manm brigad. Tel parey *first aid, fire safety*, e lezot bann tel konpetans ki en nesesite ler ou pe fer fas a bann sityasyon *emergency* e dezas.*

Mon ti a kontan konnen konbyen nou bann manm brigad la ki annan konpetans dan sa bann tel *skills*. Nou devret ankouraz plis volontarya. Sa in ganny fer resorti, pou ede avek bann travay kominoter. Mon group Cascade i deza pe fer, ok. Petet i devret ganny ankouraze pou ki i annan en pe plis.

Tou resaman, zot in netway semen Kalver. Nou konnen la nou dan karenm. Vandredi prosen i annan laprosesyon Cascade, plizyer zabitan dan lezot distrik i vini. E mon tim brigad in ede netway sa semen e sa nou fer li tou le

lannen nou. 2 Sanmdi passe zot in netwaye, e tou bann krwayan Katolik lezot distrik ki pou vin lo Kalver, sa Vandredi Sen, zot pou war zot dan en semen prop. En Kalver ki prop pou zot fer zot laprosesyon. E sa mon remersye mon tim brigad pou sa Mr Speaker.

Plis lekipman pou brigad i en nesesite. Parey Onorab Esparon in fer resorti, Cascade osi ti napa gran lekipman pou brigad ler mwan mon'n antre dan ladministrasyon distrik. Ler mon get sa lalis dan *guidelines* ki sipoze annan lo nivo distrik, ti napa bokou ki ti annan ler mwan, mon'n vin la, Mr Speaker.

Me ptitapti, DA pe fer son mye pou ki nou stok lekipman i amelyore, pou ki brigad i a kapab fer son travay dan en fason pli efektiv e parey i sipoze ete.

I annan lekipman ki distrik i aste anba son Bidze e i annan ki sipoze anba *centralized budget* Gouvernman lokal. Me pa toultan ki demann i ganny akorde. Mon pou pran en senp legzanp parey en *chainsaw*. *Chainsaw* i ganny donnen o nivo rezyon. Mwan, mon santi ki sa sak distrik i devret annan en *chainsaw*.

*Ok, ler i annan en pye dibwa in tonbe Cascade, mon*

pou bezwen *call* Pointe Larue, oubyen Au Cap, oubyen Anse Aux Pins pou mwan al rod en *chainsaw*? So, sa bann keksoz koumsa mon krwar sa bann lekipman i esansyel. Sak distrik i devret annan son stok lekipman. E bann lekipman parey *chainsaw*, sak ladministrasyon distrik i devret annan enn.

E la osi mon pou profite pou lans lapel. Parey Onorab Labonte in fer. Cascade nou annan en kantite biznes dan distrik. *Zone* Providans Endistriyel i tonm tan distrik Cascade. Bann biznes, vin devan annou fer serten kontribisyon lo nivo lekipman, ki ava ede *beef up* nou stok lekipman lo nivo distrik. E ki nou bann brigad i ava annan sa lekipman neseser pou travay avek.

*Networking* e kordinasyon avek lezot lazans pou ki i annan en pli bon fason kordinen, e evite ki i annan konfizyon. E sa a ede retir fristrasyon bann ki'n ganny afekte. Sa osi i annan en nesesite Mr Speaker.

Re nimerasyon nou bann manm brigad. Zot ti ganny R500 tou-le-z-an anba ansyen Gouvernman. Konmela zot ganny R1500. I pa ase. Nou devret vwar ki mannyer sa i devret ganny amelyore. Me

selman, peyman i ganny fer pou bann ki *turn up*, ki ler i annan en dezas. Pa ou pa'n vin ditou ler in annan tel ou tel dezas, be selman a lafen lannen ou ganny peye. Mon konnen i annan en striktir an pals pou sa, me eski sa tou kou i ganny respekte? Ok?

Mon alors santi Mr Speaker, ki si sa dokiman ki egziste i ganny met an pratik, sa regroupman pou vin enn ki pli efektiv, e sa pou ede pou retir presyon lo nou menm nou *MNA*, lo nou bann *DA*, ki tou kou nou la prezan dan bann lenstans dezas.

E lo nou bann zabitan ki vwar zot pe direkteman ganny touse ler i annan en sityasyon dezas. Avek sa detrwa mon, mon pou aport mon sipor pou sa Mosyon Mr Speaker, e mon remersye ou. Mersi.

### **MR SPEAKER**

Mersi Onorab. Mon pas laparol avek Onorab Wavel Woodcock.

### **HON WAVEL WOODCOCK**

Mersi Mr Speaker. Bonzour tou koleg Onorab e tou dimoun a lekout, espesyalman zabitan Grand Anse Praslin. Mr Speaker, maler i kapab ariv nenport ler. Menm ler nou pa pe ekspekte. E nou tou dan nou distrik a en pwen ou en lot,

nou'n fer fas avek plizyer bann sirkonstans, bann sityasyon.

Ennler ase grav, ase alarman, parey inondasyon. En pye dibwa i tonbe, swa lo semen, swa lo en lakaz. Bann sityasyon bato koule, menm bato brile, parey La Digue pa tro bokou letan pase ti arive. Dimoun perdi dan bwa lo bann *trails*, dimoun perdi lo lanmer, dife dan lafore, dife dan lakaz. E annou pa blyie ki a en pwen dan nou listwar, nou'n deza ganny tape avek sounami ki ti fer bokou dega, sirtou lo nou zil pros, lo Praslin avek La Digue.

Mr Speaker, sa Mosyon ki Onorab Regina in anmennen ozordi, i pe demann nou pou revvar striktir Brigad Irzans dan bann distrik. E lannen pase si mon pa tronpe, nou ti ganny demande, bann *MNAs* avek bann *DA*, pou nou travay ansanm, pou nou travay lo en lalis pou nou reviv, relans Brigad Irzans dan nou distrik. I en keksoz ki vreman enportan.

Me parey plizyer bann Manm in fer resorti poudir, i enportan ki sa Brigad Irzans i vin en pti pe pli formel. Pli striktire. E dan zot bann entervansyon, bann Manm in fer resorti, ki i enportan ki sa bann dimoun ki vin devan pou *form* par sa brigad, ki zot ganny

serten formasyon, serten *training* formel.

E sa i kapab ganny antreprann parey Onorab Monthy in koze avan mwan in fer resorti. Par *SFRSA*, *fire brigade*, bann *training* parey dan *fire safety*. E Onorab Bistoquet osi in fer resorti poudir lenportans pou osi sa bann dimoun ki vin devan pou travay avek sa brigad, pou ganny bann serten *training* dan *first aid*, ki enportan dan bann ka kot i annan dimoun ki ganny serten *injury*.

Ouswa menm zot ler zot pe antreprann zot travay lo teren, dan bann bwa, ouswa dan bann sirkonstans kot dezas in arive, petet enn i ganny en *injury* ki bann lezot i kapab pran bann serten swen avek zot. E sa *training* i kapab ganny donne par plizyer dimoun. Par plizyer bann diferan lazans. Menm antite Gouvernman, menm bann lasosyasyon.

La mon pe mazin *Red Cross* osi i kapab ede avek bann *training*, ou *Lasosyasyon Nursing*. E in osi annan en bann ki'n fer resorti lenportans osi pou annan, petet pou sa bann dimoun annan lasirans ki, si parey enn kekfwa in ganny *injury*, in ganny serten domaz ki lasirans i kapab kouver li, pou

kouver son swen lasante, son swen medikal, tou sa.

Parey mon'n dir, pou met sa Brigad Irzans dan en *form* pli formel, ankadre zot en pti pe pli byen ki avan. E i annan Manm osi ki'n tous en pti pe lo bann, donn zot serten bann *incentive*. Nou konnen lepase lafason ki brigad ti marse. Petet pa neseserman nou ti ganny bann dimoun - pa tou dimoun ki ti annan sa konpetans, selman ti zis ganny pran ti ganny met la. Ennler ti en pti pe politicize osi, ki nou bezwen tir sa politik ladan.

Zot ti ganny selman R500 par lannen. E la sa in ogmante, kot sa bann zofisyé, nou bann dimoun ki travay avek brigad ozordi pe ganny R1500 par lannen, ki nou santi e parey enn de bann entervenan ki'n koze avan in fer sorti ki i pa ase. Ki petet nou merit reviz sa.

I annan plizer propozisyon ki'n ganny fer resorti. I annan ki dir poudir petet bann brigad, sak fwa zot ganny apele pou en dezas, pou vin ede dan en sityasyon dezas, ki ler zot sorti, ler zot ganny apele, ki zot ganny *allowance*.

I posib ki i annan distrik ki zot pa pou napa okenn dezas pandan lannen. I posib ki pou annan en pti pe plis ki detrwa fwa ki pou annan bann

sityasyon dezas, i annan sa propozisyon parey mon'n dir ki sak fwa zot ganny apele, pou vin rann en servis, pou vin ede zot ganny en *allowance*. E i annan ki'n osi propoze ki petet i merit ganny en *monthly allowance*. En pti larzan tou le mwan, dan plas ki ou ganny zis sa R1500 *at the end of the year*.

Mr Speaker, nou konnen dan lepase poudir Gouvernman presedan ti seye organize o nivo distrik pou annan sa bann brigad. E ti annan plizer distrik. Mon rapel Onorab Lemiel en fwa ti fer resorti dan Lasamble kot ti annan bann lekipman ki ti'n ganny donne dan plizer bann distrik. Pyos, lapel, gran kouto, prela, *chainsaw* e lezot keksoz ankor. E i malere ki bokou sa bann keksoz dan lepase i ti ganny touse, ti ganny vole, in perdi, in dispartet.

E petet parey Onorab Monthy menm, avan mwan ler in koze, in dir e mon krwar ki tou Manm pou agree avek mon, irrelevan ki kote ou sorti. Petet i pou enportan dan tou distrik ki nou re komans sa legzersis, re stoke, re annan serten bann... Parey mon dir, bann lekipman neseser, priyorer. Parey mon'n dir, pyos, lapel, gran kouto, *chainsaw*, e menm bann goni petet pou ranpli

disab. Petet ler i annan bann sityasyon inondasyon dan distrik. E met li *under lock and key*. Anmas li byen. E fer sir petet sa lakle i reste avek DA ouswa OM, pou fer sir ki personn pa ganny akse avek sa store ki nou pa ganny sa sityasyon parey lepase kot lekipman in ganny vole.

E en lot propozisyon ki mon anvi fer Mr Speaker. Ler nou pe fer sa lalis brigad - annefe sa ki nou'n fer nou de Grand Anse Praslin. Mon avek DA, Mr Michael Jean-Louis, ler nou'n diskite, nou ti dir, ou konnen i enportan pou nou pa rod zis mendev. Zis bann dimoun pou vin donn en koudmen. Me i enportan pou nou rod bann dimoun osi ki annan en pe lekipman.

Sirtou bann *heavy equipment*, bann *heavy machinery*. Ler mon pe koz ou bann *heavy equipment*, *machinery*, mon pe koz ou parey, petet lo sa brigad ou rod enn de dimoun, petet ki annan en *excavator*. Enn i annan, *I don't know*, en *caterpillar*, lot i annan *chainsaw*, enn i annan en *ponja*.

E menm bann ki annan bato osi, Mr Speaker. Parey dan bann sirkonstans i kapab arive en bato i savire dan laroul pandan letan vandswet, petet

nou bezwen en dimoun pou ale pou al anmas sa bann dimoun. Ou pa pou ganny letan esper *coast guard* ouswa *fire brigade*, ouswa lapolis.

So, i enportan pou nou rod bann dimoun ki annan serten lekipman ki kapab donn en koudmen ler sa bann dezas i arive. Parey mon dir, ler en ros in tonbe, en pye dibwa in tonbe. I enportan annan *chainsaw*, i enportan annan *ponja* pou ou kas sa bann ros.

E, i en *bonus - i en bonus* ler nou annan bann dimoun ki annan serten lekipman. Parey lo kote distrik kot nou, nou annan bann dimoun ki *form* par nou brigad ki annan bann lekipman, ki a nenport ler, ler nou kriy lo zot, zot pare pou vin devan pou donn en koudmen.

La i anmenn mon osi lo kote en *challenge* pou nou lo kote Praslin, La Digue osi. Mon vwar Onorab Uranie fek lev son lanmen, i pe al koze apre. Nou'n annan bann sityasyon dan lepase kot bann kliyan, bann touris in perdi lo bann *trail*. In ariv La Digue, in ariv Praslin, in ariv *Chez Raymond* e enn de bann lezot landrwa.

E nou'n vwar bann dimoun ki'n vin devan, bann volonter ki'n vin devan. Parey en konparezon, Alex Simon i enn bann dimoun ki'n vin

devan, ler pou rod bann dimoun ki'n perdi, ki'n servi son prop *drone*.

E atraver sa lasistans ki in donnen nou'n nobou kapab trouv kliyan ki'n perdi. E sa i bann fason ki parey mon'n dir, enportan pou nou bann dimoun osi ki annan serten lekipman, ki kapab donn serten sipor, serten soutyen.

An parlan lo *drone* Mr Speaker, en defayans ki mon'n vvar, ki mon santi i mank nou. Petet sa i pa pou o nivo distrik. Akoz son kou pou annan enn sa bann kalite *drone*, mon pe koz ou sa *PRO SAR*, bann *professional search and rescue drones*, son kou i ase leve. Mon krwar enn i kapab kout environ R350mil. I bann *drone* ki menm gro lapli, gro divan. I kapab anvol aswar, i annan *night vision*, kot petet ler bann kliyan in perdi, akoz i annan ou bezwen esper lizour. Aswar ou pe rode e i difisil pou ou vvar en dimoun ki'n perdi lo en *trail*.

Me petet annan enn sa bann *drone*, kekfwa *SFRSA* i kapab mazin lo la, pou annan plis ki enn sa bann *drones*. Sa bann *professional search and rescue drones* ki kapab anvol aswar pou rod bann dimoun ki'n perdi lo *trail* aswar. E sa en keksoz ki kekfwa nou kapab konsidere en pe. Kekfwa en pe

eleve kou pou annan sa dan nivo distrik.

Me selman o nivo bann baz *SFRSA*, *fire brigade*, nou kapab annan enn sa *professional drones* pou nou fer sa bann *search and rescue*. I kapab servi nou lanmen, i kapab servi dan lafore, partou kot petet en kliyan, e menm petet en Seselwa in perdi lo *trail*. In deza arive kot Seselwa in perdi lo *trail*.

E Mr Speaker, mon pa pou kapab konklir mon entervansyon san remersye enn de bann dimoun dan distrik ki'n toulstan ede sirtou dan bann letan dezas e menm parfwa bann sipor ki zot donnen. Menm bann servis volonter ki zot donnen pou ede dan distrik. E *on top of my head* la mon mazin detrwa sa bann dimoun. E i annan zot ki *form* parti nou brigad.

I annan Jackson, Roberto, Leeroy, Alex Simon, ki mon fek mansyonn li, Stephen Etheve osi ki tanzantan i ed nou avek son *excavator*. E mon remersye zot pou sa koudmen ki zot donnen.

Parey mon'n dir Mr Speaker, pa zis ler i annan bann dezas, me ler i annan bann travay voluntarya pou fer osi zot la pou vin donn en koudmen. E parey enn de

Manm in dir, sa brigad non selman i kapab ede dan bann letan dezas, me ler i annan bann serten volonter enportan pou ganny fer. Parey lo nou kote nou ti ganny louvraz ... Mr Etheve ti ed nou pou *clear* sa *site* o bor bazar Grand Anse, e menm *site* Amitie ki ti pe vin en nwizans, kot in ganny netwaye, met byen prop.

E nou apresye sa bann dimoun ki vin devan pou donn en koudmen. Me petet parey mon'n dir, sa pti *incentive* ki enn de bann Manm pe propoze pou donnen, i kapab, i zis en siny rekonesans e en lankourazman pou zot. Menm si i pa gran keksoz, me selman i enportan pou nou rekonneta zot zefor ler i annan bann sityasyon dezas dan nou distrik.

E an konklizyon, Mr Speaker, mon pou osi fer lapel avek bann lezot dimoun dan nou distrik ki anvi vin devan. Zot kapab pran kontak avek DA, ouswa mon menm. Ki annan sa lanvi, ki anvi vin devan pou ede, pou form par sa brigad. I pa zanmen tro tar pou zot vin devan, pou met zot non, akoz nou tou nou anvi nou distrik, dan bann letan, dan bann sirkonstans kot maler i arrive.

E i enportan, i byen ler nou vin ansanm nou tou, nou donn en sipor, en soutyen en frer ou en ser ki pe pas dan maler. Avek sa 2 mo Mr Speaker, mon pou siport sa Mosyon. Mon krwar enn ki bon. Mon pou donn mon sipor. Mersi bokou.

### **MR SPEAKER**

Mersi Onorab. Laparol prosennman pou Onorab Waven William.

### **HON WAVEN WILLIAM**

Mersi Mr Speaker. Bonzour tou dimoun ki a lekout. Mr Speaker, mon pou aport mon sipor pou sa Mosyon. Mr Speaker, mon remersi Bondye ki mon ganny sa loportinite pou kapab koze isi dan sa Lasamble. E an menm tan pou sansibiliz nou popilasyon la deor avek realite.

Mr Speaker, sa Mosyon i annan son merit. E letan nou pe koz lo sanzman e transformasyon, definitivman sa Mosyon i pran son plas. Akoz nou toulstan bezwen pe rode ki fason nou kapab fer pli byen dan tou keksoz ki nou fer. So, mon mazinen ki loter Mosyon letan in prepare pou li anmenn sa Mosyon, in bezwen fer son resers pou vvar realite.

So, Mr Speaker, 2 mo enportan dan sa Mosyon, se revwar, an menm tan i pe met lanfaz lo lefikasite pou lavenir. Mr Speaker, i annan sa 2 mo adaptasyon avek mitigasyon ki'n ganny servi en kantite fwa lo lasenn enternasyonal. An menm tan, zot met lanfaz osi lo ki pei li menm li pe fer vizavi bann aksyon an term ogmant son rezilyans, an menm tan son kapasite pou li kapab dil avek bann sityasyon nasyonal. So, mon vvar poudir sa Mosyon pe anvi adres sa bann size parey.

Mr Speaker, i annan en ta keksoz ki'n ganny dir, mon pa pou al dan bann repetisyon. Me, mon krwar letan nou pe bouz lavenir, sa size i enportan ki tou dimoun - pa zis Gouvernman - tou dimoun i angaze pou nou kapab adres sityasyon.

Mr Speaker, definitivman tousala i konsern dimoun endividé, e leta moral, leta fizik bann dimoun. Mr Speaker, volontarya, tou dimoun ti a kontan ki i pran en lanpler. Me Mr Speaker, letan dimoun pa byen, ouswa i malad, dimoun pa pou vin devan, pa pou reazir. E dimoun i bezwen ganny simile, dimoun i bezwen ganny ankouraze e enflisanse pou vin devan.

Mr Speaker, definitivman wi, sa *allowance* R1500 par an, ki fer R125 par mwan, mon krwar i pa *fair* e mon krwar i en lenzistis ki merit ganny korize. E mon santi poudir, letan nou pe fer sa bann diskisyon isi dan sa Lasanble, i ava osi ankouraz Gouvernman avek tou son bann lazans, mon mazinen bann NGOs osi tou, dan sa *partnership* pou nou kapab adres sa size Brigad Dirzans dan distrik.

Mr Speaker, wi i annan sa nesesite pou annan en pli meyer lankadreman dan distrik, e an menm tan en lankadreman ki annan sa laspe soutenabilite avek li. E a sa pwen la mon ti a kontan remersi tou bann manm Brigad Dirzans distrik Grand Anse Mahe ki aktiv, e ki pe donn zot letan, letan lezot pe dormi. E mon konnen poudir en bann ki letan i annan bann moman dezas, zot pas zot letan aswar kot ladministrasyon distrik pou kapab fer sir zot kapab reazir.

Mr Speaker, pou bouz devan, mon krwar i enportan ki Lotorite i angaz avek tou bann akter pou vvar ki meyer fason nou kapab met sa bann lekip en pti pe pli, mon kapab dir, ankourazan e motive pou zot kapab delivre o nivo distrik.

Mr Speaker, mon santi osi pou dir sa laspe ledikasyon ozordi i tre enportan. I pa zis avek bann adilt, me mon santi poudir o nivo lekol i enportan ki sa bann diskisyon osi i ganny fer. Akoz se zanfan ki pou ankouraz osi, bann adilt pou fer bann keksoz ki petet bann adilt, zot pa pe ... En pti pe inyoran lo kwa ki zot pe fer, me zanfan i kapab *remind* zot.

Mr Speaker, lo kote resours. I vre ki ozordi lo nivo resours i annan sa mankman. Me Mr Speaker, mon santi poudir nou kapab fer pli byen. Nou kapab fer pli byen dan le sans ki, enn ;- eski letan nou get nivo gaspiyaz. La nou pe koz an term larzan. Eski petet pa ti neseser ozordi konsider anploy bann dimoun o nivo distrik? Akoz, si mon pou koz lo mon distrik Grand Anse Mahe, mon santi poudir i annan en ta keksoz ki kapab ganny fer. Ki kapab ganny fer e ki sa bann dimoun i kapab ganny anploye.

Sirtou letan nou pe koz, Mr Speaker, mitilasyon avek adaptasyon. I annan en ta keksoz ki ozordi, ki kontrakter petet pa pe fer. Me si ou annan en tim prezan la, ki ganny anploye, kapab reponn lapel pou kapab, enn;- nou annan bann pye dibwa danzere. Nou annan bann lateras ki demann

rebwazman. I annan bann larivyer osi kot ozordi in vin en *dumping ground*, kot dimoun pe zet salte. Bann ki anler pa pe sibir sa lefe, be bann ki anba pe sibir sa lefe.

Me si ou annan en group ki aktiv, i annan en programm, mon pa trouv rezon akoz ki nou pa kapab anploy zot *full time* dan sa revizyon, Mr Speaker. E sa i bann propozisyon ki mon pe met devan.

E an menm tan nou pe koz lo bann Sekter Prive ouswa kontrakter, Mr Speaker. Mr Speaker, nou bezwen osi *être* onnet ki i annan bann kontrakter ki vreman volonter, pare pou vin devan. Me i annan ki par rezon ki zot pe ganny afekte dan serten fason, ouswa zot santi poudir, be petet zot pa pe ganny regarde. Zot pa ganny ankouraze pou vin devan.

E mon anvi met devan ki, si i annan bann kontrakter, si nou kapab donn zot bann *incentive*. Zot pa pe demann en saler, me kwa ki nou kapab asiste zot pandan lannen, si zot vreman pe vin devan pe ede?

Mr Speaker, parski nou toultan dir, napa keksoz ki pou naryen. Akoz letan sa dimoun pe vin devan avek swa son *excavator*, son isi, son laba, me i annan en *wear and tear*, i annan en depans adisyonnal ki

i pe fer. So, ki i osi ti kapab benefisyé lo serten keksoz. Mon pa konnen si konsesyon i enn. Me selman si i pe servi *fuel*. Me kot nou kapab rekonpanse osi a lavenir.

Wi, Mr Speaker, mon santi poudir *training, training* i en eleman tre enportan. E la mon santi Mr Speaker ki sa eleman kordinasyon ant bann lazans, avek Brigad Dirzans dan distrik, i annan sa nesesite pou nou rewwar, akoz *training* pou sorti kot zot.

E an menm tan Mr Speaker, i annan en bann dimoun ki ganny peye pou fer serten travay dan sa pei, dan diferan lazans, ki zot pe ganny bann gro, gro lapey. Me selman zot pa pe vreman delivre. E preznan ki ou ekspekte avek bann Brigad Dirzans o nivo distrik ki pe ganny R125 par mwan? Mr Speaker, sa i pa motivasyon ditou.

Mr Speaker, an menm tan nou bezwen regard lo sa zafer *disaster risk and management*. Mr Speaker, letan ou fer en kout letour dan distrik, i annan en ta keksoz ki, si vreman pep ek Lotorite, atraver *partnership*, nou ti kapab minimiz en bon pe sa bann dezas. Potansyel dezas, Mr Speaker, mon pe koz lo la. So, mon santi poudir osi lontan nou kapab minimiz sa bann

risk. E Brigad Dirzans o nivo lokal, mon santi zot ganny anploye a plen tan, annan en programm, mon pa trouv okenn rezon akoz ki nou pa kapab anploy zot.

Mr Speaker, si nou kapab al rod konsiltan deor, pey zot bann gro, gro sonm larzan, akoz ki isi lokal nou annan en bon pe konsiltan lokal. E mwan mon santi poudir bann Brigad Dirzans, zot kapab fer en louvraz vreman fantastik o nivo distrik, si zot ganny sa lankourazman Mr Speaker.

Mr Speaker, Fon Dezas. Lontan ti annan en Fon Dezas dan distrik, me sa in ale, e pou plizyer rezon. Petet sa osi nou ti devret petet regarde, pou kapab enn, tonm parmi bann resours ki Lotorite Distrik i kapab servi.

Mr Speaker, finalman, letan mon pe regard *SDG Goal 13*, kot i pe koz lo ranforsi rezilyans avek kapasite, mon santi poudir sa Mosyon pe viz en pti pe osi anver sa. E mon pou donn mon *full* sipor. Me an menm tan, mon demande ki apre sa Mosyon, i pa zis vin en zafer kot Lasable in koze, me napa swivi.

Sa Mr Speaker, i enn *weakness* ki nou annan. Mon pa konnen ki fason nou pou bouz devan avek sa, me mon santi poudir i en *weakness*.

Nou pas en ta Mosyon. Me epi, sa swivi - sa swivi i manke e nou pou bezwen rod en modalite ki fason nou kapab fer sa swivi, pou fer sir ki keksoz i bouz devan. E nou pa zis pe koze, me i annan aksyon ki swivre par deryer.

Mr Speaker, avek sa 2 mo, mon pou dir avek Onorab ki mon pou donn li *full* sipor anver sa Mosyon. Mersi.

### **MR SPEAKER**

Mersi Onorab. Laparol pou Onorab Egbert Aglae.

### **HON EGBERT AGLAE**

Mersi Mr Speaker. Bonzour tou Manm Onorab e tou dimoun a lekout. Mr Speaker, Mosyon ki la devan nou pe tret en size ki tous tou distrik. Sirtou tou ladministrasyon distrik ki an egzistans. E i koz lo en group dimoun, en group volonter, ki zot annan en travay. Laplipar zot, zot annan en lanplwa, me ki zot donn zot letan pou ki ler i annan okenn evantyalite ki arive lo nivo distrik, ouswa lo nivo rezyon, ouswa lo nivo nasyonal, pou vin donn en koudmen.

E mwan, mon pou komanse par remersi tou sa bann ki'n *form* par, bann dimoun ki'n *form* par lekip Brigad Dirzans, dan tou distrik,

ki enkli Port Glaud. I annan bokou ki'n pase, i annan osi ki'n kit nou, ki'n ale; pou sa travay ki zot in fer, pou sa bann led e soutyen ki zot in aport dan bann distrik, dan bann moman difisil ki swa distrik, ouswa pei in pas atraver. E nou rekonneta, akoz en kantite travay in ganny fer.

E la mon mazin Mrs Jeanette Marie, ki ankor la, ki mon, mon ti zwenn li letan mon ti vin Administrater Distrik. Ki ti en fanm for, en fanm solid. Ki ti pare pou fer tou. Grenpe, monte desann. E osi mon remersi Mr Philoe, Francois Philoe. Li osi ki'n enn bann *team leader*, ki pe fer travay fantastik. E la nou annan en zenn, Rivence Horter, ki pe *take the lead* koman tim brigad, *team leader*. E tou sa nou remersi zot tou akoz si zot ti napa en leker pou vin en volonter, zot pa ti pou fer sa travay.

E Mr Speaker, nou osi konstate poudir sa travay striktir Brigad Dirzans dan bann distrik, in en striktir ki'n evolye e i merit kontinyen evolye pou li kapab *meet* demann dizour, fas a bann legzizans. Sirtou atraver bann nouveau regilasyon, e Lalwa ki ganny gide e i dekoule atraver lazans. E nou pa kapab koz lo Brigad

Dirzans san fer referans avek ladministrasyon distrik, *Local Government*, avek bann lezot antite ki bann *responders* dan bann letan dirzans. E nou bezwen fer byen sa bann analiz.

E osi nou bezwen konpran, ki kalite *emergency* ki Brigad Dirzans i ganny afilye avek. Akoz pa tou *emergency* ki Brigad Dirzans i bezwen lo *forefront*, akoz i annan bann lezot *responders* lazans.

Par egzanp, ou pa kapab asosye Brigad Dirzans avek en aksidan, petet motoris lo semen ki'n arive, akoz sa i annan son lazans, Lapolis, lanbilans ki pou vini, ki pou *form* par sa.

I annan bann dezas ki kapab arive ki *involve* bann lezot nivo. Parey ti annan en dezas ki, parey kemikal, bann keksoz koumsa, Brigad Dirzans pa mandate pou al fer sa. Sa i annan bann lezot lazans ki bezwen ganny, pe kordinen, ki antre lo la.

E sa i anmenn mwan lo en keksoz enportan, akoz nou bezwen mazinen koman en Lasamble, lannen pase, *DRMD* ti annan son *Bill* ki ti pase. E anba son *National Integrated Management Emergency Plan*, i fer referans avek bann volonter ki tonm anba dirzans. So, i annan en lankadreman legal ki egziste ozordi, ki fer ki i ava

annan lankadreman voluntarya kot Brigad Dirzans i tonm anba la.

Prezan kestyon se, eski ... Loter Mosyon i bezwen fer referans ek sa, eski sa departman i pe fer sa travay pou anmenn sa ki sa Mosyon pe demande la? Akoz li tousel, ladministrasyon distrik, an vi ki i annan en kad legal ki egziste ozordi, i pa pou kapab zis pran en group voluntary, met anba parasol ladministrasyon distrik, san fer referans avek sa ki gid okenn evantyalite dirzans ki arive dan pei. Nou bezwen fer sa kler.

Lot pwen mon krwar ki enportan se, Brigad Dirzans dan son legzistans Mr Speaker. Bann dimoun ki'n voluntarya tou-le-z-an, *ok*, i annan en prosesis renouvreman parey en kontra, pou gete si ou ankor anvi partisipe. E sa i ganny fer *by* Desanm, kot ladministrasyon distrik, sa i rol DA, ouswa sa *office manager*, i ava vini, i ava pran non sa bann dimoun.

I bezwen koz ek zot dan en dernyen *meeting final*, pou vvar lekel ki ankor *onboard*, pou vvar lekel ki pa aktiv, e lekel ki pe kite osi. E la i ava soumet son lalis pli tar, boner Zanvye, pou anvoy kot Sekretarya *Local Government*

pou dir, be vwala mon bann dimoun ki'n *committed*.

So, si i annan okenn distrik ki vwar ler in antre poudir i napa en Brigad Dirzans, i verdir poudir i annan serten travay ki sa *DA* ti devret pe fer, ouswa ki pa'n soumet, pou vwar si sa bann dimoun i la. Akoz sa bann dimoun, ou bezwen anvoy ou *ID card* e ou menm konmela i fer ou tir portre paspor, e ou bezwen siny ou dokiman tou. Sa, i egziste.

E pou mwan sa i - i annan serten Manm in fer serten largiman ki pou mwan i pa neseserman fonde, akoz sa bann prosedir i la pou egziste, e si pa ganny swiv, nou pa kapab blanm tord atraver sa. Sa i kler.

Lot eleman kot i konsern lekipman, i osi i parey. Levanter i ganny fer 2 fwa dan en lannen pou vwar bann lekipman. Akoz mwan pou mon leksperyans pou mwan, sak distrik e Port Glaud ti koumsa, i annan en *store* ki apel *store* brigad. E levanter bann lekipman, depi *safety equipment*, depi bann lekipman ki zot bezwen, bann *basic* pou fer travay dan letan dezas, i la.

E osi mon rapel a detrwa repriz, ti annan finansman anba *Local Government* e osi atraver *Environmental Relief Trust Fund*, kot bann distrik ti

soumet bann proze mitigasyon ki brigad ti kapab fer. E la ti annan en larzan ki ti ganny donnen pour bann distrik ki'n soumet son proze e la lekipman ti aste pou met dan *store* brigad, depi son *chainsaw*, depi son ...

Byensir, lekipman pa dir pou lavi diran li. I annan en *lifespan* sa bann lekipman. Ou pou bezwen regilyerman pe ranplas serten lekipman ki ou'n servi, akoz i annan *wear and tear* dan sa bann keksoz mekanik. I pou kase.

E la Mr Speaker, i osi en responsabilite si, sa ki zer ladministrasyon pou vwar ki son lekipman i annord e azour, pou ki ler i deklans okenn evantyalite dezas, keksoz *is geared up and ready*.

En lot laspe ki mon anvi touse lo la Mr Speaker se, letan nou koz lo Brigad Dirzans, san ... E met li an konteks avek *DRMD*, i fer ki ou pou bezwen annan bann lezot konponan. E se sa ki Mosyon pa pe adresse pou mwan. I pa pe adres sa. I adres en striktir. Striktir i bezwen kler. E striktir pou kapab kler e sa ki mon pou dir la i vin avek son bout resours i osi. Si napa resours ladan, ou pa pou kapab met en striktir efektiv an plas.

Donn *allowance*, en pti *allowance* ki pe donnен. I volonter li, ou pa kapab fer li vin en saler. I en *allowance*. I pa ase, i pa pou ase. Me selman, pou kapab met li efektiv, striktir resours i enportan. Mon dir sa akoz, Mr Speaker?

Brigad Dirzans li menm li i pa ekipe avek tou lekipman ki i ti a voudre e pa fasil pou ekipe li avek tou lekipman. Ou pou donn li zis bann *basic*. Be ou pou bezwen bann *support structure* ki egziste dan distrik.

E enn bann eleman ki ti dan sa *guidelines*, se ki tou distrik i revwar en *support structure*, avek ki bann resours ki ou annan dan distrik ki kapab ed ou, siport ou, dan travay, pou lamenazman okenn dezas? Sa i enkli tou bann pti kontrakter ki annan. Sa ki annan *pickup*, sa ki annan en *JCB*, sa ki koup dibwa i annan *chainsaw*, sa ki annan - ozordi nou servi *blower*, lot, lot. Sa ki annan laponp pou ponp delo.

Osi fer referans avek bann lezot *additional support structure*, akoz i annan letan ki ler evantyalite dezas i vini, i pa zis pou detrwa erdtan. In arive kot ou bezwen kanp dan serten landrwa, pou 1 zour ouswa 2zour pou reste an koneksyon avek la realite ki lensidan ki pe arive. Ou bezwen annan en

*partner* ek en laboutik pou *supply* ou si ou bezwen manze. Ouswa en endividé ki pou kwi manze pou ou, si i annan en *takeaway* dan ou distrik.

So, tousala i en striktir ki bezwen pran kont tou sa bann eleman pou fer travay brigad efektiv. Akoz letan tou zomm in *onboard*, ou pa kapab pe tir enn ladan pou li al kwi manze, ouswa pou al tay laboutik. Sa i bann responsabilite ki bezwen ganny vwar dan son lansonm.

So, i neseser e i ti annan en *checklist* ki egziste dan *guidelines* pou gete si tou sa bann keksoz i relevan ouswa pe ganny obzerve.

E la i anvoy mon lo en lot eleman kot *training* ek *capacity building*. Tousala, ti ganny fer sa. *Training*. Me selman, nou pa pran kont osi si i annan renouvelman nouvo manm ki antre, kot ou bezwen tir li, fer li ganny sa *training* i osi. In annan *training* ki'n ganny fer dan *first aid*, in annan *training* ki'n ganny fer dan *firefighting*, in annan *training* ki'n ganny fer dan *rescuing*.

E osi in annan *training* ki'n ganny fer pou ou kapab *board* en, parey bann pti kannot, pti bato, lot, lot, pou sov serten lavi tou. Tousala in egziste, in ganny fer. Me lefe i reste se ki i bezwen annan

kontinite, e i bezwen annan evolisyon dan pratik travay ki brigad i ganny fer, anba sa lankadreman DRMD. E mon pli gro kestyon ki mon pou demande se, *what ... Ki zot plan? I dan zot Lalwa, i dan zot integrated plan la?* I vin parey en Polisi. Ki zot plan pou re amenn sa *onboard*? Ki mannyer pou partaz sa bann lekspertiz ouswa *get* sa bann departman ki responsab pou zot kapab met an pratik, met an aksyon.

Annou pa get keksoz nwar ek blan. Wi, nou annan en bon plan, *integrated plan system*. Me met an aksyon. Sa i enportan. Me selman i vin avek son resours.

En lot keksoz ankor Mr Speaker, letan nou pe koz Brigad Dirzans, an rekonesans sa group dimoun, ti osi annan en *Brigade's Day* ki ti ganny organize. Mwan, mon rapel 2 levensnman. Enn ti fer Beau Vallon, Nasyonal, e lot ti fer Baie Lazare ki mon rapel, sa ti atraver en *Sport Day*.

So, in annan bann lesey fason fer pou nou kapab rekonnet sa group voluntary ki'n travay, ki'n donnen. E mon pou mwan, mon en pti pe sagrinan letan mon tann serten Onorab in nonm serten. Konmsi i dir brigad i sou, lot, sa.

Mon krwar i enportan pou nou pran konteks byen. Akoz, sa group dimoun ki dan lepase ki'n donn zot letan, voluntarya, i pa bann dimoun ki annan doktora zot, napa *PHD* zot. E pa bokou zot ki ti pare, menm si ou ti fer lapel pou zot vini, pou vin *form* par sa.

So, annou donn zot en pti pe respe pou sa ki zot in fer, malgre akoz i annan in ganny aksidan dan pe deservi, dan pe fer voluntarya. I annan ki'n tonm malad apre. Nou rekonnet tousala. Me selman annou donn zot en pti pe sa, zot drwa, zot dinyite e nou remersi zot.

Mr Speaker, osi brigad, sa lekip, i pa zis esper moman ki annan dezas pou li montre son efikasite. Parey bann groupman ki ti annan anba parasol ladministrasyon distrik, brigad i sipoze annan li en plan aktivite pandan en lannen. E sa i rol sa *team leader* pou soumet avek ladministrasyon distrik, sa i *DA*, epi *DA*, li i anvoy anba kot Sekretarya *Local Government*, pou dir vwala plan ki sa distrik i annan pour Brigad Dirzans, e bann lezot aktivite.

E mon kontan pou dir i annan Manm Onorab lot kote ki'n nonm bann travay volonter ki'n al fer. Al ed en dimoun ki vilnerab. Pas kot en lenstitisyon ki bezwen en sipor pou al ede

penn, netwaye. Tousala i bann keksoz ki'n ganny fer e i ankor pe ganny fer sa. Pa blyie. I ankor pe ganny fer. Dan mon distrik i ankor pe ganny fer. E tou resaman la, nou fek fer en pti aktivite an remersi zot travay ki zot in fer lafen lannen, dan en pti *barbeque* ki DA in organize, e nou rekonnet sa group dimoun.

So, pou keksoz bouze, nou tou nou bezwen *onboard*. Ou koman sa *MNA* ki responsab ou distrik, *be at par* ek ou brigad, akoz mwan osi mon ti form par brigad. E mon depi ler mon'n vin *MNA* mon'n reste la e mon pa'n touse sa larzan brigad. Ki fer mon mazin Madanm parol, *PS Vidot*. “*MNA* pa pou gannyen sa R500”. Mon dir napa problem, donn - met dan kont brigad. Zot a gannyen, zot a fer zot aktivite avek.

*So, we all have to be at par* dan sa travay si nou anvi brigad i fonksyonnen. E nou osi nou a vwar. Petet zot annan serten nide. I annan serten dimoun, serten fanmir, serten lenstitisyon dan nou distrik ki merit ganny ede. Ouswa lo nivo rezyon nou *team up* koman en tim. Letan i annan *district team meeting*, vwar bann *issue* ki monte, si annan landrwa pou nou fer brigad antre. Nou fer li

antre, san ki nou bezwen met politik.

Ozordi *LDS* ki annan la mazorite distrik, nou rekonnet sa. E mon pa pou vin akiz personn pe fer politik ek brigad. Si ou'n deside pran ou tim brigad, ou ki konnen ou distrik. Ou ki konnen ou bezwen ede. E i pou mars koumsa. E mon pa pou kapab montre ledwa lo zot. E si mwan, mon osi mon annan distrik. Distrik ki *US, MNA US*, si mon vwar en dimoun mon bezwen ede, san mon pou get son kouler politik. Si i bezwen, nou ale pou ede. So, annou pa met politik dan sa sityasyon brigad. I mal sa.

E pou fer mansyon, ek milisya osi ki i sagrinan konmsi. Ou pe gat en Mosyon la. E pou mwan bann keksoz koumsa letan nou pe koz lo en group distrik, i pa relevan. Akoz milisya ti *way back*. Nou pa kapab koz brigad apre sounami. Milisya pa ti la 2004. Annou pa koz sa. Annou met konteks byen.

E Mr Speaker, an terminan, si nou anvi fer zistis avek sa Mosyon; si nou anvi ler en realite i marse. I bezwen annan sa bann lazans ki bezwen zwenn ansanm pou vwar ki mannyer lamenazman prosedir *emergency*, i bezwen ganny fer lo nivo distrik. Akoz

nenport lensidans ki arive, i ariv dan en distrik li. Apre si i dekoul dan lezot, apre la nou dir, nivo nasyonal. Ok?

Nou bezwen *take to task*, premyerman *DRMD* ki li ki zer sa *portfolio* pou administre tou *emergency* ki pou deklanse dan distrik. E li a swiv sa *integrated plan*, lo ki mannyer premyerman. Akoz ler en keksoz i arive dan distrik Mr Speaker, *DA* pa zis lev en telefonn, mobiliz Brigad Dirzans, nou pe ale, nou pe al ede. Non, pa mars koumsa sa.

I bezwen ganny en direktiv *alert* ki sorti kot Sekretarya *Local Government*. Ki li *Local Government* i ganny avek sa *response agency* ki responsab, sa i *DRDM*, ki anvoy sa alert kot li, e li i deklans sa lo nivo distrik pou kapab al ede. Ou pa kapab zis sorti, sote, dir tou brigad vini. Non.

So, se sa ki mwan mon pe met li dan konteks kot sa lazans i komanse. Se li ki anvoy sa premye sinal. Li ki lakle pou fer travay komanse. E osi li ki lakle pou fer travay vin efektiv avek tou sa bann departman.

So, Mr Speaker, Mosyon mon santi i devret al pli lwen ki sa. Ou pa pou kapab annan zis en group dimoun ki relevan, ki pare pou donn koudmen, san pran konteks sa bann lezot

*underlying* fakter ki mon'n nonmen, ki bezwen enportan pou sa. Resours wi nou pou bezwen. Byensir. E mwan mon swete ki brigad i gannyen. Mon pa pe neseserman dir pey tou Brigad Dirzans sepa konbyen mwan. Me Brigad Dirzans i sipoze annan en kont. Met sa larzan dan sa kont, en mannyer ki zot ava fer plis aktivite dan bann letan ki napa dezas, napa *emergency*. E sa i ava ede kit manm aktiv.

Parfwa manm i perdi lentere, akoz? Se inaktivite. Napa keksoz. Zot santi zot, zot *bored*. Pa *bored*. Zot fer lot keksoz. Ou pa bezwen zot la. Apre zot ganny servi dan en lot fason, dan sa lezot keksoz ... E zot riske pa retournen. Be si ou'n kapab met en rasanbleman avek en resours. Parey bann lezot programm dan distrik i annan, donn zot, zot ava fer en travay efektiv.

E mon asir ou poudir, dek kan en dezas i deklanse, zot pou pare zot pou la, menm si fodre reste lannwit, 2zour, zot pou pare pou reste. Me lakle se sa lankadreman, mon krwar i enportan, ki mon santi Mosyon pa pe al sitan ladan pou adrese. E sa se sa bann lazans ki pou ede ed *DRDM*, ansanm ek bann lezot lazans pour distrik. Mersi Mr Speaker.

**(APPLAUSE)**

### **MR SPEAKER**

Mersi Onorab. Mon remersi bann Manm ki'n koze, ki ziska konmela in gard letan. Selman mon realize poudir avek bann lalis ki'n alonzi, mon devret met en *limit* letan, nou a met 15 minit par ladres. Mon a donn laparol Onorab Audrey Vidot.

### **HON AUDREY VIDOT**

Mersi Mr Speaker. Bonn apre midi Mr Speaker, tou Manm Onorab, zabitant Roche Caiman e tou manm piblik ki a lekout.

Mr Speaker, mon pou pran lenthervansyon lo sa Mosyon, menm si mwan, mon dan mon distrik Roche Caiman mon Komite Brigad mon kapab dir dan Ladministrasyon Distrik Roche Caiman pe mars tre byen.

Si mon pa ti koze ozordi, mon asire zot ti pou *still* konpran poudir mwan mon apresye travay ki zot Brigad Roche Caiman pe fer. Me mon lenthervansyon kwa ki'n motiv mwan pou koze la, se plito apre ekout serten Manm lo lot kote latab, i fer mwan enportan pou mwan koze, pou ekliersi serten keksoz ki en portre ki'n ganny penn, ki mon krwar i pa neseserman larealite.

I enportan ki nou pa blye kot nou sorti. Mon kontan servi sa term akoz bokou fwa i annan dimoun i blye. E parfwa ler ou pa'n dan en keksoz, ou pa'n dan sa batem dife, ou pa vreman konpran e vvar vre nesesite kote ki merit annan plis amelyorasyon e vvar keksoz amelyore vin pli byen.

Mr Speaker, brigad dan distrik ti deza annan en striktir ki Gouvernman Lokal in formen, e byensir tou striktir i annan lenportans pou revize. E son revizyon in ganny fer kot en *guidelines* pli detaye e parey Onorab Labonte in fer resorti - ti ganny inisyé pou ganny swiv depi 2021.

Apre plizer bann konsern, bann rekomandasyon ki'n vini par diferan Brigad dan tou distrik ek bann lazans, ki'n vvar poudir apre serten reaksyon lo bann levennman ki'n arive dan pei, kot in angaz Brigad e zot in vvar kote ti annan bann defayans pou vvar pou amelyorasyon.

Mwan mon rapel tre byen, mon pa ti dan letan milisya akoz mon'n ne an '87. Me, mon le fer resorti ki mwan mon premye vin en manm brigad ler mon ti travay dan Ladministrasyon Distrik Plaisance koman en *administrative officer* a sa letan

avan ler i bouz koman *office manager*. E apre sa, ler mon'n bouz koman *DA* pou English River, mon'n kontinyen koman en manm.

E koman en dimoun ki'n dan striktir brigad, ki mannyer i fonksyonnen, nou konnen poudir brigad ti annan en *profile* lo sak son bann manm. Wi, i ti annan provizyon lasirans pou protez zot bann manm. Akoz zot bann volonter ki met zot lekor a *risk* pou donn en koudmen volonterman dan zot distrik, dan bann ka dezas.

In annan bann *medical test* ki bann manm in deza fer, e i annan menm ki'n ganny lasistans serten vaksen pou zot kapab asire ki zot protez zot lekor.

In annan plizyer *training*, *training* lo kote *first aid*, *training* atraver Departman *Fire Brigade*. E bann *training* osi pa ti zis pou brigad, me osi bann lezot klib ki annan bann travay ki zot fer avek bann diferan group kous dan kominote. Pou asire ki zot ganny zot bann lenformasyon debaz. Ki mannyer pou annan bann prevansyon e ki mannyer zot kapab evit bann risk ki kapab egziste dan bann ka dezas.

Tousala ti annan e in annan pou plizyer lannen. Wi, i annan serten landrwa ki

bezwen ganny ranforsi, akoz *training* nenport ki dimoun i sanze volonter i vini, i ale. Ou bezwen pe kontinyen pe donnez pou asire ki servis i ganny donnez volonterman alaoter, e nou bann volonter i ganny proteze.

E mon pa pou kapab kontinyen lo sa laliny san remersi tou sa bann volonter ki'n travay dan plizyer distrik. Parey Onorab Aglae in dir, ki'n kit nou, mon mazin defen Maisy Soopramanien, English River. In enn parmi bann volonter ki ler i dir ou Brigad, li ek son garson zot vini. E zot menm pran zot prop lekipman personnel kot zot lakour, akoz zot enn zot ti konnen poudir distrik ti napa ase e i annan i dir ou i konfortab servi son zouti ler li i al donnez ede dan distrik. E i ti al avek se li.

I pa'n vole li i, i ti al avek se li akoz ti pou li, i ti vin avek. Wi, i annan en programm ki ti annan bann distrik ti ganny sans kapab aste nouvo lekipman. Sa ti annan. E ti annan en responsabilite pou sak Administrater Distrik, mon pa konnen petet bann ki, ki, ki'n dan Brigad ki pa'n fer zot louvraz ase byen, sa i lo zot konsyans, me mon konnen ti responsabilite sa Administrater

Distrik pou asire ki i annan son *check list*, son bann zouti.

E letan i pe al ede lo teren, i fer sir ki tou son zouti i la, i annord e byensir bann ki bezwen *write-off* i bezwen swiv prosedir, ki ganny demande par Minister, pou asire ki zot pa ganny problemm avek Finans.

Tou sa bann striktir, sa bann zafer zis dir dimoun in vol zouti, in vol isi in vol laba la, sa bann dimoun ki dan Brigad i tann zot, zot konnen zot lekel ki pe ganny dir zot, pe akiz zot voler.

Mr Speaker ou konnen, nou bezwen valoriz travay nou bann volonter. E pou ou valoriz sa, wi, ou bezwen kontinyen ranforsi lo en striktir ki deza la i egziste, pou fer li vin pli for. E osi ou'n ganny en gidans pou servi pou ou kapab fer pli byen, zot bezwen otan posib pran responsabilite enplimant li.

E la, la kot mon konsern i vini, se inefikasite en ladministrasyon. Kot letan ou'n ganny ou en manda pou fer pli byen, ou'n annan en zouti travay koman en gidans pou ou fer pli byen. Apre tou sa konplent ki mon'n tandem lo lot kote latab, bann keksoz ki manke ki merit ranforsi, dan sa lespas 2an edmi, mon ti ekspekte ki zot annan zot an plas serten sa bann lekipman

pou asire, poudir montre pep Seselwa zot pe vin fer pli byen. Pli byen ki sa enn avan si zot santi poudir ti mank zouti travay. Zot annan sa letan, zot ti kapab fer li.

Sa ki fer mwan mefy, mefy mon langazman pou siport sa Mosyon. Akoz i annan serten keksoz ki ti kapab komans ganny fer, me malerezman ziska pe la nou pa pe vwar.

Mr Speaker nou'n tann koz lo bann defi, bann defi ki brigad i bezwen adrese. Si zot santi i mank *training*, i mank lekipman, zot annan en *guideline* pou swiv. Kwa ki pe anpes ladministrasyon ozordi enplimant sa bann *guidelines*? La mon konnen i annan en lot striktir ki ti atase for avek Gouvernman Lokal ki dil avek gidans lo bann dezas ki arive dan pei zot pe rod volonter. Ok, zot pe rod voluntarya pou ede.

I byen, zot a santi e vwar ki mannyer parfwa Gouvernman Lokal atraver bann distrik i pas ladan pou zot kapab mentenir e donn siper volonter.

E nou bezwen edik nou bann dimoun byen la deor, ki rol e responsabilite en volonter Brigad dan distrik. Se sa ki annan mankman. Sa ki nou bezwen fer sir nou edik nou

bann dimoun poudir sa bann dimoun ki kit kot son lakour, ler i vin donn en koudmen dan en ka dezas, i pe vin ed ou pa pou li zis la kot ou pou ed ou, me ou asize dan lakour ou regard li kot li i pe ed ou.

Non, se sa bann keksoz ki nou bezwen edik nou bann dimoun, poudir sa dimoun wi in vin la i donn ou en koudmen. Me an menm tan, ou osi ou bezwen ed ou lekor. Sa ledikasyon.

Zot bezwen osi fer fason pou ki asire poudir annan zouti pou sa bann dimoun travay, parey zot in konplent i manke. Be nou'n pas dan 2 Bidze, 3 Bidze la, mon pa ankor vwar ranforsi ki Gouvernman Lokal in met lanfaz lo la pou siport Brigad.

Logmantasyon pou donn zot, wi, in en lager depi lontan. In vini wi, e i ti zot responsabilite pou ogmant li. Me zot ti kapab fer pli byen, pli byen ki nou administrasyon. Me zot pa'n fer li, akoz zot pa ti fer li lo baz *quarterly*. Ki annan en lokasyon parey bann programm ti gannyen lontan ?

Sa osi Mr Speaker, i ti pou soulaz zot, akoz ozordi nou konnen ler ou tir en dimoun se li ou fer li vini vin ede volontier ou bezwen donn li en boutey delo avek en pe manze.

Akoz in kit se li, li i pa ganny letan pou li prepar sa pou li vin avek dan en ka *response irzan*. E ozordi nou konnen konbyen en bwat *take away* e nou konnen konbyen pou fer en dimoun pou prepar tousala.

So, avan ler nou zis kritik sa bann dimoun vin bwar sou, akoz i responsabilite osi en *DA* pou asire ki son volontier ler i vini pou li vin ede dan en ka dezas, i azen, e son kondisyon lasante i annord pou li kapab vin ede.

Akoz li osi i pou bezwen reponn kestyon. Mon pa krwar i annan en *DA* ozordi oubyen yer ki pou anvi demann kestyon, reponn kestyon pou enn son volontier ki'n sou, ki'n ganny blese oubyen in koz lavi en lot. Tousala i bezwen ganny konsidere.

E letan mon'n tann koz lo laz, mon pe sey ganny en konpran mwan en. Ou'n pas Lalwa Pansyon pou bouz 65an. Sekirite Sosyal ankor in ganny bouz 65an, savedir si zot in bouze, pou zot dan zot leta lespri zot pe mazin dimoun i kapab, i for, i viv lontan ziska sa bann letan. Be mon'n tann konplent lo 63an brigad.

Me si i annan dimoun ki wi son leta lasante menm si i alaz, i pa kapab li, me i annan

serten keksoz ki i santi koman en volonter i kapab kontribye lo Brigad, ou pou penaliz li? Ou pou anpes li vini pou donn en koudmen? Me si i annan son lekspertiz an term son karyer, son konesans ki li i kapab donn en koudmen, gid sa lot, *groom* sa lot ki la ki pli zenn? Nou pa valoriz li ?

Ou konnen, parfwa nou bezwen reflesir byen ler nou tous lo volonter en. Akoz volonter pli ou pa rod fason pou valoriz li, aport li sipor. I pa pou vin ankor, i pa pou montre lentere. E se pour sa rezon ki ziska ozordi i annan serten distrik i mars tre byen. Akoz zot ganny valorize pou zot zefor, zot kontribisyon ki zot in donne.

E la mwan, mon pou felisit dan mon distrik Mr Eddy Follette, Leon Edward menm si i annan serten zot ki'n sorti lo Komite Brigad akoz sa limit kantite ki ti ganny dir pou zot zwenn Brigad. Me zot ti vin ek zot prop lekipman. Mr Richard Felix, Plaisance tou sa bann dimoun pou mwan dan memwar, mon konesans mon rapel zot tre byen. Ki zot in vini, zot in vin ek zot lekipman. Montre zot langazman, zot lanmour pou zot kominote.

Me si ou vwar i annan serten i ale la, i ale akoz petet valoriz lenportans zefor ki'n

ganny donne, oubyen ler ou pran zot ou met zot dekote. Me ler ou vwar i annan ki ankor la, i ankor pe donn en koudmen lasante i permet, savedir i annan en lanmour, i annan en pasyon pou son kominote pa ti annan pou fer ek politik.

Akoz mwan mon rapel tre byen ler mon ti English River, pe enport ki kouler ki ou ti ete, si ou anvi vin donn en koudmen dan ou distrik, akoz mon ti bezwen dimoun mwan. Mon pa kapab pouz dimoun, ti vini e i annan menm dimoun ki ti dan lopozisyon sa letan. Ki ler mon lev kout telefond pou son distrik, pou li donn en koudmen dan en ka dezas, zanmen ti refize, zanmen ti refize. Akoz zot ti vwar poudir kote ki i annan en moman ki ou met politik en kote ki ou met dekote.

E dan distrik Roche Caiman, mon group Brigad ler i annan le moman pou sosyalize, mon les zot sosyaliz ekspre. Mon pa angaze akoz mon pa anvi demen zot ganny penn en portre, poudir akoz mwan mon Manm Elekte Roche Caiman ki sorti dan *United Seychelles*, mon pe met politik dan travay sa bann zofisye Brigad.

Me ler in ariv ler pou ede, ki annan pou fer ek nou distrik oubyen pou ed rezyon, zot

bezwen dan nou distrik. Mwan mon pou pare pou mwan ede, akoz mon pa blyie kote mon sorti e mon pa blyie bann *training*, bann langazman ki'n ganny mete, ki'n ganny ofer à moi dan bann letan ki mon ti dan, mon ti dan ansyen ladministrasyon. Mon pa blyie, mon rekonesan.

E se sa bann keksoz ki ou bezwen kontinyelman motiv e donn sipor sa bann volonter dan distrik. Annou arete zis penn en portre politik, bwarer, sa bann dimoun ou bezwen flat - Non, nou pa kapab kontinyen penn sa kalite portre. Akoz sa bann dimoun zot konnen zot, la pe ekoute zot. I annan en kantite zot pe swiv. So, nou bezwen valoriz zot zefor ki zot, zot donne.

So, lo sa not Mr Speaker, mon termin mon lervansyon ankor enn fwa par montre gratitud akoz i enportan. Gratitud a tou sa bann dimoun ki'n en fason ou en lot kontribye, menm si zot ti enformelman pa lo Komite Brigad. Me ki'n kontribye en kantite, ki swa par rezyon oubyen dan zot distrik spesifik, mon demann zot pou kontinyelman sa travay ki zot pe fer, kontinyelman fer li byen pa dekouraze.

E bann ki santi ki pare menm si zot pa kapab formelman vin lo striktir brigad akoz sa limit kantite Manm Komite. Me i pa anpeste ki ler i annan en ka dezas volonterman kot zot santi ki zot lavi pa pou a risk, akoz pa zot tou ki ganny kouver anba lasirans bann ki pou vin a nouveau, ki pa pou antre dan sa Komite.

Me ki annan lezot fason ki mon asire ki ladministrasyon distrik i kapab apresye zot servis e zot sipor pou asire ki sak bann distrik zot Brigad i bouze.

E Ladministrasyon ankor enn fwa parey mon terminen Mr Speaker, ki la, in ganny en manda pou fer pli byen. In ganny en manda pou li vin pli efikas, la i son moman pou li servi sa zouti *guidelines* ki'n gannyen pou li met li an aplikasyon. E pa ranforsi striktir ki deza la, me fer marse, montre poudir vreman zot kapab fer pli byen. Mersi Mr Speaker.

**(APPLAUSE)**

### **MR SPEAKER**

Mersi Onorab. Nou kapab pran poz lo deba la, e nou a repran Lasamble 2er apre midi.

Mon rapel bann Manm ki annan Komite sirtou *Assembly*

*Business Committee* pou tenir zot langazman. Nou a pran poz. Mersi.

**(BREAK)**

### **MR SPEAKER**

Bonn apre midi tou dimoun, byenveni pou nou travay apre midi. Nou kontinyen avek deba lo Mosyon e prosen entervenan se Onorab Wallace Cosgrow.

### **HON WALLACE COSGROW**

Mersi Mr Speaker. Bonn apre midi Mr Speaker. Bonn apre midi tou Manm, e bonn apre midi tou dimoun ki pe ekout nou lo radyo, televizyon apre midi.

Mr Speaker, mon kontribisyon lo sa Mosyon ozordi, mon oule komans li koumsa. Mon rapel Mr Speaker letan mon ti ankor bokou pli pti, bokou pli zenn e la mon pe koz lo bann lannen 80 ler mon ti ankor reste dan distrik Onorab Labonte La Rivière Anglaise, Castor Road an partikilye, mon rapel bann letan kot ti annan bann travay volonter, mon ti ankor bokou pli zenn. Mon rapel bann letan travay volonter e sak fwa ti anonse ki annan travay volonter, mon manman ti fer mwan donn en koudmen balye semen ki nou ti reste o bor.

Sa semen ki bokou dimoun i konnen kot lakaz Tayat ti ete lontan. E sa letan Mr Speaker travay ti volonter, kantite dimoun ti vini. Sa ki anmenn balye, sa ki anmenn pyos, lapel, pik fer travay volonter dan distrik.

Mr Speaker sa a en tre zenn-az, e letan in evolye. E travay osi dan distrik i evolye, nou'n war kreasyon bann Brigade spesifik e la nou pe koz lo brigad distrik. Brigad *Emergency Brigade* dan distrik, pou fer serten travay *emergency* egzakteman e nou'n vvar osi a longer di-tan kreasyon bann diferan striktir par egzanp dan distrik i annan bann pti kontrakter ozordi ki ganny kontrakte anba *LWMA*.

Ki fer bann travay spesifik dan distrik, ki netway dan bann landrwa kot petet pa tou dimoun konmela ki fer travay volonter parey mon ti pe eksplike pli boner. E ki kit distrik dan en serten leta ase rezonnab kot lapropte i rennyen.

E Mr Speaker ozordi i nepli parey e sityasyon i dikte ki nou osi bezwen evolye lo ki mannyer nou vvar, nou dil e *response* avek bann lenstans dirzans.

Mr Speaker sa Mosyon ki devan nou mon konpran lespri

sa Mosyon, mon konpran lespri par deryer sa Mosyon. Me malerezman mon bezwen eksprim mon dezapwentman, ki pa'n vreman ganny sa merit. E ki loter sa Mosyon pou mwan Mr Speaker, i pa'n al ase lwen pou konpran ki nou pe viv dan en letan diferan e propoz en keksoz ki pou reponn demann sa letan ki nou pe viv ladan ozordi.

E Mr Speaker, ler mon'n ekout Onorab fer son prezantasyon komansman, o debi Mr Speaker. O debi Onorab i gat lespri Mosyon. Ler mon koz lo lepase Mr Speaker, tou dimoun ti fer travay volonter. Ler ti form Brigad tou bann dimoun ki ti vin dan Brigad, ti bann dimoun volonter. Dayer, taler mon ti pe koz ek en dimoun ki'n deza, deza dan Brigad en zenn garson deza dan Brigad.

E i ti eksplik nou en pti pe sa travay volonter, sa lespri volontarya sa lespri kanmaradri, vin ansanm. E sa lespri, sa lanvi pou fer serten travay pou distrik. Akoz ti annan nesesite sa letan Mr Speaker. Me ti napa kategorizasyon Mr Speaker, ti napa kategorizasyon *SPPF*, ti napa kategorizasyon swa ou bezwen dan milisya *or ou ti dan milisya*.

So, pou mwan ler Onorab i komans son Mosyon, i komans koz lo bann keksoz koumsa. Pou mwan in fini gat sa Mosyon depi lo debi Mr Speaker. Ti napa okenn nesesite pou nou antre dan sa kalite kategorizasyon, e nou pa kapab annan en kote ki dir nou devret travay ansanm apre zot vin avek sa kalite *statement*.

Ou war Mr Speaker, tou kou zot dir annou travay ansanm, apre swa zot kadas nou ouswa zot le, zot pa oule nou koze. Zot pa oule nou koz lo serten keksoz Mr Speaker.

Par egzanp mwan, mon anmenn en kestyon ki fer sans lo size nasyonal, ou ganny difikilte fer sa kestyon ganny admet devan Lasamble. Akoz serten panse ki sa kestyon petet i pa relevans, kontrerman avek lopinyon piblik.

So, kantmenm nou dir nou travay ansanm, ou ganny serten parol lo lot kote ki dir lekontrer Mr Speaker. E sa Mr Speaker, i fer mwan kestyon senserite menm dan en size parey Brigad. Fer mwan kestyon senserite lot kote latab menm dan en size parey Brigad ki nou pe koz lo la, ki nou krwar i annan serten lenportans. E nou pe koz lo la apre midi.

Zis parey mon'n fer resorti, listwar brigad letan

mon'n koz ek sa garson. I dir mwan poudir listwar brigad i enn ki ti baze lo volontarya, ti baze lo lanvi serten dimoun dan distrik. Annan en Lorganizasyon serten dimoun dan distrik, pou fer serten travay lo en nivo volonter, lo en nivo kanmaradri, lo en nivo ed distrik fer distrik bouze. E sa ti dan labsans petet serten lankadreman sa letan dan distrik ki ti bezwen pou reponn serten nesesite sa bann letan.

Ti en nide kot en group dimoun ti kapab *respond* vitman ler i annan en dezas ouswa en evantyalite dan distrik.

E la mon 2 koleg US ki'n koze avan Onorab Aglae avek Onorab Vidot, zot in eksplik byen mon krwar akoz zot in deza dan distrik, zot in deza DA. Zot konpran sa sistenm mannyer i ete, zot konpran rezondet ki ti ganny fer e mon krwar zot in eksplik byen, zot in fer zistis sa size deba.

E mon krwar, ler mon pe ekout zot lentervansyon, mon santi ki sa bann lentervansyon sete sa ki ti devret pe ganny pase dan sirtou, dan lentrodiksyon Mosyon par Onorab.

Mr Speaker, kot ki mal pou mwan, nou pa kapab kategoriz dimoun ki'n travay

koman bann brigad. Ki dan bokou parey mon'n dir volontarya e pou mwan sa i malere. Par egzanp si en dimoun zot donn zot letan, e si en dimoun pe ganny tansyon par egzanp, in donn son letan li. Swa i ganny tansyon, swa i ganny serten maladi. Petet i pa pou kapab wi, mont lo en tol pou al kloute. Me selman i annan lezot keksoz ki i kapab fer, petet i annan serten don, serten keksoz ki i kapab fer donn lanmen kordin keksoz.

So, konmsi nou vin ek en Mosyon pou fer li pli byen me o komansman nou komans kraz tou bann dibyen ki'n ganny fer. So, pou mwan sa Mr Speaker i pa akseptab. E mwan Mr Speaker, mon vvar sa lespri brigad, travay dan distrik dan en lot loptik, e la mon pou eksplik en pti pe kwa ki, ki mannyer mwan mon vvar li.

Parey mon'n dir ozordi bokou keksoz i diferan avek letan lide brigad distrik ti ganny konsevwar, e sa letan bokou responsabilite Mr Speaker, ti tonm lo Gouvernman e striktir ki ti ganny kree. Sa striktir ti ganny kree dan sa laliny.

Me ozordi nou bezwen pli inovativ, nou bezwen servi resours ki egziste pli byen. Ozordi i annan en kantite striktir dan pei, dan distrik an

zeneral ki'n ganny mete e nou bezwen servi sa bann resours, sa bann keksoz pli byen, pli inovativ. E mwan mon ti ekspekte ki Mosyon ler pe vini, i vin dan laliny inovativ, inovasyon kot nou servi resours ki deza egziste pou kapab fer travay lirzans dan distrik vin enn ki bokou, bokou pli efikas.

E la Mr Speaker, ki mon pe koz lo la, en keksoz spesifik ki mon pe koz lo la. Tou resaman dan legzersis Bidze, nou'n aprouv Bidze pou Lazans *DRD - Lazans Gouvermantal DRD, Disaster Response Department.*

Ki zot, zot bezwen met an plas bann striktir pou reponn bezwen pei e distrik dan bann evantyalite dezas. E distrik li i bezwen aziste li *or Gouvernman Lokal, Departman Gouvernman Lokal* i bezwen aziste li avek plan nasyonal e striktir ki egziste lokalman.

So, Gouvernman Lokal pou mwan i merit aziste li e servi striktir ki annan dan distrik ki annan dan pei, pou kapab fer ki nou maksimiz resours, nou servi sa ki annan e ki travay ler i arriv en dezas ouswa en evantyalite. Travay i ganny fer bokou pou pli targete, bokou pli efektivman. Distrik pou mwan i devret annan en

levanter tou bann resours ki annan dan sa distrik.

Tou distrik Mr Speaker i annan serten resours i kapab ede dan bann evantyalite. Dan distrik i annan dimoun ki koup pye dibwa, i annan dimoun ki bann kontrakter koup pye dibwa.

Dan distrik i annan bann pti kontrakter netwayaz, *maintenance*. Dan distrik i annan mason i annan sarpanye, i annan tou metye tou *trade* ki ou kapab mazinen, dan tou distrik i annan.

I pou enposib pou mwan krwar ki annan distrik ki napa sa bann resours Mr Speaker. E la ki mon pwennvi Mr Speaker, se ki distrik i bezwen dan lespri e pa parey sa ki nou ti vwar yer kot Gouvernman pe dekouraz pti biznes. Pe tir pti biznes dan bann landrwa travay. Distrik dan lespri devlop e fer pti biznes bouze, zot devret pe met sa bann diferan lenstans ansanm pou zot kapab kontribye dan distrik e pou zot osi sa bann pti biznes devlope.

Donn zot sa loportinite pou zot devlope, me pa sa ki nou'n vwar yer kot nou vwar olye lev pti biznes, nou prefer gro biznes. Nou tir pti biznes kot zot bann landrwa kot zot pe opere e fer zot tonbe.

So, Mr Speaker mwan mon krwar poudir dan distrik i la kot nou devret pe idantifye sa bann resours, loportinite e servi sa bann resours kordin byen. Louvraz ladministrasyon distrik Mr Speaker, pou mwan dan sa loptik i devret enn kordinasyon. Tim Brigad i bezwen en group dimoun ki kapab kordinen, e fer keksoz marse bokou, bokou pli efektivman.

Akoz mon dir sa Mr Speaker? Akoz i annan parey mon'n dir sa bann resours dan distrik e i annan Polisi. I annan stratezi nasyonalman ki kapab met sa bann keksoz an plas dan distrik. I annan en Onorab lot kote taler ki'n koz dan sa laliny en pti pe, e mwan mon krwar sa laliny ki nou devret pe ale avek sityasyon ozordi. Levolisyon dan travay, levolisyon dan distrik, mon krwar dan sa laliny ki nou devret pe ale koman, nou koman bann Manm Lasamble.

Nou bann keksoz ki nou devret pe propoze, se dan sa laliny ki nou fer keksoz bokou pli byen. Mr Speaker bann Manm ki'n koz avan mwan, bokou in koz lo distrik annan bann lekipman ki la dan distrik pou servi letan i annan en evantyalite.

Mwan pou mwan sa Mr Speaker i vye fason fer, i vye fason fer koz neseserman nou

annan parey mon'n dir sa bann dimoun ki annan sa bann lekipman dan distrik. E distrik i bezwen kapab kordinen.

Ou kapab zis mazinen 26 distrik, 26 *batch* lekipman ki ozordi pa kout en pti git en. I kout bokou, deza nou vwar poudir bann Bidze pou bann pti proze dan distrik i pa neseserman alaoter ki bokou bann *MNA* bokou bann Onorab ti ava kontan pou zot fer proze.

La nou e pran larzan pou al met dan bann lezot *achats* ankor, ki met en *burden* lo distrik. Apre distrik i bezwen *maintain* sa bann zafer. Bann lekipman *motorized equipment* par egzanp a *chainsaw*, masin koup zerb bezwen ganny *maintained*. Bezwen fer sir i ganny *maintained*, i vin ek en kou tousala.

So, Mr Speaker pou mwan mon krwar nou devret reget sa zafer e pou mwan mon ti ava apresye, si Mosyon Onorab ti vin en pe dan sa laliny.

Ankor Mr Speaker avek sa Mosyon, parey mon'n dir boner mon annan serten dezapwentman akoz zisteman sa ki mon'n dir i mank en vizyon. I mank en vizyon, i mank en nouveau fason fer, par sa nouveau ladministrasyon. Menm si zot ti vin devan pep Seselwa an 2020 avek bann promes

sanzman, nouvo fason fer, me malerezman Mr Speaker bann Mosyon, bann diskisyon i montre ki naryen pa'n sanze. Parey bokou lezot keksoz. Eskize sa ki'n ganny dir pou mwan pa ni sanzman Mr Speaker. I sertennman pa transformasyon, mannyer loperasyon pandan lenstans dirzans i deroule dan distrik or zot pe propoze pou deroule dan distrik.

E parey mon'n dir Mr Speaker, Lalwa *DRD* osi ti vin devan Lasanble. Isi menm dan Lasanble Mr Speaker in annan bokou provizyon anba Lalwa, in ganny eksplike taler par Onorab Aglae. I annan provizyon dan Lalwa pou kapab fer etablir bann nivo lenstans volontarya kot bann dimoun i ganny anrezistre volontarya. Pou kapab demar or fer sa bann travay ki annan pou fer dan distrik.

Ler Mr Speaker mwan mon get fason ki Gouvernman i fonksyonnen i kler, i kler Mr Speaker pou mwan ki ler mon get bann diferan keksoz ki zot vin avek, zot ankor pe tat tate dan fernwar e napa en plan kordinen.

Malgre nou pou vin ek Mosyon, malgre nou pou vin avek seren kestyon lot, lot, lot, me Gouvernman napa en plan

kordinen ozordi pou kapab fer keksoz pli byen, pli meyer e dan en fason inovativ Mr Speaker.

Nou'n annan nou en loportinite ozordi pou propoz en striktir ki pou vreman transform lafason ki louvraz dirzans i ganny dil avek dan distrik. E sa striktir pou mwan Mr Speaker, si nou kapab al dan sa laliny ki mwan mon pe panse, i pou deservi nou pou ankor bokou letan.

Bokou letan parey louvraz travay volonter ti fer serten letan, brigad dan son fason ganny fer ti fer serten letan. Me mon krwar nou kapab bouz dan en lot fason, par *involving* bann diferan *stakeholders* dan distrik ki ava ganny kriye, ki ava ganny, annan bann konversasyon, annan bann kontra. Bann diskisyon avek zot, ki zot ava pare ler i annan en, en sityasyon ki zot ava kapab vin donn en koudmen. Menm si fodre annan serten peyman byensir, me zot ava kapab pare vin donn en koudmen.

En travay kordinen, zot ava annan lekipman e fer tou keksoz byen e efektiv. E Mr Speaker mon pa kapab *trust* sa Gouvernman pou met an plas ozordi en keksoz ki'n bouz devan. Akoz parey mon'n dir mon vvar zot, zot tat tate bann

desizyon ki zot pran apre zot retournen. Zot dir en keksoz, apre zot *backtrack* lo la, bokou keksoz ki zot fer.

La par egzanp bomaten Mr Speaker nou war Minis i vini, vin diskrit en *Bill*.

Bomaten Minis i vini i dir nou i bezwen retir *Bill*, akoz i annan serten keksoz zot pa'n mazin lo la. So, ou konpran Mr Speaker, mon pa kapab *trust* zot pou kapab fer bann bon desizyon.

E, e pou mwan Mr Speaker i en, en *issue of trust*, *issue of* abilite Gouvernman ozordi pou kapab met an plas bann striktir efektiv pou kapab deservi pep Seselwa.

E Mr Speaker, en lot lenstans osi, par egzanp ler nou pe fer sorti bann - nou, nou kote latab nou fer sorti bann pwen pertinan dan letan Bidze. Lot kote latab i dir nou tou i *ok*. Bidze i bon san vreman fer serten gran, bann gran largiman parey ki zot pe fer ozordi. Letan Bidze ti sa letan oporten pou mwan, pou propoz en nouveau striktir pou brigad.

Akoz sete la ki sa Minister ti devan nou, *DRD* ti devan nou, Minister *Local Government* ti devan nou. E ler nou pe get Bidze, nou pe aporsyon larzan, nou koz lo la, nou refer striktir e ti en loportinite osi pou

Gouvernman ler i pe fer striktir i pe fer son Bidze pou li propoz en nouveau striktir, si sa letan i ti santi poudir ti merite en nouveau striktir.

Me parey ankor mon pe dir Mr Speaker, i mank en vizyon, i mank en nouveau fason fer. Malgre in ganny dir i annan sanzman, transformasyon. Me pou mwan lefe ki sa pa'n arive e in bezwen vin atraver en Mosyon, menm sa Mosyon li menm li in mank sibstans, i mank vizyon ladan, pou mwan Mr Speaker, sa i montre en mank direksyon.

So, mwan mon ti a voudre vreman voudre kapab vwar sa deba al dan en lot fason, en lot direksyon. E bann propozisyon dan en lot direksyon, me malerezman i pa'n arive. E mwan mon senserman krwar ki sa direksyon ki la ki nou devret pe ale Mr Speaker.

An di-z-an sa Mr Speaker, mon krwar ki louvraz or annan en serten lorganizasyon a nivo distrik pou dil avek bann sityasyon dirzans e evantyalite ki arive. Menm si i pa en sityasyon dirzans, me evantyalite ki kapab arive, i neseser e mwan mon ti ava enplor Gouvernman ozordi pou pran sa propozisyon, sa bann propozisyon ki mon'n mete.

E nou bezwen valoriz nou bann dimoun ki dan brigad, nou bezwen valoriz zot akoz zot fer bann louvraz eksepsyonnelle. Malgre in ganny refer taler ki annan ki bwarer, ki isi, ki laba. Me sa bann dimoun i la i volonteer e zot in fer bann louvraz eksepsyonnelle.

Nou bezwen revwar, re *strategize*, gete ki mannyer nou kapab. Petet a re azout dimoun differan kapasite, differan *knowledge*, differan *know-how* pou fer sa louvraz kordinasyon ki parey mwan mon krwar nou devret pe vvar dan distrik.

E servi nou bann kontrakter, nou bann dimoun ki deza annan lekspertiz dan distrik pou enplimant sa bann louvraz. E nou brigad ava kordin sa bann louvraz, zot konn nou bann lokalite. Zot konnen kote bann landrwa ki annan problem, kote ki kapab lev en *issues* ler i annan lapli, ler i annan movetan. Ler i annan en keksoz ki arive.

So, servi nou brigad pli efektivman dan sa fason. An terminan Mr Speaker, mon osi mon pou zwenn avek lezot dimoun, sirtou lo kote mon latab la ki'n remersi bann dimoun ki'n fer sa louvraz parey mon'n dir.

*Over the years* in annan en kantite, i annan ki ankor la,

i annan ki'n kit nou. Mon konn dimoun, mon annan fanmir ki'n travay dan brigad. Mon konn dimoun e mon remersi zot pou sa louvraz, malgre ki in annan serten alegasyon lo zot ki'n ganny dir zot, i annan ki sou, i annan ki malad pa kapab fer isi, fer laba.

Konmsi en tim kasap, kasap ki pa kapab travay. Me mwan mon remersi zot e mon ankouraz zot pou kontinyen donn en koudmen dan zot distrik. Akoz tou distrik i bezwen tou son zabitan, e dan sa laliny mon krwar Mr Speaker zot pou bezwen kontinyen donn en koudmen kot i neseser.

Me parey mon'n dir sa Mosyon pou mwan i pa al ase lwen e mon ti a voudre vvar serten bann propozisyon. Mon ti a voudre ki Onorab i adres sa dan son ladres. Avek sa Mr Speaker, mon a termin la. Mersi.

### **MR SPEAKER**

Mersi Onorab.

### **MR SPEAKER**

Mon a donn laparol Onorab Uranie.

### **HON ROCKY URANIE**

Mersi Mr Speaker. Bonn apre midi tou koleg Onorab, bonn apre midi tou zabitan Zil Pros ki

a lekout e byensir bann dimoun ki form par brigad.

Mr Speaker, lespri volontarya i en keksoz ki mon Gouvernman in toulstan ankouraze, e sa i vin atraver en ledikasyon depi byen zenn dan lekol, dan lakour pou fer zanfan aprann apresye e devlop lanmour pou zot lekor.

Lanmour pou zot frer, pou zot ser, zot zalantour, pei e osi devlop en koutim rann servis an zeneral. Bann dimoun ti zwenn brigad ti fer li lo en baz volonter akoz sa lanmour ki zot ti annan pou ed lezot e pei parey mon'n dir.

In toulstan dan nou kiltir dan tou kanton kot nou ti viv, tou dimoun ki ti kapab ti zwenn lo en baz volonter pou ede kot en vwazen oubyen dan en kominate ler en maler i arive. Pou ede soulaze, rezourd problemm e fer keksoz sey retourn normal, dan en kourt dele letan posib, pou ki lavi i kontinyen dan en fason normal.

Mr Speaker, pou bokou lannen sa sistem brigad in marse e nou'n temwanny plizyer lenstans kot brigad in asiste bann *firemen*, lapolis e lezot groupman dan pei dan bann sityasyon dezas ki'n arive kot lakour, lo semen, annefe preski partou dan pei.

Mr Speaker, brigad ti an kadre anba en sistem lo nivo distrik e zot ti ganny kontakte pou bann *meeting* e fer serten *training* pou kit zot aktiv an relasyon avek sa travay dirzans pandan bann letan kritik ki nou fer fas avek. Ti annan en sistem ankadreman ki ti kler an plas. Mr Speaker i vre pa tou keksoz ki parfe i kapab ti annan enn de defayans dan fason fer serten keksoz. Me lesansyel ti la e bann brigad ti ganny valorize.

La Mr Speaker mon profite pou dir en gro mersi tou bann volonter lo nivo distrik e pei ki ede fer sa travay brigad, sirtou La Digue pou ede degaz lasasen parey nou dir ler i annan en dezas. So, dan mon distrik nou pa parfe me nou tim brigad i la sak fwa i annan en keksoz, zot in toulstan pare. Akoz i annan en striktir ki pe fonksyonnen.

Brigad Mr Speaker pa zis ede zis letan dezas, me osi fer travay volonter parey netwayaz dan bann kwen dan distrik. E ler i annan *Clean Up The World campaign*, la ankor ou vwar zot in mobilize pou retir bann salte, pou kit distrik e pei prop.

Bann dimoun ki form par tim brigad Mr Speaker, zot bann dimoun ki nou frer, nou ser zot osi en papa, zot osi manman. I annan menm granmanman, i annan menm ki

granpapa, ki pare pou donn zot letan pou rann servis lakominote.

Me Mr Speaker nou tou nou konnen lavi brigad i pa an roz, e parey mon'n dir pli boner ou bezwen annan dimoun ki annan lanmour serye e dimoun ki vreman montre komitman serye pou fer sa travay.

Pou *être* fran, brigad parler i santi zot dekouraze sirtouler i ariv bann dezas kot bann lakour, kot zot vin ede. Letan zot pe travay e son met lakaz, garson, tonton olye donn en koudmen me zot plito get bann brigad kot pe travay e zot, zot pe zis konpetans sa bann Brigad dan plas donn en koudmen.

La mon oule lans en lapel for avek tou dimoun, ler en dezas i arive silvouple vin donn en koudmen. Vedir vin sipor nou bann brigad, pa asize pou zis gete apre pou konplent. Akoz sa bann dimoun ler dezas zot ti kapab kot zot, zot osi pe asize ek zot fanmir. Zot in deside dan letan lapli, dan later rouz ki'n deboule, zot la zot osi pe riske zot lavi pou sey rezourd problemm.

Mr Speaker, dan lepase brigad ti ganny *training* dan *preparedness*, e bann *training* ti ouver lakominote. Koumsa sa ki ti santi i kapab ede ti ankouraze pou vini pou ganny

plis dimoun ki kapab zwenn sa mouvman.

Mr Speaker, bann brigad byensir zot bann dimoun ki bezwen an bonn sante parey nou dir. Me i pa anpese en dimoun ki annan tansyon, dyabet oubyen ke maladi kelkonk pou zwenn brigad. Akoz dan brigad toulstan si ou'n byen striktir li, i annan plas pou tou dimoun kapab ede zwe son rol dapre son konpetans.

Mr Speaker, Lotorite Distrik ti annan en rikord lekel ki ti annan serten zouti ou masin spesifik parey *excavator*, pou fer bann gro louvraz. Me bann lezot zouti parey lapel, pyos, masin koup dibwa sa distrik ti annan a dispozisyon. Me la ki nou vwar sa i pa leka, vedir Gouvernman dizour i bezwen met plis resours a dispozisyon brigad.

Me dan Bidze nou pa tann personn koz lo la, pou fer ki larzan i ganny mete ver sa. Mr Speaker, bann brigad i ganny an mwayenn R125 par mwan ki pa en gran keksoz. Mon ti a swete ki la plis *incentive* i devret al anver bann brigad pou kontinyen motiv zot. Toulstan zot in koz sanzman, transformasyon e la pa tro lontan mon'n tann nonm fristrasyon.

Me mon vwar zot pe swiv dan lepa nou Gouvernman, pe fer menm parey, pe sey vini, pe swiv menm sistem brigad. Mon ti a swete zot vin avek bann lide inovativ parey mon koleg avan mwan in dir dan fason pou zot kapab fer sa sistem brigad marse.

Mr Speaker, brigad tou dernyerman zot dekouraze ankor, akoz bann mankman ki zot pe demande. Me Gouvernman i tarde delivre, oubyen pa fer ditou. Pres 3an zot la, mon pa krwar parey mon'n tann en Onorab dir avan, dimoun i per pou apros sant kominoter akoz sa ti ale avek en bann pti group.

Me mwan mon pa krwar dimoun i per pou apros sant kominoter, me plito zot bezwen demande ki zot pe fer ki dimoun pa oule koste. Zot bezwen demande sa. Ki zot pe fer ki dimoun pa oule koste? Mr Speaker, plizyer fwa mon'n tande isi anndan ki sa Gouvernman napa problem e i efikas. E la Mosyon i montre klerman poudir ki Gouvernman i annan problem e i annan inefikasite.

Alors mon swete ki Gouvernman i a pran konsiderasyon anmennen par Manm *LDS*, pou li anmenn

serten efektivite dan sistem brigad.

Mr Speaker anmenn *drone*, anmenn pyos, anmenn lapel, sa bann zafer zot menm pa ale pou fer travay. Nou bezwen annan en sistem brigad ki vreman kordinen depi A ziska Z. Pour ki dimoun i konnen ki zot pe al fer, kote i komanse. Non pa zis *MNA* li i ganny en *call*, i *call* tim brigad i dir annou. Non, pa marse koumsa. Sistem brigad i bezwen ganny byen restriktire parey Onorab Aglae in eksplike lo komansman.

So, alors Mr Speaker Mosyon li menm ler mon gete, i ti kapab al en pe pli lwen pou montre plis sa *seriousness*, pou montre plis sa langazman pou vreman pe met presyon lo Gouvernman pou vin avek en keksoz pli modern, pli realistik ki pou fer marse.

Me ler loter Mosyon li menm kot i komanse, i komans al dan bann demagozi, ou vwar poudir li menm li in gat en pe son Mosyon e alors Mr Speaker, mwan mon pa santi ki zot pou anmenn vreman sanzman dan sa sistem brigad.

Akoz mon pa'n tann zot anmenn okenn bann, bann serten sizesyon ou solisyon ki mannyer zot pou vreman fer

brigad marse. Me zis zot pe lans lapel ek dimoun pou vini.

So, alors Mr Speaker, mon swete ankor enn fwa parey mon dir ki kekfwa Gouvernman i ava ekout sa Mosyon e a pran serten aksyon. Mersi.

### **MR SPEAKER**

Mersi Onorab. Mon a pas laparol Onorab Gabriel.

### **HON CONRADE GABRIEL**

Mersi Mr Speaker. Bonn apre midi tou dimoun a lekout spesyalman bann dimoun Pointe Larue.

En dimoun pe zis demann mwan pou repas en pti pe ki Mosyon nou pe diskite apre midi. Mon a zis dir li fer konnen bann zabitan ki pe ekoute, Lasanble pe demann Gouvernman pou revwar striktir Brigad Dirzans dan bann distrik avek bi pou fer li vin pli efektiv.

Mr Speaker, mon santi ki zot pa senser ek sa Mosyon e mon pou sey eksplike akoz. La dan mon distrik i annan dimoun kle ti form parti sa brigad e ki nepli la *or* ki nepli ganny *call* mon site enn de. Mon annan Jimmy Rachel, Wilfred Moustache, Elvis Mellie, Gerald Malbrook, Brian Quatre zis pou nonm enn de. E si nou annan en defen, ki mon mazin tre byen

Michel Jean ki pandan ki i ti pe fer en louvraz kominote pou distrik anler Matata i ti trazikman perdi son lavi.

E senser kondoleans ek lafanmir ankor enn fwa. E la mon felisit Pricilla Bristol ki pe seye, sey son mye pou kit sa brigad ansanm malgre tou difikilte.

Tou in sanze e mon vwar i annan en zwe politik ki pe antre ladan, e la Onorab Vidot in eksplike tre byen. Olye aranze, zot in deranz preski tou keksoz, 3an pe al arive ni en *proper* lalis \*voter - lalis dimoun ki lo brigad nou napa.

Preski 3an napa pyos, lapel, gran kouto e zouti apropriye pou fer fas ek dezas, Mr Speaker sa i pa akseptab.

Bokou distrik brigad in dezentegre e par kont se zot prop dimoun ki ansarz bann biro brans, Point Larue toultan brigad in fonksyonn byen. E i malere zis apre sa swadizan sanzman e ozordi transformasyon tou pe gate e nou bezwen anmenn en Mosyon dan Lasanble pou sey rezourd sa problem.

I malere pou ekout en Manm Onorab ki laplipar letan pa la dan distrik pe koz lo dezas. Pou fer li pli gou in al pli lwen poudir ki bagar dan distrik i en dezas e osi brigad i bezwen

kontrol lafoul. Be zot kot nou pe ale? Kot nou pe ale ek sa kalite? Kot brigad i antre ladan? I montre nou ki sertern nou, nou zis koze san pran kont ki nou dir. Politik bon marse nepli fer sans, si ou napa naryen poudir, pa dir naryen Onorab.

**(APPLAUSE)**

### **HON CONRAD GABRIEL**

Mr Speaker nou pe donn R1500 en dimoun ki pou lo brigad a lafen lannen. I enteresan, me selman larzan i pa fer fwa. I annan ki pe sizere nou donn larzan tou le mwan.

Mon panse ki i pa meyer solisyon si nou pe anvizaze devlop sa lespri voluntarya. I enportan note ki zis 15 dimoun ki pou ganny sa benefis R1500. Sa mon panse i pou kre en de balansman dan lafason ki sa travay pou ganny fer. Zis pou note ki mon pa *against* okenn dimoun pou ganny en pti reveni, en pti larzan.

Me selman Mr Speaker nou bezwen annan bann lezot form, bann lezot fason fer pou nou kapab donn en reminerasyon ki egziste apre ki nou'n fer fas ek en dezas. Mon krwar apre ki nou'n fer fas ek en dezas tou dimoun i devret *get along, get together*, fer en *briefing* e laplipar di-tan bann

dimoun ki ganny mete lo lalis zot pa la letan dezas.

Avek tou respe ki mon annan pou *mover* Mosyon, lentansyon i bon. Me sertern Onorab lot kote latab in konpletman gat sa Mosyon an retournan dan lepase.

Zot pa senser ek sa Mosyon, zis parey Onorab Cosgrow in fer resorti an detay. Zot ki la, zot in ganny manda e zot ti dir zot pou fer pli byen. E la nou pe vvar Mosyon apre Mosyon ganny anmennen zis pou sey zistifye fason fer pli byen. Brigad i bann *first respondent* vi ki zot baze direkteman dan distrik. E apre bann lezot antite i antre an fir an mezir parey Onorab Aglae in fer resorti, pa tou keksoz ki konsern brigad direkteman. Me selman zot la pou *provide* sertern lasistans.

Mr Speaker, mon santi senserman ki sa Mosyon zot pa senser *deep down*. Avek sa 2 mo, mon a dir zot mersi.

### **MR SPEAKER**

Mersi Onorab. Mon aprezan donn laparol Onorab Herminie.

### **HON WILBERT HERMINIE**

Mersi Mr Speaker. Bonn apre midi Mr Speaker, tou Manm koleg Onorab e tou dimoun a lekout.

Mr Speaker, mon anvi komanse par remersi bann endivid'i ki lo bann brigad dan atraver pei, pou sa bon louvraz ki zot pe fer. Zot in donn zot letan, zot in donn zot kouraz zot pe fer sa travay avek zot leker e mon tir *chapeau* a zot.

Mr Speaker, l'administrasyon oparavan ti kre diferan striktir, e in met li an plas pou dil ek bann evantyalite sirtou dezas lo diferan *scale*.

*Be it* lo kote pei, rezyonal ou distrik. Sa bann lankadreman ti ganny mete la akoz nou Gouvernman ti annan en leker e i ti okouran, e i ti plan pou sa bann evantyalite.

Nou'n met *DRDM* lo lipye, en lazans ki pou kordin loperasyon dan bann letan dezas. La osi mon pe mazin dan letan *Felleng*, nou ti kree *Drainage Task Force*. Kot bokou proze ti ganny konsevwar e pa zis proze, bann landrwa ti ganny idantifye kot i kapab annan ki ler dezas i arive ki kapab annan blokaz ki kapab ganny netwaye. Ou serten proze kapab ganny fer pou *mitigate* sa sityasyon.

So, bokou plan ti deza la e mon ti ekspekte ki kekfwa loter Mosyon ti ava koz en pe lo sa bann plan ki ti la, bann ki'n komanse e ki i ti pou dekoul dan distrik kot kwa ki bann

brigad egzistans ti kapab pe atake pou anpes sityasyon vin pli grav dan en letan dezas.

Nou'n travay nou, la mon pe mazin proze Anse Aux Pins, kot en *channel* ti ganny fer pou deblok sityasyon dan levantyalite en *flooding* Au Cap.

Mon osi mazin La Digue, kot ti annan 2 gro *channel* ki ti ganny fer e osi mon pe mazin *desilting* dan lanmar. So, bokou keksoz in ganny fer, me mwan mon ti eksepte ki sa bann dekoulman ti ava'n kontinyen ganny fer dan bann distrik atraver sa bann brigad ki ti'n ganny met an plas.

E pou mwan mon vwar li drol ki sa pa'n ganny fer vi ki zot ti dir nou ki zot pe kontinyen louvraz ki L'administrasyon Faure ti fer, komanse. Akoz zot in zis kontinyen lo keksoz ki ti la, so mon ti ekspekte ki sa bann keksoz in ganny fer.

Mr Speaker, ler nou met politik dan travay dezas, sa pou mwan, mon vwar li i pa normal. Akoz dezas li i pa gete si ou *SPPF*, si ou *LDS* me ler i vini i afekte nou tou. I afekte nou tou e nou bezwen sa bann dimoun, sa bann volonteer pou vini pou vin donn en koudmen.

Me ki arive. Ler nou met politik dan sa bann keksoz pou diviz nou, sanmenm sa ki nou vwar Onorab Roucou. Ki

personn pa vin kot ladministrasyon distrik. Akoz nou pe tro diviz sa pep, avek politik.

Mr Speaker, dezas i en keksoz ki pa averti. Nou kapab kot nou dan en pti aktivite. Nou kapab kot nou pe dormi, me ler dezas i arive nou pa kapab blanm sa bann dimoun, dir zot, zot ti sou. Ouswa zot bann dimoun aze. Akoz zot tou zot annan *purpose*. Si en dimoun i sou, sa dimoun ki pe kordin sa loperasyon i dir li koumsa be tenir en kou, ou anba lenfliyans.

So, nou bezwen pa blanm sa bann dimoun. Akoz dezas i pa ariv zis dan movetan li, i pa swazir ler, i pa swazir zour. Nenport ler i kapab arive e kontrer nou devret ankouraz sa bann dimoun. Koz ek zot, dir zot, "Be ki *next time* ler ou vini, vin en pe dan en pli bon kondisyon."

Mr Speaker i enportan note ki dan letan oparavan, anba ladministrasyon avan bokou in ganny fer lo kote met resours pou sa bann brigad. Bokou in ganny fer, me la dan sa 2an edmi bann Onorab lot kote latab pe dir nou ki tou bann lekipman in ale.

So, mon ti a kontan kekfwa demann zot ki zot in fer ek sa bann lekipman, 2an edmi

zot in la lekipman in perdi. Mr Speaker.

*(Interruption)*

### **MR SPEAKER**

Silvouple.

### **HON WILBERT HERMINIE**

Bokou keksoz in ganny fer par ladministrasyon oparavan pou ed nou bann frer. Nou bann dimoun lo brigad zot in travay avek zot lanmour, avek zot leker pou ed zot bann vwazen, zot kominate e Sesel an zeneral.

Me nou annan en Gouvernman ki pa le ekoute, zis parey yer nou ti tande ki zot in anmenn en *Bill* ki dayer *Leader Lopozisyon* ti dir zot ki annan serten konsern avek. E ki nou vvar ozordi, zot in retir sa *Bill* e zot in met li laba dan bife.

Mr Speaker, nou trouve ki sa Gouvernman i pa le ekout sa pep, ni menm son bann dirizan dan son prop distrik. I enportan ki nou ekout sa pep, nou ekout sa bann dirizan. Nou anmenn bann bon lide, fodre ki nou ekoute e nou ekout nou bann *MNA* ler i koze. Pou zot kapab, pa bezwen al dan bann direksyon kot nou bezwen vin dan Lasanble Nasyonal pou sipliy nou prop Gouvernman pou fer prop Gouvernman fer keksoz.

I zis montre nou ki sa Gouvernman i pa ni menm ekout son prop *MNA*, sa i en keksoz ki mon vvar li drol. Annou silvouple ekout nou bann dimoun! Mersi Mr Speaker.

**(APPLAUSE)**

**MR SPEAKER**

Mersi Onorab. Laparol pou Onorab Pillay.

**HON SEBASTIEN PILLAY**

Mersi Mr Speaker. Mr Speaker mon okouran i annan en lot Manm in lev lanmen lo kote mon latab, Onorab Loze.

**MR SPEAKER**

Wi, mon pa ti okouran. Onorab Loze. Ou ti lev avan li? Me mon a donn ou laparol la, si mon'n manke. Mon pran ou parol ki mon'n mank ou. Onorab Loze.

**HON JOHAN LOZE**

Mersi Mr Speaker. Mr Speaker, i avek en pe regre ki mon pran laparol pou adres sa Mosyon ozordi.

Mon dir regre akoz Onorab Regina i en *very hardworking Member of the National Assembly*. E tou keksoz ki i anmenn devan Lasanble Nasyonal i bezwen ganny trete avek respe, parske i sorti dan

en landrwa senserite letan i anmennen.

Mon santi selman ki i possibleman Onorab pa'n ganny ankadre. Mon santi Onorab pa'n ganny led ki i ti bezwen pou ed li ankadre son Mosyon. E klerman pa zis li akoz Mr Speaker mon krwar ou menm ou a remarke ki tou bann Manm dan ou parti ki'n koz apre Onorab zot in kontribye pou *drag* Mosyon ankor pli ba.

Mr Speaker, les mon komans avek en lartik lo website *DRMD* date le 28 Avril 2022 ki entitile;

*'DRMD and Local Government hold workshop'.* En *half day workshop* ki ti ganny *held* dan *Ocean Gate House* dan *Board Room* kot *Community Affairs*. Si mon sot lo son dezyenm paragraf i dir ou "*the workshop kicked off by a presentation by DRMD's Chief of Operations about DRMD's functions and programs. Followed various heads of units explaining the functions and programs of their respective portfolios. A number of different items were discussed.*"

Mon'n al laba akoz nou tou nou konnen ki brigad li i anba *Local Government*. E sa ki nou'n vvar la se ki *DRMD* avek *Local Government* zot in *meet*, zot in diskite bann keksoz ki ti

annan pou zot diskite e in annan lesanz lenformasyon.

*Now, si resers ti'n ganny fer pou ankadre sa Mosyon nou ti pou'n remark serten keksoz. Premyerman, konmkwa ki DRMD according to son mandate, i pe ofer training. Si ou al lo son paz Facebook DRMD;*

*'The DRMD with the corporation of other organizations, aspires to require volunteers to assist before, during and following times that the country faces major emergencies or events that adversely affects the communities.'*

Zot annan *volunteer forms available for download* ki kapab ganny akse avek pou anrezistre ou lekor koman en volonter avek DRMD.

*Now, enn bann keksoz ki sagrin mwan la Mr Speaker, nou koman Manm Lasanble Nasyonal nou kontan fer Komite, nou fer meeting, nou al bann landrwa nou fer bann rankont, nou vin dan Lasanble nou raporte lo sa bann travay ki nou'n fer. Be letan nou al sa bann zafer nou pa ekoute?*

Mr Speaker, mwan kot mon ti konnen poudir DRMD pe anrezistre volonter e pe donn *training* volonter, se letan mon ti al kot DRMD avek Komite IAC

ki mon ti tann zot mansyonn sa. Zot ti dir nou.

Be ozordi mon tann bann lezot Manm Komite ki ti *attend* sa sesyon ansanm avek mwan, olye anbelir lo sa ki nou'n tande, pas lenformasyon korekteman nou asiz dan Lasanble nou kraz DRMD.

Bon, mwan DRMD it's neither here nor there. Dan kanpanny Mont Fleuri letan mon ti pe filme, fer *photoshoot* mon kandida dan laplenn Kolez sa dimoun ki ozordi i Direkter Zeneral DRMD ti pe monte desann dan en loto pe veye ki nou pe fer ziske ler mon ti bezwen ale apres li koz ek li dan son loto.

Nou ti fer nou en konversasyon, nou ti *agree to disagree*. Be selman i mon oponan politik e ozordi i Head DRMD. Be sa i pa en rezon pou mwan zis vini koz negativman lo en lenstitisyon. Kan mon ganny lenformasyon korek. Be nou bezwen konnen ki nou fer.

Further Mr Speaker, mon pou refer Lasanble Nasyonal Sesel e tou dimoun ki a lekout lo Lalwa ki gouvern DRMD. E si nou al lo Lartik 33 - 33 (1) i dir ou;

*'The Director General shall maintain a register of volunteers to be known as the Register of Volunteers'.*

Bon, sa bann drol fason ekrir Lalwa ki nou annan.

*2. “A person who wishes to volunteer for the purposes of assisting in an emergency or a disaster, shall submit his or her name to the Director General for registration as a volunteer and the Director General shall, after undertaking a screening process” bla, bla, bla. Les sa i pa sa bout ki pli enportan.*

Annou al lo 33(3). 33(3) i dir ou; *“The administrator of each district shall submit in writing to the Director General on or before 1<sup>st</sup> day of January in each year, the names of the volunteers and the Director General shall after a screening process, register the names of volunteers who he or she sees fit, in the Register of Volunteers”.*

Ou konpran? Nou'n anmenn en Mosyon. Nou pe demann serten keksoz, nou pe demann lankadreman, nou deza annan lankadreman legal anba Lalwa DRMD, selman nou pe kraz DRMD. Prezan sa bann brigad, taler mon'n tann nonm brigadye, les li. Sa brigad i tonm anba *l'égide* Minister Gouvernman Lokal.

Mon'n deza etablir la ki dan en lartik date 28 Avril 2022. 2022 ti anba Gouvernman sanzman,

transformasyon, fristrasyon sa. Anba zot Gouvernman. *Local Government* avek DRMD zot in fini *meet* zot, zot in koze zot in esanz parol. In fini etablir kote striktir i ete, striktir legal i anba DRMD.

Now, nou pe rod bokou *training* in ganny dir, Manm pe rod *training* a gos e a drwat. *Training* pe ganny donnen par DRMD. Lavertisman i dan medya, wi i dan medya bann Manm e lavertisman i lo zot paz Facebook. Mon pe met bann fe devan zot. Zot kapab verifye Lartik 33 e Lartik 35 anba Lalwa DRMD.

So, nou'n esansyelman vin rod bann keksoz ki deza egziste. Be i egziste nou kapab ganny dir ki i pa pe ganny pratique, be se zisteman sa ki nou ti devret pe petet debat ozordi. Pou nou met kad dan son bon konteks e son bon laplikasyon. Anvoy li dan sa direksyon kot sa kadreman legal, sa bann *training* kot i devret pe ale.

Nou ti a kapab propoz bokou keksoz ki ti pou byen e pou bon ki ti pou aport rezulta pou nou bann dimoun dan distrik. Be nou pa'n fer sa nou. Nou'n komans par rod SPPF, milisya, aktivis Parti SPPF. Be ou konnen ki arive letan nou fini dir sa?

Koman nou fini dir milisya, milisya i vini i dir Brigad ti bann bwarer e bann enkapab. Koman nou fini dir aktivis SPPF, aktivis SPPF i vini i dir ou koumsa dimoun konmela dan distrik pa enterese pou vin partisipe avek li dan distrik. Nou konpran? Eski nou konpran?

Be si nou ti'n *focus* lo travay ki ti annan devan nou, nou ti'n fer nou en *minimum* resers, nou ti'n get dan Lalwa e ozordi Onorab Georges pa la. Onorab Georges i fatige dir nou, nou pa lir Lalwa nou lo sa kote. Be mwan koman IAC ti dir nou pe al *meeting* laba, mon ti pran zot Lalwa mon ti get ladan ki annan, ki napa.

Se pour sa ki mon'n vwar sa. Se sa rezon ki ozordi mon konnen i annan sa dan Lalwa ki mon kapab vini dir zot, be zot pa'n gete zot. Klerman zot pa'n fer okenn resers. Personn lo zot kote latab pa'n fer resers pou siport Onorab Regina dan son Mosyon.

Zot in kit li, li tousel dan son petren e Onorab Regina se sa rezon mon pe dir mon leker i en pti pe lour ozordi, akoz mon santi ou douler mon ser. Ou dan en *very lonely place* ozordi.

25 zot dan sa Lasanble *including* Speaker ki attend zot Caucus. And this is the best

*performance you can put on.* Sa i le meyer ki zot in kapab donnen, vini maltret dimoun bwarer, maltret dimoun enkapab. Dimoun ki'n travay, ki'n volonter, ki'n dedye son letan volonterman. Vini maltret dimoun enkapab!

Zot konpran konmsi ki nivo gaspiyaz letan nou'n arive isi dan sa Lasanble? Nou ti'n kapab etablir tou sa bann fe fasilman. Mon pa ti'n prepare pou sa Mosyon mwan. Mon'n asize mon'n prepar mwan la par la fason ki mon ti tann zot pe koze, mon ti konnen o fon mon leker i bezwen annan en meyer fason pou nou apros sa.

E mon'n dir mon pou pret mon zepol mon koleg Onorab Regina pou mwan esey elev son Mosyon en pti pe pli o parske bann vre enkapab pa'n kapab ed li ozordi apre midi. Zot pa'n kapab fer naryen pou elev son Mosyon. In napa en foud sou kontribisyon sibstansyel mazer ki'n sorti lo zot kote latab.

E si i annan en keksoz ki mon'n tande sorti kot zot ozordi se ki zot in konplent zot Gouvernman. Zot in konplent zot Gouvernman an mor. Zot in vid tou zot fristrasyon apre zot vini zot demann swivi, be swivi nou ti'n fini fer. Lenformasyon nou ti'n fini gannyen. DRMD ti'n fini dir nou ki i pe fer.

Prezan mon ti'n ekspekte zot vini vin siporte. Ki mannyer mwan mon kapab siporte menm si *DRMD* i ganny zere, *headed* par enn mon oponan politik? Ki zot, zot vini zot bezwen vin fer en nespes politik dezas avek dezas. I en konpreansiv ki mannyer zot in tonm dan sa kalite depi, ki zot prop Mosyon zot trenn li net anba!

*And this is what you did ozordi. You dragged this Motion into the gutter!* Kan pa ti neseser. Zero preparasyon, zero preparasyon. Mwan mon'n asize mon'n prepar mwan la anndan pandan letan ki zot, zot ti pe koze. E mon'n vin avek fe. Be nou pou kontinyen koumsa?

E mwan mon konnen akoz zot pa'n prepare, zot ti'n kont lo nou pe angaz avek zot, pe samaye, pe ise bose la zot ti a vini zot ti a maltret nou. Zot ti pou fer ban *speech* pirman politik e zot *still* pa ti pou'n siport Onorab Regina.

Sete sa ki zot ti'n *plan*, be nou'n refize angaz avek zot, nou'n prefere ekout zot. E i byen nou'n ekout zot. Akoz zot in asize zot in kadas zot prop Gouvernman e zot pa'n siport zot koleg e zot in *drag* zot Mosyon dan labou.

E mon fatige dir zot mwan mon en dimoun ki koz fran

mwan. *Je ne mâche pas mes mots.* Mon dir zot kler. Mon pa pou kasyet zot! Mersi Mr Speaker.

### **MR SPEAKER**

Mersi Onorab. Onorab Pillay mon a donn ou laparol.

### **HON SEBASTIEN PILLAY**

Mersi Mr Speaker e bonn apre midi. Bonn apre midi tou dimoun ki pe ekout nou. Bonn apre midi tou koleg Onorab.

Mr Speaker mon'n ekout atantivman bann deba lo sa Mosyon. E lo nou kote latab ti annan detrwa Manm ki ti'n ganny angaze pou fer serten resers, serten preparasyon e mon enn bann Manm ki ti'n pran responsabilite pou fer en pe resers e preparasyon lo sa Mosyon.

Me parey Onorab Loze in fer kler apre ki nou'n ekout deliberasyon, nou lentansyon ler nou ti'n vwar sa Mosyon inisyalman sete ki i bezwen annan en bon keksoz ki Onorab pe rode vi ki nou konn son *background* byen. Me apre ki nou'n ekout bann entervansyon otour li in fer nou demann nou lekor si vreman son prop *Caucus* i serye otour deba ki pe ganny *entamer* atraver son Mosyon. Mon pe eksplik sa en pe pli byen Mr Speaker.

Premyerman annou aksepte poudir sa lespri voluntary, en bon pe letan in komanse petet bann ki pli vye ki mwan Onorab Georges pa la byensir Onorab William e Onorab Porice mon mazinen etandonnen bann milisya ti fer travay volonter dan bann distrik ti ede ek bann travay volonter.

E mon rapel tre byen akoz mon konn bann dimoun ki ti dan milisya sa letan. Me ti osi annan bann Komite bann Madanm ki ti agaze fer bann travay volonter e mon manman, mon defen manman ti en bann ki ti partisip dan bann travay volonter parmi bann Komite Madanm.

E enn bann travay ki mon rapel zot ti fer Glacis sete pour derasin bann feyaz ki ti annan an preparasyon pou fer kort Glacis e si mon pa tronpe sa letan en pe letan pase avan menm, Madanm Espanon pou konn byen, Onorab Espanon pou konn byen sa bann madanm Glacis lekel ki'n partisipe.

So in toulstan annan en kiltir voluntary. Voluntary i egziste lo tou nivo. Par egzanp Glacis i annan plizyer dimoun ki volonter en dimoun ki mon konn li tre byen mon apresye li bokou se manman Madanm

Espanon li menm, ki volonter avek legliz e i annan diferan laspe voluntary ki dimoun i fer.

Me o fil letan, i annan serten aktivite volonter ki dimoun in, sa bann dimoun ki ti angaz zot ladan e mon krwar Onorab Cosgrow in fer sa le pwen, kiltir e klima ki nou viv ladan in sanz en kantite o fil letan ki'n fer ki si ou annan en group dimoun ki volonter ou bezwen toulstan pe angaz ek sa group dimoun.

E mon krwar se la ki nou bezwen sitye kwa ki nou pe demande egzakteman. E mon ti soke ler mon'n ekout en pe bann lentervansyon ki'n sorti lo lot kote latab, akoz mon ti pe demann mon lekor kote sa bann Manm Lasanble ti la, ti ete pandan letan Bidze?

Mon'n swiv serten lentervansyon e mon pou refer lo serten lentervansyon pou mon kapab sey ganny en konpran. Par egzanp ler mon tann Onorab Samynadin koz lo resours sipor e in koz lo kordinasyon ki sipoze annan ek bann lazans. Me ler nou ti *challenge DRMD* dan Lasanble Onorab Samynadin atraver ou Mr Speaker, i ti felisit *DRMD*.

Ou felisit li, me apre ou dir ti annan mank korperasyon. Ler nou ti *challenge* Minister lo

resours e sirtou pandan deba lo Bidze, kot nou ti *challenge* Bidze Gouvernman e Onorab Samynadin e lezot ki ti koze, enkli Onorab Woodcock, ti dekrir sa koman pli bon Bidze. Me ozordi nou pe koz lo mepriz resours.

Onorab Waven William atraver ou Mr Speaker, i ti dekrir sa koman en bon Bidze me in ankor enn fwa demande ki plis resours i ganny met a dispozisyon distrik pou kapab organiz en brigad distrik.

E dan tousala nou konnen poudir par egzanp IAC ti angaz li avek DRMD e in annan en lesanz e in annan en letablisman kler, bann paramet travay ki sipoze ganny etablis anba seksyon 33 sa Lalwa, kot bann Ladministrater Distrik i sipoze *provide* en lalis bann volonter ki sipoze zisteman *end up* form par ou brigad distrik.

Mon ti a kontan konnen kote problem i ete alors ki si i annan tou sa bann mezir an pals, ki'n fer ki mon koleg i bezwen anmenn en Mosyon pou demann avek son Gouvernman pou sanz sa striktir. E le sel konklizyon ki mon kapab tonm lo la se ki Gouvernman pa pe ekout son prop MNA.

E mon annan laprev akoz mon pe dir sa Mr Speaker. Mon annan laprev konkret ki mon

pou *share* avek sa Lasanble, mon pou devwal avek sa Lasanble ozordi apre midi. Le 15 Zen 2021 Minis ki responsab pou bann Zafer Kominoter isi dan sa Lasanble e lo en kestyon ki ti ganny demande par Onorab Waven William ok. E Onorab William ti koz lo sa R2milyon, i ti dir; "Bonzour Minis avek ou lekip. Minis par lefe ki ou'n dir ou annan R2milyon anba ou Minister, mon anvi konnen si dan lavenir zot pou mazin desantraliz serten parti sa fon?" Premye kestyon.

Dezyenm kestyon "Par lefe ki letan en dezas in arrive i annan serten reaksyon vit ki ladministrasyon distrik pou bezwen fer, eski ou Minister pe mazin fer sa?" Ok.

Mr Speaker atraver ou mon annan en mesaz ki mon'n gannyen sorti kot Ms Fernand Sirame, Mont Fleuri ki'n arriv en dezas kot li e ki i annan 4 mwan i pe lager pou li ganny kontakte avek Lotorite konsernen. 4mwan. Ok, 4mwan.

E Onorab William i kontinyen; "Dezyenmman, eski osi zot pe mazin" e la kot i enteresan la, kot mon bezwen demann mon lekor si tou keksoz i dan *gearla*, "eski zot pe mazin revwar lafason ki lekip brigad dan distrik i ganny zere

an menm tan *training?*” Mon repet ankor.

“Eski zot pe mazin revwar la fason ki lekip brigad dan distrik i ganny zere an menm tan *training?*” Le 15 Zen 2021. *Fast forward almost 2an pli tar mou reganny en Mosyon, mon ti a kontan enn ant zot i dir mwan mon lalang ankor, e bannla ava fer ankor en video.* Mansonz ankor.

Nou ganny en Mosyon dan Lasanble - enteresan sa - Lasanble i demann Gouvernman pou revwar striktir Brigad Iirzans dan bann distrik avek bi fer zot vin pli efektiv. Le 15 Zen 2021 *MNA LDS* in fer menm demann ek zot Gouvernman ki Prezidan in dir son bann Minis pe travay pli byen posib e ki tou larestan dimoun pe trenn lipye, le 15 Zen 2021.

Eski zot pe mazin revwar lafason ki lekip brigad dan distrik i ganny zere an menm tan *training?* Egzakteman ki Mosyon Onorab Esparon pe demande. Premye laprev ki mon annan.

Prezan dezyenm laprev ki mon annan, larepons Minis. In donn Onorab en larepons lo sa fon 2milyon. I pe ganny zere sorti kot Minister li menm, savedir bann *MNA* pa satisfe avek lafason ki keksoz pe ale

me personn napa kouraz pou dir.

Nou pe fer sa larzan ariv lo distrik, pou fer sa bann dimoun i ganny afekte ganny dil avek. Sa ki'n ganny afekte pa pe ganny dil avek. Glacis, North East Point nou annan en lakaz in brile apre en dife e la sepa konbyen 1an edmi pli tar personn pa ankor kapab dil ek sa sityasyon.

Me Minis i dir sa li, enteresan sa. *Regarding brigad, larepons Minis mon quote* la; “Nou pe annefe, la i annan en legzersis ki pe pase” le 15 Zen 2021 ki sa legzersis ti pe pase. “Ki bann *DAs* in fini ganny demande pou revwar mon krwar i pe dir, regard zot brigad dan zot distrik ki sa i en zot bann keksoz ki zot pe fer an se moman. Ki zot bezwen regard lekel ki dan zot brigad, lekel ki vreman *turn up* ler i annan en dezas. Lekel ki zis son non i lo lalis me pa vin ditou”. Tousala *fast forward* 2an, menm keksoz ki ban *MNA LDS* pe koz lo la dan Lasanble.

Bann *MNA* ki dan ou parti, ki ou *Leader*, ki ou annan en Minis ki'n vin dan Lasanble, ki'n fer sa bann *statement* e i repet menm keksoz. Pa mwan ki pe dir, Minis ki pe dir dan *verbatim* e si Lasanble i oule

*verbatim i kapab tire pou vwar.*  
Ok?

Alor Minis i kontinyen, “i en *revamp* ki pe ganny pase, en *revamp*” savedir i pe ganny revwar. Dapre sa Minis, Brigad Dirzans pe ganny revwar. Me *MNA* pres 2an pli tar i bezwen anmenn en Mosyon pou demann Gouvernman pou revwar. Be eski napa komunikasyon? Napa okenn diskisyon ki pe arive?

Alors Minis in dir i en *revamp* ki pe ganny pase. I annan en fason fer ki *DA* pe fer la - mon pa konnen ki sa fason fer ki *DA* pe fer akoz i parey ki tou *MNA* lot kote latab pa konnen. Ki zot pe re get zot bann brigad, anmenn dimoun efektiv e kre en nouvo brigad tim dan zot tim brigad dan zot distrik. Be i bezwen annan en problem!

Apre ki mon'n ekout tou sa *MNA*, si nou *rewind* tou sa *speech*, tou dimoun pe vwar i an en problem *somewhere*. Minis i kontinyen. “I pa vedir ki serten dimoun ki deza lo lalis pa pou ganny dan sa tim, byensir bann ki toulstan nou vwar zot vin devan zot pou en dimoun kle”.

Onorab Gabriel in dir Pointe Larue ban dimoun kle nou'n kit ater.

“Me selman i pa anpes ou re get en kou lalis, gete lekel bann ki pa vini. Petet zot in fatige, zot in ase ede.” Minis pa'n dir sa bann dimoun i bwar, poudir sa bann dimoun in vole in dir petet zot in ase ede, rekonesans.

Annou rod lot dimoun – “me selman” - i kontinyen – “me selman nou oule dan tou distrik i annan en tim brigad efikas e byen for mersi.” En *commitment* en Minis dan Gouvernman *LDS* 2an pli tar ki i pa ankor materyalize e Prezidan i dir nou son bann Minis pe travay dan en fason efektiv.

*Either* Minis in akonplir sa ki in dir, se *MNA* ki'n anmenn en Mosyon i pa konnen ki Minis in akonplir or Minis pa ankor akonplir. E mon plito krwar i dezyenm akoz Onorab Esparon pa ti pou anmenn sa Mosyon si i pa ti santi i annan en *issue*.

Be la i annan en lot keksoz enteresan ki mon'n gannyen, en lot lenformasyon enteresan ki mon'n gannyen. Sa bann lalis bann dimoun brigad i ganny *shared* avek bann *MNA* e kot i danzere la - e mon kontan ki Onorab Gabriel in *raise* sa pwen *SPPF*. E in dir poudir dezas i pou arriv kot ou. Parey Onorab Herminie in dir ki ou *SPPF*, ki ou *LDS*.

So nou bezwen konpran ki pe arive avek sa sityasyon. I pa mwan, pa mwan ki'n dir nou pe regard e revwar e *revamp* brigad, se en Minis. Lotorite Legzekitiv ki'n dir sa.

Be nou pa kapab annan en Mosyon dan Lasanble ki koz lo memm keksoz, en menm kestyon ki en Onorab in demande petet Onorab in blyie i ti demann sa kestyon an 2021.

Set alor ki Lepep Seselwa i bezwen *wonder* si ler nou vin Lasanble. I bezwen mazinen eski ler nou vin Lasanble nou zis dir keksoz e nou pa mazin son konsekans demen oubyen nou pa swiv lo son konsekans.

Mwan mon regard sa koman en problem ki pa fasil pou rezourd. Akoz lo en kote ozordi sa ki mon'n tande se ki Lasanble pe demann avek Departman Kominoter ki swadizan pe fer en travay pou men konsidere ki ou pey en dimoun tou le mwan en *allowance*. Be plito ou anploy en dimoun, ou anploy en group dimoun pou form par en brigad distrik.

Me problem se ki ler zot ti komanse ti annan en *restructuring* konplet e ler dan Lasanble nou ti kestyon sa *restructuring*, lot kote latab ti siport Gouvernman 100 poursan lo la.

E atraver sa *restructuring* plizer dimoun ti ale. Bann *field technicians*, ti annan en bon pe bann *field technicians* ki ti osi fer *field technicians* e form par brigad distrik. Me zot ti ganny tire e la mon pou dir akoz zot ti ganny dri zot *SPPF*. Zot siport US. E sa ti ganny fer par Gouvernman *LDS*.

Me selman, selman apre nou vini nou dir US ki pe trenn lipye. Mon ti a kontan konnen ki largiman ki lot kote latab pou annan pou defet sa largiman ki sa ki en Minis in dir dan Lasanble, lo kestyon ki en Manm sorti lo zot kote latab in demande lo sa size brigad distrik.

Mon pou zis avans en lot pwen devan la ki enportan nou pran konsyans. I annan distrik zis *DA*, *OM* ek en manm brigad. I annan distrik lalis in ganny anvoye, nou pou *tick*. Nou ganny volonter me nou oule swazir lekel volonter ki pou vini, be ler en volonter i vini, pe enport ki i siporte ou pran en volonter.

Mwan mon krwar nou bezwen vreman *align* nou lekor. Nou bezwen konnen kwa ki nou pe demande. Sa zafer brigad distrik al dil avek *crowd control*, be sa louvraz lapolis sa - pa louvraz brigad distrik. I annan dezas ki brigad distrik pa

konpetan, pa pou kalifye pou dil avek. Sa ou pou bezwen bann dimoun ki *train* dan sa domenn.

Nou annan ansyen zofisyen Lapolis. Nou annan ansyen zofisyen Larmer la anndan zot konn tre byen zot, zot ganny *train* pou dil ek bann sitasyon spesifik. Par egzanp si i annan en sityasyon ki danzere, ki poz danze pou lavi. Se en solda ki bezwen vini oubyen en polisye ki bezwen vini depandan lo ki mannyer sa lensidan in arive. Lo lanmer en solda, me lo later se en zofisyen.

Se sa bann dimoun ki'n ganny *train* e sa bann dimoun mon krwar zot menm zot. Mon krwar enn ler nou pa fer zistis non prop Lasanble, akoz petet ti ava bon nou ti'n demann ek sa bann zofisyen ki travay ek nou Lasanble, ki zot ti fer dan zot fonksyon. Zot ti a kapab donn nou en pe nide avan nou zis vin koze e dir nenport kwa.

Akoz la mwan mon pa pe dir nenport kwa, mon pe dir ki Minis ti dir ki *regarding* brigad distrik sa pe ganny *revamp* lo en kestyon ki Onorab William ti demann li. E mon vwar i drol Onorab William pa'n al reget son kestyon.

Pa ankoler ek mwan, zot pa kapab ankoler ek mwan si Minis pa'n delivre lo son travay.

Zot bezwen ankoler ek Minis, zot bezwen ale dil ek Minis. E mwan mon'n dir Mr Speaker e personn lo mon kote pa'n oule dir sa bomaten. Mwan mon pe vwar en group *MNA SPPF* lo lot kote latab, ki Gouvernman tou keksoz ki i fer i byen.

*Sorry* pou dir koumsa. Se sa. Akoz zot ti dir nou sa zot, zot ti dir nou pou *SPPF* tou keksoz, be koumsa ki pe arive ozordi e si nou pa pran en aksyon nou pou annan problem.

E mwan mon pe dir avek Onorab, nou lentansyon ler nou ti vwar ou Mosyon lo komansman sete, *ok*. Be ler mon pe fer resers, mon pe regarde, mon pe vwar poudir be tyonbo en kou i annan en keksoz ki pa pe aziste la. *Either* gouvernman pa pe ekout bann *MNA* or bann *MNA* pa konnen ki Gouvernman pe fer.

Si dezyenm keksoz, *then* Gouvernman i bezwen vin devan e eksplik ek Lasanble lo bann keksoz ki in dir, kwa ki in fer. E se pour sa rezon ki mon kontinyen met presyon lo bann Minis ler zot vin la. Ler mon met presyon lo Minis Devika pou li donn mwan lenformasyon, mon pa pe fer li akoz mon anvi met presyon lo Minis Devika. Mon pe fer li pour li donn lenformasyon piblik.

Akoz i annan dimoun ki zot lavi i depan lo zot aktivite biznes ki ganny trouve dan bann sit kot Gouvernman in donn zot en landrwa, pou met zot bis, zot aktivite. E si zot ale demen kote zot pou ale, e Minis pa kapab donn mon en *commitment* si i pou sey fer en fason pou rod en lot landrwa pou sa ban dimoun.

Mon pa fer li pou mwan, mon fer li pou sa bann dimoun ki mon konnen i en konsern pou zot.

Ler mon presyon Komisyoner Lapolis e son bann dimoun, e Minis pou bann *statement* ki in fer atraver lo bann ansyen azan *ANB*, mon fer li akoz i annan sa bann dimoun ki pe rod en louvraz, pe esper en louvraz e zot pe al dan en serten landrwa pe ganny dir zot pa pe ganny aksepte pou travay.

Ler mon dir ki *PMC* pe fer vini 2 konminyon pou li ponp son prop *sewage* lo son bann *site* e sa pou afekte bann operator, i pou annan en problemm ek bann operator. Mon pa fer li pou mon zis vin fer politik bon marse, mon fer li pou *alert* *PMC* poudir ou bezwen annan en diskisyon ek sa bann operator. E mon ganny trete koman mon'n koz mansonz dan Lasanble.

Be apre dan nouvel nou vwar poudir *PMC* menm pe dir poudir i pe fer vini konminyon.

Ler mon dir Komisyon Eleksyon pa'n avoy mwan en let, in avoy mwan *acknowledgement* e i al lo televizyon e *SBC* i donn li *prime time* pou li *mislead* Lepep Seselwa kot apre i avoy menm en larepons *almost 2* semenn pli tar en larepons kot i pa'n aksepte okenn demann. Mwan mon dir sa Komisyon pa fit pou *be* en Komisyon e zot devret dizourd imedyatman!

**(APPLAUSE)**

### **HON SEBASTIEN PILLAY**

Ler mon dir Mr Speaker ki bann Dokter dan Minister Lasante zot Moral i ba e zot pe ganny afekte, e nou pe vwar poudir i met en presyon lo sistenm lasante. Mon pa fer li, be akoz mwan mon servi sa menm sistenm lasante mwan. Mon zanfan i al kot sa bann menm sistenm lasante. Mon fanmir, mon bann zanmi, nou tou nou al dan menm sistenm lasante. Mon oule ganny sa servis.

E ler mon tann en dimoun konplent lo *Facebook* mon pa pran sa konplent pou anmenn dan Lasanble. Mon al rode kwa ki'n pase, mon sey *call* tel dimoun, dir be fer tel keksoz.

Ler mon tande en pasyan in pri deor, pa tou keksoz ki mon anmenn la anndan pou zis fer politik avek.

Me in ariv en staz kot Gouvernman tou sa ki ou dir li kot i fer in mal, i ankoler, i oule bat ou, i oule agresiv ek ou. Mon pa konnen akoz. Be i oule bat ou, akoz ler mon regard bann komanter ki'n ganny mete dan bann group, bann group ki annan non Prezidan. Apre zis *US* ki ganny akize konmkwa in fer komanter. Zis siporter *US* ki ganny *call* in par *CID*, sa bann ki fer sa ban komanter pa ganny *called* in.

Nou bezwen realize nou, nou bezwen konpran poudir nou, nou reprezent lavwa Lepep. E mwan mon reprezent tou dimoun pe enport ki ou *LDS*, pe enport ki ou *SPPF*, ki ou *US*, ki ou zonn, ki ou rouz, ki ou ver, ki ou katolik, ki ou pa katolik. Mon reprezent tou dimoun.

Ou annan en problem ou vin diskit ek mwan, mon pou diskit ek ou. E se sa ki mon oule Gouvernman i konpran, i en Gouvernman ki sipoze pou lepep, me par lepep. Be la mon vwar li in vin en Gouvernman pou serten, me par lepep.

E ki mon vwar i drol, ler mwan mon montre ou levidans, levidans ou Minis kot pa'n

ekout ou, ou a vin rod mwan parey mon ti fer lontan.

### **MR SPEAKER**

Eskiz mwan pa koz atraver lasal silvouple.

### **HON SEBASTIEN PILLAY**

Mon pa pe koz atraver lasal mon pe koz atraver ou Mr Speaker.

### **MR SPEAKER**

Kontinyen.

### **HON SEBASTIEN PILLAY**

Atraver ou Mr Speaker. Ler ou montre zot levidans e mon'n fer li. Mon'n menm *highlight* sa mo brigad zis pou mwan fer sir, 100 poursan sir ki mon pe koz lo la.

Konmsi - mwan mon'n dan en Gouvernman kot nou an mazorite absoli. Mon'n dan en Gouvernman kot nou dan en minorite dan Lasanble *ok*? Ozordi mon dan Lopozisyon. E wi, mon en minorite Lopozisyon dan Lasanble.

Me selman mwan mon dir sa ek Lepep Seselwa. Avek mon minorite dan Lasanble, avek mon minorite dan sa Lasanble mwan mon pe fer en travay mazorite dan sa Lasanble!

**(APPLAUSE)**

### **HON SEBASTIEN PILLAY**

Mwan ki pe fer travay sa mazorite dan sa Lasanble!

E Mr Speaker si avek en minorite, en minorite ki serten ti akiz mwan mon pa lir Lalwa. Ozordi nou pe kapab montre Gouvernman poudir ler ou'n fer en fot, retournen. Nou pare pou nou konpran si ou ekoute.

E si tou dimoun ti fer parey sa enn Minis ti'n fer bomaten, si sa Minis ki la ti'n fer parey sa enn Minis bomaten, i ti'n retournen, i ti'n vwar sa *Order Paper* in sorti, i ti'n kontakte Onorab Esparon, Onorab be eksplik mwan en pti pe, nou ti a kapab bouz devan. Be nou pa pou bouze devan. Akoz ozordi mon pou dir Mr Speaker, Gouvernman pa oule respe Manm Lasanble parey i devret. Mersi Mr Speaker.

**(APPLAUSE)**

### **MR SPEAKER**

Mersi Onorab. Mon annan Onorab Loizeau ki'n lev lanmen lo dernyen moman. Mon pe propoze mon a pas Onorab Loizeau e mon a termin la. Mon krwar mon pa'n mank okenn lot dimoun. Onorab Loizeau, apre nou a fer *summing-up*. Onorab ou annan laparol.

### **HON NORBERT LOIZEAU**

Mersi Mr Speaker. Bonzour tou dimoun a lekout. Mr Speaker, mon osi mon'n fer en pti preparasyon parey Onorab Loze pandan ki deba ti pe ganny fer.

E ler mon'n ekout Onorab Esparon son Mosyon ki i pe demande, ki Lasanble i demann Gouvernman pou revwar striktir Brigad Iirzans dan bann distrik avek bi fer zot vin pli efikas. Pli efektiv, Onorab Esparon in dir.

Mr Speaker, mon konpran Onorab Esparon ki i anvi malgre ki mon bezwen dir ki, malgre ki en Manm lo nou kote in deza adres sa size avek Minis e i ti ganny en lot larepons. Me nou koman bann Manm Lasanble lo kote *LDS*, en Minis, nou Minis, nou pa parey zot. Se sa diferans ant nou ek zot.

Nou Minis i kapab vini dir en serten keksoz la. Si nou, nou pa dakor e nou santi ki sa i merit ganny refer, nou koman en *Caucus* dan *LDS* se nou ki'n marse lo teren, se nou ki konnen kwa ki nou bezwen dan nou distrik e i normal pou nou refer li, refer sa keksoz. Parey Onorab Esparon in vin avek.

Nou konnen sa Minis in dir sa. Me selman nou, nou'n santi ki non, nou bezwen fer li dan sa fason e nou, nou'n propoz sa ki sa i kontinyen.

Alors mon pa vwar naryen mal ladan.

Mr Speaker, bann brigad parey Onorab Esparon in eksplike ti pou ede, ti pou ganny mete la pou ede pandan letan ki i annan en dezas. E nou tou nou konnen ki kalite travay sa bann dimoun i fer.

E la lo parey mon bann Manm isi dan Lasanble zot in remersye, mwan osi mon anvi remersye tou bann ki'n partisipe. Zot tou zot in fer en travay serye mon panse, malgre i annan enn de pti keksoz nou ti ekspekte zot fer plis, me ki pa'n arive.

Mr Speaker be nou, nou, nou anvi vwar - mannyer mon pe konpran Onorab Esparon - nou anvi konnen kwa ki nou oule koman en brigad. Ki nou oule zot fer. Ki kalite dimoun ki nou pran pou antre dan brigad.

Eski nou pran en dimoun ki sou depi bomaten ziska aswar 266 zour i sou? Kan ler i annan en delo ki'n monte, ler li i vini li dan son lestoman in pli plen ki sa delo ki nou pe al dil avek?

Eski ler mon konpran Onorab Esparon, eski nou merit annan bann dimoun en pti pe. Parey brigad, i annan dimoun i get brigad konmsi bann dimoun ki pou vini pou vin travay, pou vin fer sa

louvraz fizik. Me i annan bann lot konponan ki nou kapab met ansanm avek.

Dan brigad i kapab osi annan bann eksper, bann dimoun ki pa pou fer sa louvraz fizik ki sa bann lot dimoun brigad pe fer. Me selman zot kapab donn en nide, zot kapab assess sa sityasyon avan sa travay in ganny antreprann. Mon konpran Onorab Regina dan sa fason.

Nou'n ganny dir ki ozordi dimoun pa oule vin antre brigad, pa oule vini. E dan distrik Bel Air nou ti pe ganny sa problem, ansanm avek DA Nigel ler i ti DA Bel Air, nou ti pe rod dimoun pou antre dan brigad, nou pa ti gannyen. Pourtan ti annan en lalis dimoun, ti annan en lalis kot distrik tou bann dimoun ki ti dan brigad.

Be ler nou ti apres zot, pou rezon Gouvernman sanze zot tou zot ti rekile. Me selman la avek nouvo DA, lot zefor in ganny fer e la mon trouve ki bokou dimoun in konpran, in konpran kwa en ladministrasyon distrik ozordi parey Onorab Arissol in eksplike.

Ozordi dimoun in konpran ki ladministrasyon distrik pa pou zis serten, Ladministrasyon Distrik i pou

tou dimoun e tou dimoun i bezwen *involve* dan zot distrik. E pou nou fer sa bann dimoun *involve* dan sa distrik Mr Speaker, ozordi napa dimoun ki oule travay pou naryen.

Alors i normal ki, vi ki dimoun pa oule travay pou naryen konmela - pli tar mon pou vin lo volontarya - alors ki i normal ki en serten rekompans zot gannyen. Swa anver en *allowance* parey i pe donn tou le-z-an. Vi ki si nou anvi sa bann dimoun zot kontribye en pti pe plis, nou kapab fer li tou le *quarter or* tou le mwan parey serten Onorab in dir.

Kot la Mr Speaker, kot sa bann dimoun zot pa pou kapab ganny servi zis pou al ler i annan en dezas. Zot osi kapab ganny servi vi ki zot pe ganny sa pti *allowance*, sa rekompans regilyerman, pou zot fer lezot keksoz Mr Speaker.

Parey i annan bann zour, parey nou lo kote distrik i annan *Children House* ki ti pe demann lasistans pou netway en landrwa kot nou'n fer en zoli zarden rekreasyonnel.

Ms Lucy kot *Children's House* anler in vin ek sa linisyativ e nou'n negosye ek Gouvernman, nou'n ganny sa landrwa. E DA ansam ek son group dimoun kot distrik zot in vini, zot in donn en koudmen

fer sa travay e dan sa laliny nou kapab servi nou brigad osi pou kapab antre dan bann travay koumsa.

E osi pa blyie Mr Speaker nou ti enkli bann *inmates*. Ozordi bann *inmates* zot ganny mete Montagne Posée, vi ki nou anvi zot sanze ou zot sanz, zot konportman, zot ganny sa kiltir travay, nou osi kapab gete mannyer nou kapab enkorpor zot ladan. Kot zot osi ler zot fini zot santans, zot osi zot kapab ganny en pti keksoz atraver sa bann travay ki zot in fer.

E la Mr Speaker, mon pou al lo volontarya. Mon osi mon konnen volontarya mannyer ti marse. Mon rapel ti annan en letan sant Ladministrasyon Distrik Bel Air ti komans par bann travay volonter. Mon rapel mon manman ti dan brans sa bann letan. Nou ti vini, nou ti komans sa. Apre finansman ti vini e i ti kontinyen e ozordi nou annan sa ladministrasyon distrik ki parmi enn pli vye dan Sesel. ki'n komanse par travay volontarya.

E la Mr Speaker, e sa travay volontarya la, parfwa in ganny sorti. Se la fason ki serten keksoz in ganny antre. Ti annan en moman nou ti annan en group lanbelisman, nou tou

nou rapel sa groupman lanbelisman.

Kot sa letan Mr Speaker distrik ti prop, mwan mon rapel distrik Bel Air ti annan bann dimoun parey Rollen Camille ki ti ansarz lanbelisman, apre in vin Patrick Dubois. In vin plizyer zot, nou distrik ti prop.

Nou rigol ti netwaye, nou semen. Zot ti menm plante, si ou get an montan kot kort Bel Air, an montan sa bann zoli bordaz feyaz, se bann manrmay lanbelisman ki ti fer, zot ti ganny en lapey, zot ti atase ek distrik. Be ki ti arive Mr Speaker?

Apre ki volontarya in fini, ti vin lanbelisman e apre Gouvernman oparavan ti trouve ki sa i bezwen aboli akoz, i annan serten dimoun ki bezwen ganny en pti larzan an gro dan sa bann dil.

Mr Speaker, lannmen la ki aprezan nou'n vwar kot *LWMA* in antre. Kot kontra in ganny donnen ek tou bann dalon, tou bann dimoun ki ti konekte sa letan ti ganny en pti semen pou netwaye, kan lontan Mr Speaker nou pti semen nou ti netway nou menm.

Lontan dan mon distrik Bel Air, bann pti kominote kot ti annan en ta diferan fanmir ki ti reste. Be nou ti netway nou landrwa nou menm. Avek sa

zafer pti Kontra, ozordi ou vwar en dimoun ki ganny en pti kontra pou vin netway se mwan, an montan kot mwan mon pas 5, 6 nou, kan lontan nou, nou ti fer sa.

E aprezan sa Mr Speaker in vin en fardo lo Gouvernman sa. In vin en fardo lo Gouvernman kot i annan ki pa netwaye, i oule ganny peye. Kot nou larivyer, nou'n al vizit nou larivyer lotrozour ansanm ek Onorab Naidu. Akoz Bel Air i annan en ta larivyer, lontan nou larivyer ti prop. Kot nou vwar i annan serten bout larivyer pa pe ganny netwaye. E tousala dan lanbelisman ti arive, me avek sa novo fason fer ki *US* ti antre, in fer ki tousala in ale, in perdi.

E nou Mr Speaker nou, nou annan en novo fason fer. Se sa ki sa Mosyon in vin dan Lasamble, pou nou vwar mannyer nou kapab fer sa group brigad pli efikas. Onorab Cosgrow pli boner in koz, oli nou bann novo fason fer?

Mr Speaker, be i annan en ta novo fason fer nou pe fer. Ozordi ou konnen ki nou pe fer nou koman Gouvernman? Nou Gouvernman? Gouvernman pe valoriz nou bann eksper, nou bann profesyonnel. Ozordi parfwa i annan serten keksoz ki vin dan Lasamble, zot krwar se

Mr Ramkalawan ki anvi anmenn sa?

Parey sa Lalwa Sekirite Sosyal. Prezidan Faure li, ou krwar Prezidan Faure li menm li i ti anvi anmenn sa Lalwa? Mr Speaker akoz in valoriz bann profesyonnel ki zot, zot in anvoy *train US*. Aprezan ozordi zot pa oule ekout sa bann profesyonnel. Ler sa bann profesyonnel i dir fer en keksoz.

Aprezan nou koz *trust*, Onorab Cosgrow in koz lo *trust*. Mr Speaker, sa menm Onorab Lemiel eskiz mwan Mr Speaker i malad, i mon Chair lo mon Komite - son lasante in tonm en pti gin e nou priye ki i a reganny son lasante. Mon'n *call* li taler i dir mwan i kot li pe *relax*, mon anvi dir ek li rekiper byen se li pou li al repran son travay senmen prosen.

Wi Mr Speaker, i ti dir klerman ki lanbelisman - dan sisyenm Lasamble sa, ti annan en Mosyon ti vini lo bann zafer lanbelisman - i ti dir - (Ozordi Onorab Herminie i pe dir in perdi pandan sa 2an) I pa'n perdi pandan sa 2an sa, Onorab Lemiel ti dir Anse Royale ti reste zis en tors, zis en tors. Al lo *verbatim* nou pou vvar. Ler li i ti al rode, i ti vvar zis en tors e tou lekipman ti'n perdi. Setaki in pran pou li.

Mr Speaker ozordi, ozordi nou pe koz lo novo fason fer. Mr Speaker ozordi nou ban larzan dan bann *funds* nou pa pe ganny perdi, pa pe ganny vole. Tandis, oli sa *Disaster Relief Fund*, Mr Speaker dan zot letan ki i annan? Zis larzan in ale. Nou pa konnen. Sanmenm sa novo fason fer ki zot, zot ti fer. Aprezan ler nou, nou pe sanz sa novo fason fer zot, zot ankoler.

Ti annan en madanm anler Au Cap, ti donn R250mil pou netway - bann lepok ti annan en linondasyon dan zot letan. Mr Speaker en sou pa'n vvar ziska ozordi. En sou pa'n vvar! Selman Onorab Cosgrow pe dir nou koumsa oli *trust*? Konbyen larzan ki'n perdi dan okenn *fund* ki Gouvernman *LDS* pe administre ozordi? Dir mwan konbyen. Byento. Napa problemm, byento nou a vvar Mr Speaker, zot in dir.

E Mr Speaker sa Mosyon li. Nou, nou pe koz lo sa groupman brigad lo nivo kominoter, dan distrik. Ler i annan en pti dezas dan distrik. En pye dibwa in tonbe, en pti linondasyon. Mannyer nou kapab mobiliz sa bann dimoun pou zot fer sa travay, i napa naryen ek *DRDM*. *DRDM* li i get bann keksoz nasyonalman. Nou, nou pe koz kominoter.

Dan nou pti kominote ki mannyer nou kapab fer sa.

Mr Speaker, mon panse ki parey mon dir oparavan, nou konpran nide deryer Onorab Esparon ek son Mosyon. Pa akoz sa in deza vin dan Lasanble 2021 e naryen pa'n fer, nou'n dir aprezan nou, nou pou dormi lo la. Non!

Mr Speaker, Onorab Esparon li i en dimoun menm si nou Minis in dir en keksoz ki nou, nou pa satisfe avek, Onorab Esparon pou vin avek en keksoz li e se sa ki in dir mwan li. I pou vin avek en keksoz pou nou *reverse* sa, pou nou fer nou bann dimoun ki dan brigad *happy* zot osi.

Akoz i annan dimoun dan kominote Mr Speaker, ki kontan sa. Nou ki dan distrik, nou ki trouve. Nou trouve i annan dimoun ou *call* zot, zot vin ek zot zouti deswit. Mon pa pou nonm non personn dan distrik Bel Air, me i annan. E travay ki mon *DA* pe fer, nou annan en group brigad Mr Speaker ki mwan mon menm mwan mon pa ni konnen lekel zot, ki parti zot sorti.

*(laughter)*

#### **HON NORBERT LOIZEAU**

Si zot *LDS*, si zot *US*. Dan Bel Air nou pa fer sa nou. Dan Bel

Air nou travay an kominote e nou politik ler nou fer nou fer ler i annan eleksyon, ler i annan eleksyon la zot fer zot politik. Me kot bann keksoz serye Mr Speaker, nou partisipe e ler nou partisipe nou pa gete, nou pa gete kot ou sorti.

Ozordi dan distrik nou annan en groupman trwazyenm az. Ti annan en moman lepok *US* ti annan forse 12, 15 menm dimoun zot sipoter. Ozordi nou fer en fonksyon pou trwazyenm-az, nou ganny plis ki 50 ekek. Nouvo figir, ki vwar sa nouvo figir lo ladministrasyon distrik.

Mr Speaker, an terminan mon anvi dir avek nou bann Manm isi lo kote *LDS* nou, nou konnen ki nou pe fer. Nou konnen ki nou anvi fer, annou pa les zot derout nou. Akoz zot, zot la zis pou rod tou keksoz negativ dan tou keksoz zot kapab met en pwen pozitiv ladan. Se sa zot plan Mr Speaker, pou derout nou, konfiz nou, *mislead* en pe dimoun deor.

E nou, mon anvi dir ek Onorab Esparon, mon pou donn ou sipor pou ou Mosyon akoz mon santi ki ou Mosyon i annan en merit. E nou pou kontinyen *focus* lo nou travay ki nou koman en *Caucus LDS* nou annan plan fer. Koman en parti

mazorite, ki nou plan pou lavenir. E nou pou kontinyen dan sa semen drwat e nou pou fer sir ki personn laba lot kote latab pa derout nou dan nou semen. Mersi Mr Speaker.

### **MR SPEAKER**

Mersi Onorab. Mon a pas laparol Onorab Esparon pou son repons lo deba e son *summing-up*.

### **HON REGINA ESPARON**

Mersi Mr Speaker. Bonn apre midi tou dimoun a lekout. Les mwan komans mon konklizyon par remersi tou Manm ki'n intervenir lo sa Mosyon lo tou lede kote latab.

Mersi Onorab Loze pou pret mwan ou zepol la pandan sa Semenn Sent, parey Simon Cyrène ti ed Zezi anmenn son lakrwa. Me selman sa pa ti anpes li ganny krisifye.

Mon osi remersi Direkter Zeneral, Mr Romano Songor ki Seksyon Brigad i tonm anba li kot Gouvernman Lokal pou ed mwan ek lenformasyon an preparasyon pou sa Mosyon.

Mr Speaker, Manm pa fodre esper Bidze pou anmenn Mosyon pou sisit en deba pou konsiderasyon. Parski an mezir ki Bidze pei i apresye, nou kapab demann en *review*.

Lanfaz sa Mosyon i lo revwar striktir e pou fer li pli efikas. Nou pa ti pe ekspekte bokou ek zot lo lot kote latab apard zis politik popilis par serten. Parski pandan sa bann dernyen lannen, ansyen Gouvernman pa'n anmenn okenn transformasyon dan brigad.

**(APPLAUSE)**

### **HON REGINA ESPARON**

I paret mwan ki Lopozisyon i e pe konfize lo mon Mosyon. Wi Onorab Uranie atraver ou Mr Speaker. Nou pe demann Gouvernman pou ekout nou.

Mr Speaker, dan lavi si ou ti annan sa posibilite pou defer keksoz, nou tou nou ti pou *go back* e efas serten keksoz dan listwar nou lavi ou listwar nou pei.

Ozordi ler nou pe tras listwar kot brigad i komanse, Lopozisyon i oule mon koz lalang. Tou dimoun i konnen ki mannyer brigad ti komanse e kote politik ti antre ladan. E la mon pou dir tir sa zafer politik e annou rod dimoun ki anvi zwenn pou anrole e pou vin lo brigad.

Mr Speaker, sa size brigad i enn tre enportan dan travay kominote e dan sa demars pou ed en dimoun ler dezas i arive

dan distrik. Parski bokou fwa ler en dimoun i ganny tape ek en dezas ki i pa'n prevwar ou prepare, premye landrwa ki i pou al rod led se kot Lotorite Distrik. Swa *call DA*, swa *call MNA* pou mobiliz dimoun ou resours pou ed li.

Mr Speaker atraver en deba in ganny fer resorti, ki i pou en tim brigad fonksyonnen i bezwen annan bon kordinasyon ant bann tim e lazans dezas lo nivo Nasyonal e mon pou dir ensi ki lo kote rezyonal. Sa kordinasyon i enportan pou keksoz bouz pli *smooth* e pli vit e fer sir ki dimoun ki dan bezwen i ganny sa lasistans neseser dan en kourt dele letan.

Se pour sa ki bann manm brigad i osi bezwen ganny sa loportinite pou partisip dan legzersis lo nivo nasyonal parey *major disaster* ki ganny fer lo nivo Nasyonal. Parski si i annan en dezas Nasyonal, zot pou osi ganny apele pou donn en koudmen e si zot pa konnen ki pou fer zot pa pou efektiv.

Legzersis i kapab osi ganny kordinen lo nivo rezyonal pou *boost up* moral kanmarad. E la mon pou dir ki sa model Bel Ombre i kapab vin en legzanp pou lezot distrik.

Mr Speaker, dan realite lavi ler en dimoun i ganny tape

ek en dezas, i normal pou li antre dan en leta panik. E ler i *call* pou ganny en led, i annan sa lekspektasyon ki ou bezwen kapab ed li o pli vit posib. E la si ou napa sa mwayen oubyen kapasite e striktir an plas pou ed sa dimoun, sa i fer li dezapwente e osi fer li fristre.

Se pour sa Mr Speaker ki atraver sa Mosyon nou pe dir revize e kot pa pe marse annou revwar e kot i byen annou ranforsi. E nou pe osi fer en propozisyon ki pli tar en diskisyon i kapab ganny fer, ki atraver Gouvernman Lokal. Avek Gouvernman Lokal pou met a dispozisyon distrik resours neseser, pour ki i a met dan son Bidze pou ganny sa finansman neseser.

Ki swa i apel li fon dezas parey i ti deza leka, ki ti ganny zere par Lotorite Distrik, kot i ava annan sirveyans apropriye pou vwar si sa fon i byen ganny zere. Pour ki en distrik i annan en sel group brigad e non pa en group *LDS* ek en lot *US*, parski dan lepase in annan sa zafer mal apropriye dan fon distrik ki fer li ganny arete.

Sa i a fer ki ler en dimoun i ganny afekte dan distrik i ava annan sa fon pou ed sa dimoun ziska ki i kapab ed son lekor. Parski ozordi piblik pa okouran poudir napa fon dan distrik pou

dezas e parfwa zot egzize ki DA i ed zot atraver sa fon ki nepli egziste.

Pran par egzanp Mr Speaker, en ros i roule i port danze pou en lakaz, si ou napa sa masin kas ros e dan ou lekip ou napa en dimoun ki kapab kas ros, Lotorite Distrik a kapab rod en boug ki annan en masin kas ros e ed sa fanmir dan limedya.

Parske si ou pou esper prosedir lo nivo santral, i pran bokou letan e si sa fon i la dan distrik i a kapab soulaz sa dimoun dan limedya.

En legzanp; En dimoun son lakaz i dekouver e ler distrik i al gete i bezwen zis ranplas detrwa fey tol. Dan limedya distrik a kapab ed li ek 2 ou 3 fey tol e brigad i a ed li rekouver sa bout lakaz, ziska ki i kapab rod en lot linisyativ.

En gro pye dibwa pe menas en lakaz e brans i komans tonbe e port danze. La deswit apre ki distrik in fer son analiz e pran kont sa laspe prevansyon pou anpes plis dezas ki kapab arive, distrik a kapab retir sa menas avan ki danze i arive.

Mr Speaker, sa laspe transportasyon in osi ganny fer resorti par en entervenan koman en keksoz enportan pou ede ek deplwayman tim brigad

pou al lo *scene*, e sa nou bezwen pran kont.

En keksoz ki'n ganny fortman resorti, se pou lans en lapel ek Gouvernman Lokal pou revwar sa *allowance* brigad pou fer li vin pli azour ek la realite pou ankouraz plis partisipasyon.

Mr Speaker, annou retourn en pti pe an aryer ler nou pe koz lo milisya. Zot, mon konnen zot gonfle ou a krwar zot a pete. Zot pa oule tann nonmen milisya sa. Ler nou pe koz lo reminerasyon, annou gete ki sa madanm Roche Caiman i dir i ti gannyen e ler i ti dan brigad. Li avek son mari ki ti dan milisya. Annou gete ki i dir. I ti ganny li en bwat *take away*, en *seybrew* ek en ponm. Wi.

**(APPLAUSE)**

### **HON REGINA ESPARON**

Pli tar zot ti donn li. (En dimoun ki'n anvoy sa mesaz pou mwan, mon kapab montre ou Onorab Sebastien).

Pli tar zot ti donn R500 e la zot pe dir fer pli byen. 2an depi ki nou ladministrasyon in vin o pouvwar, nou'n komans donn R1500 e la nou pe fer propozisyon pou donn tou le mwan. Oli problem Mr Speaker?

Onorab Gabriel atraver ou Mr Speaker, i dir fodre byen pey brigad. Selman i pa anmenn Mosyon pou demann Gouvernman pou fer ogmante larzan ki brigad i gannyen. *Espérons* ki la atraver sa Mosyon i a lev son lanmen e i a vot pou sa Mosyon pour ki bann brigad i ganny en pe plis reminerasyon.

Mr Speaker, en Onorab lo lot kote latab atraver ou i dir nou lo sa kote latab nou pe blanm brigad e dir zot in vol lekipman. Zot memwar i kourt, pa manz bannann e zet zot lapo lo mwan.

La mon annan mon Mr Speaker en *verbatim* le 28 Me 2019. Sa lepok nou ti ankor anba Ladministrasyon *US ok* e Onorab Lemiel ti dir, mon *quote*;

“Akoz ozordi parey mon pe dir ti annan tou sa bann lekipman, kote in ale tou sa bann lekipman? Eski napa en bon *oversight*? Lekel ki'n pran sa bann lekipman?

Ozordi ou pou al dan distrik napa en sou, napa ni en pyos, napa prela parey in ganny dir vre ek mwan osi i arriv lensidan dan mon distrik kot dimoun tol i sorti, ou *call* ou demann *DA*, be *DA* mont avek 2 prela. Nou'n ganny lateras grennen lot zour Bougainville

nou al lo teren, *DA* mont en 2 prela. Ler i monte *arr* napa, nou bezwen telefonn anba kot Gouvernman Lokal 6er diswar”.

**(APPLAUSE)**

### **HON REGINA ESPARON**

Mwan ki'n dir sa? Reflesir silvouple. E sa ti 2019.

Mr Speaker, atraver ou mon ti a kontan dir Onorab Herminie ler i vvar Onorab Lemiel, demann li sa bann lekipman kote in ale ler i dir in disparet. Fer sa Onorab, apre ou a vin kestyonn nou.

Mr Speaker mon pou dakor ki bann lekipman i bezwen annord a tou moman e annan en levanter omwen tou le 3mwan. Ou bezwen osi annan sa *backup* dan distrik pou ed ou vin efektiv. E la mon pou dir ki si sa *checklist* pa azour i enportan ki i ganny revize. I enportan ki tou lazans konsernen i vin azour ek zot rol e i enportan i nou revwar zot rol sa group dimoun. Pou met li azour ek realite e fer li bon pli efektiv parey Mosyon pe demande.

Mr Speaker, parfwa ler ou pe aranz en keksoz e i pa marse ou bezwen kase e re aranze e mon krwar brigad osi i parey. Kot pa marse annou re aranze e

kot fodre kase annou kase, apre nou ava re aranze.

Annan plis *training* de baz pou sa bann dimoun ki'n angaze. E la mon mazinen ek en kour naze osi pou bann brigad ki anvi komanse dan sa lekip ti ava bon. Les dir en bato i savire e lavi dimoun i an detres. Ou konnen ki dan ou lekip i annan ki kapab naze pou al ede. Ou osi bezwen annan dimoun ki konn *first aid* pou kapab donn sa premye swen.

Mr Speaker, pou mwan terminen mon anvi felisit sa bann zenn North East Point e osi sa zenn Solda ki ti konn naze e ki ti kapab sov lavi dan sa lensidan par zot aksyon brav pou asiste sa bann zenn Sanmdi pase, ki ti vwar zot dan detres dan lanmer North East Point, pou zwenn tim brigad Glacis.

Sa lensidan i montre ki konn naze i osi bezwen vin en eleman dan brigad. Atraver zot zes in osi montre sa konpasyon e demontre zot abilite pou sov lavi e sa i en aksyon brav ki devret ganny rekonnnet.

Mr Speaker, mon ti a kontan dir ek bann dimoun ki oule zwenn brigad, ki'n zwenn brigad, se pou pran zot responsabilite, sa kontra ki zot in sinyen i pou 2an. Si apre 2an zot santi zot pa kapab

kontinyen zot a sorti. Me ler ou'n siny ou kontra delivre lo sa responsabilite silvouple.

Mr Speaker, mon azout mon lavwa ek pou Onorab Arissol pou lans ankor en lapel pou nenport ki dimoun ki ti a kontan zwenn Brigad Dirzans dan distrik Glacis pou apros Ladministrasyon Distrik Glacis e al anrole kot DA Christelle. E sa lapel i osi pou lezot distrik.

Mon ti a kontan remersi tou bann tim brigad ki pe donn zot letan pou ed lezot dan tou distrik. Kontinyen montre sa volonte e ankouraz lezot pou zwenn. E pou bann ki'n ede dan lepase e ki ozordi zot nepli kapab, zot osi mersi bokou.

Mr Speaker, rol en Manm Lasanble se pour *press for action* e rod solisyon e se sa ki nou pe fer atraver sa Mosyon. Avek sa 2 mo mon demann tou Manm pou vot an faver sa Mosyon. Mersi.

**(APPLAUSE)**

### **MR SPEAKER**

Mersi Onorab pour konklizyon. Avek sa mon ava apel bann Manm pou vot lo Mosyon.

Manm ki an faver lev lanmen silvouple? Mersi. Manm ki kont? Bon, lo Mosyon ki Lasanble i demann Gouvernman pou revwar

striktir Brigad Irzans dan bann distrik avek bi pou fer zot vi pli efektiv. 19 Manm in vot pour, 0 kont e 8 Manm in *abstain*. Donk sa Mosyon in aprouve par Lasanble. Mersi. Bon, avek sa nou'n termin nou travay pour ozordi e pour lasemenn. Mon konnen i annan en *fin* lasemenn, en wikenn avek bokou sinifikasyon pou laplipar Seselwa.

Donk mon a swet tou Manm bonn kontinyasyon e bon devouman e refleksyon e osi bonn selebrasyon Lafet Pak. Mon remersi zot pou zot travay sa semenn e Lasanble i ava *adjourn* ziska Mardi prosen 9er.  
*Adjourn*.

**(ADJOURNMENT)**